

# SALMOS

## Salmo 1

'Uchañuma unikama  
kuëenmainun 'uchañu  
unikama kuëentima bana

- <sup>1</sup> Ui unin kara ñu 'atima  
'akë unikaman 'ësëkin  
kakëxunbi an kakësa okin  
aima,  
'ianan, uni 'uchañu kamabë  
nitsi 'uchaima bëruankakin  
bëtsi ñukamaribi 'aíma  
'ianan axa Diosmi kuai  
banakë unikamabë nitsima,  
ax ka chuámarua tani  
kuëenti 'ikën,
- <sup>2</sup> usai 'ikin ka Díosan bana  
kikësa okinshi 'akin, a  
manukinma nëtën 'ananbi  
iméribi a bana ënkinma  
'ati sinania.
- <sup>3</sup> A unix ka baka 'urama nikë i  
aín tapun me 'ukëmëu kuani  
nikë axa tuákësa 'ianan,  
uínsarabi aín pëchi chushi  
rëukukëma usaribi 'ikën.  
¡Usa 'ain ka kamabi an  
'akë ñukamax upí 'ia!
- <sup>4</sup> Usa 'aínbi ka an ñu 'atima  
'akë unikaman 'akë ñux  
usai 'ima,  
usa 'aish ka atun 'akë ñux  
ni pëchi chushikë suñun  
tákakin pukë usaribi 'ikën.
- <sup>5</sup> Usa 'ain ka an ñu 'atima  
'akë unikama atux Diosan  
'atima okë 'aish.

Anúan an ñu upíokin 'akë  
unikama 'ikë anu 'itima  
'ikën.

- <sup>6</sup> Diosan ka an ñu upíshi  
'akë unikama atun tsóti  
bëruaia,  
'aínbi ka an 'atima ñu 'akë  
unikamax 'aisama ñu 'ai  
anunbi 'atimatia.

## Salmo 2

Diosan kaískë uni 'apu  
'iti ñuikë bana

- <sup>1</sup> ¿Uisakatsi kara uni  
'uchañukama tsuákiruax  
Diosmi banain?  
¿Usai 'ikin kara usokin  
'anuxumabi uisakin  
'ati kara ñu 'ikë kixun  
sinánkanin?
- <sup>2</sup> Ënë menu 'ikë 'apukama an  
bana mëníokën  
ka atúnbi timéxun uisakin  
kara,  
'ain 'Ibukëñun an kaískë  
'apu 'ati 'ikë kixun  
sinánkania.
- <sup>3</sup> Sinani ka atuxi munuma  
banai kikanía:  
¡Usakin 'akin kanaanuna atun  
kushian an kuëenkësokin  
nu 'anun 'amítima 'ain!  
¡Usai 'ikanaanuna atun  
ubiokëma bukuti 'ain!
- <sup>4</sup> Usai atux 'ikëbëbi ka Dios  
naínu 'apu 'ikë,

- ax atumi kuaiti 'ikën;  
 5 usai 'itankëx nishkin ka  
 atu ratuti 'ikën; kushiira  
 atumi nishkin ka ësokin  
 kati 'ikën:  
 6 'ën kana axa 'apu 'iti uni  
 anëan, usa 'ain ka aín  
 bashi upí Sión kakë anu  
 'apu 'iti 'ikën.  
 7 'Ëx kana uisakin 'ati kara  
 Diosan sinánxa a ñui kiti  
 'ain, an ka ësakin 'ë kaxa:  
 Mix kamina 'ën bakë  
 bëchikë 'ain; usa 'aish  
 kamina bërí 'ën bakë  
 bëchikëira 'iti 'ain.  
 8 'Ë kamina bëtsi bëtsi mekama  
 minan 'inun ñukáti 'ain,  
 ñukákëxun kana uinu kara  
 me kuainakëtia abi 'ën mi  
 'inánti 'ain.  
 9 Usa 'ain kamina min kushin  
 kamabi 'apu 'atimakama;  
 ;kamina me 'akë kënti  
 tukapakësa okinshi 'ati  
 'ain kixun ka 'ë Diosan  
 kaxa kiox ka 'apu kiox!  
 10 'Apukama 'imainun an bana  
 mëníokë unikama ënë  
 menu 'ikë mitsun kamina  
 ënë bana kuati 'ain,  
 ;Kuakin kamina upfokin ënë  
 bana sinánkanti 'ain!  
 11 Dios rabikin kamina kuëëni  
 shaíkikin rabikanti 'ain;  
 usakin 'ai ka ami rakuékanti  
 'ikën,  
 12 usa 'ain kamina Dios ax  
 nishkima mitsu,  
 'aisama okin tëmëramia usa  
 'ain rabikanti 'ain.

;Diosan ka axa ami  
 katamëkë unikama  
 chuámarua tania ami  
 sinani kuëënun 'imia ësai  
 ka Diosan kaískë unikama  
 kiakëxa!

## Salmo 8

**Diosan 'akë ñu chaiira  
 'imainun unin 'akë ñu  
 ñui David kanta bana**

- <sup>1</sup> Dios mix kamina nun  
 'apuirá 'aish kamabi menu  
 'ain.  
 ;Mix chaiira 'ain ka kamabi  
 menu min anë 'ikën!  
 ;Usa 'ain ka min 'akë  
 ñukamax naíkamë 'ëo  
 sënënkë a manámi  
 sënënia!  
<sup>2</sup> Tuá xukama kikë bana  
 'imainun tuá chabu atux ka  
 mi kushikin rabi kantaxa,  
 usai 'ikin ka axa mimi  
 nishkë unikama 'aisamaira  
 'ikëbi nëtëmiaxa.  
 ;Usakin 'akin ka axa mimi  
 nishi 'ësénankë unikama  
 banaima nëtënun 'imixaxa!  
<sup>3</sup> Uisaran karana minbi unio  
 naíkamë 'ëo, 'uxë, 'ispa  
 akama min unio a isin  
 anun kana,  
<sup>4</sup> ësokin sinanin: ;Añu kara  
 unix 'ik?  
 ;Añu karanuna nux unishi  
 'aish 'iti 'ain?  
 ;Uisa kupín kaina ami  
 sinani mix 'itsaira  
 bënëtin?

- <sup>5</sup> Nukama kamina mi  
 'iskēsaribi 'itánun uniokēn,  
 'anan kamina 'apu 'akēsaribi  
 okin nu bēruánkēn.
- <sup>6</sup> Usakin 'axun kamina min  
 uniokē kamabi ñun 'ibu  
 'inun nu 'imianan,  
 kamabi ñu a manámi 'ixun  
 bēruáin:
- <sup>7</sup> a ñuinakamax ka ovejakama  
 'imainun vaca aín  
 bēnēkama 'ianan ñuina  
 raěkēmakama aribi 'ianan,
- <sup>8</sup> ñuina pēchíñu manan  
 nuánkē a 'imainun bakanu  
 'ikē ñuina 'ianan,  
 parúmpapanu 'ikē ñuina  
 akama 'ikēn.
- <sup>9</sup> Dios mix kamina 'apuirá  
 'ianan kamabi ñu manámi  
 'ain,  
 ¡usa 'ain ka kamabi menuxun  
 min anē 'unánkē 'ikēn!

### Salmo 14

**Diosan bana kuaisama  
 tankē 'atima sinánñu  
 unikama ñuikē bana**

- <sup>1</sup> An 'unántisa 'ikēbi ñu  
 'unánkēma unikaman ka  
 Dios isa 'aíma 'ikē kixun  
 sinania:  
 kamaxunbi ka ñu 'atimashi  
 'aia;  
 usakin 'akin ka ñu 'atimaira  
 'akania;  
 ¡an upí ñu 'akē uinu 'ikē uni  
 achúshirabi ka 'aíma 'ikēn!
- <sup>2</sup> Diosan ka naíkamē  
 'ëonuxunbi unikama isia,

- kara axa ami sinánkē uni  
 'ianan an 'akinun barikē,  
 uni sinánñuira 'ikē kixun ka  
 Diosan istisa tania.
- <sup>3</sup> 'Aínbi ka kamaxunbi 'atima  
 okinshi sinania;  
 usa 'ixun ka bētsin 'akēsaribi  
 okin 'atima ñuira 'akania.  
 ¡An ñu upí 'akē uni ka  
 achúshirabi 'aíma 'ikēn!  
 ¡Achúshira unixi ka an ñu  
 upí 'akē 'aimaira 'ikēn!
- <sup>4</sup> An ñu 'atima 'atishi sinánkē  
 unikaman ka bana kuatima,  
 usa 'ixun ka atun pán  
 unin pikēsa usaribi okin  
 'ën unikama kēmēkin  
 'aia, usakin ka an Dios  
 rabikēma unikaman 'aia.
- <sup>5</sup> Usakin 'aínbi ka atux rakuētan  
 bamai bērēkinuxun 'aia,  
 usai 'imainun ka Diosan,  
 an kakēsabiokin 'akē  
 unikama 'akania.
- <sup>6</sup> Usa 'ain ka uni upí  
 sinánñukama an kuēenkin  
 ñu 'akēbē ami kuaia,  
 usai 'ikian aín kuēenkēsa  
 okin 'akania ka Diosan atu  
 'akania.
- <sup>7</sup> ¡Uisati kara Diosan 'ain  
 bashi Sión kakē anuxunbi  
 an Israel unikama 'akinkin  
 iéminun xutima 'ik!  
 Uínsaran kara Diosan an  
 kaískē unikama aín menubi  
 utēkēnun 'imía anun ka,  
 Jacobnēn rēbúnkikamax  
 kamabi Israel  
 ëmakamanuax kuēenti  
 'ikēn.

**Salmo 15**

**Dios rabinux ka uni usai  
'iti 'ikë kiax kikë bana**

- <sup>1</sup> Dios, ¿uix kara mix anu 'ikë  
aín bashi upíira  
anua 'ikë xubusa okin chupa  
'akë anu 'iti 'ik?
- <sup>2</sup> Anu ka 'iti 'ikë an upí  
ñuishi 'akë 'imainun an  
upíokinshi 'akin ënkinma  
abi ñu upíshi 'akë uni;  
ax kuni ka 'ain bana  
kikësokinshi 'ai upí 'iti  
'ikën;
- <sup>3</sup> 'ianan ka uix kara bëtsi ñui  
'atimai bananan;  
an 'unánkë uni 'atima oti  
sinanx banaima 'ianan;  
a rapasu 'ikë uni 'akëxumabi  
a kuami 'atima oti sinanx  
banaima 'imainun;
- <sup>4</sup> an ñu 'atima 'ati kuënkë  
uni abi iskinma,  
Dios ishi rabia ashí nuibakë  
uni 'ianan;  
uisa ñu kara 'akatsi kixax  
añu uisa ñu kara inúkinbi  
'akë uni;
- <sup>5</sup> 'ianan aín kuríki bëtsi uni  
'inánkin na 'inánkë a  
inumikian 'inánun kixun  
ubíokëma;  
'imainun bëtsi uni ñu 'atima  
'akëmbi bëtsi 'atima  
onun kixun kupíokëxunbi,  
usokin ñu 'ati kuënkínma  
'akëma.  
Uni ax ka uisa ñubi  
'inutima upitax tsóti  
'ikën.

**Salmo 16**

**Diosan banasa upíira  
ñu ka 'aíma 'ikën**

- <sup>1</sup> ¡'Ën 'Ibu Dios, 'ë kamina  
bëréanti 'ain,  
minmi 'akinti sinánkin kana  
'ën mi barin!
- <sup>2</sup> 'Ën kana mi kan:  
Míx kamina 'ën Dios 'ain  
usa 'ixun kamina min 'ë  
upí 'imin;  
usa 'ain ka min 'akinkësaribi  
okin an 'ë 'akinti bëtsi ñu  
ka 'aíma 'ikën.
- <sup>3</sup> Ënë menuxun rabikankë  
dios ax isa kushiira 'ikë,  
kiax ka aín unikamax kia,
- <sup>4</sup> 'aínbi ka uikaman kara a  
dios rabia akamax paëtani  
tëmëрати 'ikën,  
usai 'ikin atun a rabimainun  
kana.  
¡'Ën uínsaranbi atun  
'akësokin ñuina  
xaroxuntima 'ain!  
¡'Ën kana uínsaranbi aín anë  
ñui banatima 'ain!
- <sup>5</sup> Míx kamina 'ën Dios an  
kamabi ñu 'ë 'inánkë a  
'ain;  
min kamina upiti tsónun 'ë  
'imian.
- <sup>6</sup> Upí me akana a biti sinánkë  
'ixunmabi 'ën bian;  
jasabika usa 'aish ka 'ën bikë  
me ax bëtsi unikamanan  
'ikëbi mi 'ë 'inánkë 'ikën!
- <sup>7</sup> 'Ën kana min banan 'ësëkin  
mi 'ë 'unamikë a kupí mi  
rabiti 'ain;

- usa 'ain ka min bana  
'unánkë 'anbi ë 'imébi upí  
'imikin bërúaiá,  
8 'ëx kana uínsaranbi ami  
manutima Diosmi sinanin;  
usa 'ain kana axa 'ë rapasu  
'ikëbëtan, uisa ñu kara  
'ikëbëbi ami katamëti  
tsóti ëniman.  
9 Usa 'ain kana 'itsaira 'ën  
nuitu ukëmëuishi ami  
sinani kuëëinra kuëënin.  
Usa 'aish kana 'ën nami  
chuámarua tani kuëënti  
'ain,  
10 min kamina anu uni ñuia  
maínkë anu 'ikëbi 'ë  
ëntima 'ain,  
jusa 'ain kamina an mi ñu  
'axunkë uni uinubi ëntima  
'ain!  
11 Usa 'ixun kamina uisai  
karana tsóti 'ai kixun 'ë  
'unánmiti 'ain.  
Anu mix 'ikë anu ka anuax  
'itsaira kuëëntisabi 'ikën;  
anuax ka min unikama  
'itsaira kuëënti 'ikën.

### Salmo 19

**Diosan unio ñukama  
'imainun 'ain bana  
ñui kikë bana**

- 1 Naíkamë 'ëo an ka Dios ax  
ka chaiira 'ikë kixun unin  
'akësa okin ñuia;  
'imainun ka an unio  
naíkamë 'ëo kuman  
batsisa anribi a ñukama  
ñuikin nu 'unánmia.

- 2 Achúshi nëtë an ka bëtsi  
nëtë aribi unin 'akësa  
'inun kaia;  
'imainun ka imé anribi bëtsi  
imé 'iti aribi unin 'akësa  
'inun kaia.  
3 Usai 'ia ka uínbi aín bana  
chanioima 'ianan ka  
ax kia uisa banabi kuatima  
'aínbi ka nu 'unánmia,  
4 'aínbi ka kamabi menu  
'ikë unikaman aín bana  
'unania,  
usa 'aishi ka uinu kara me  
kuainakëakëxa anuxunbi  
aín anë kuakë 'ikën.  
Anu ka Diosan achúshi ñu  
anua bari 'iti 'akëxa,  
5 anuax ka bari achúshi uni  
'ain xubunuax mëratiñu  
'aish kuëëni 'ikëσαι 'ianan,  
achúshi uni abáti 'unan  
axa kuëëni abákësa kiani  
kuania.  
6 Usa 'ain ka bari naí  
meukuax urui kuainakëkin  
amoribi pékaia,  
Usai 'ikian pékakëx ka  
uínbi barin xana okin  
pékakëmama 'ima.  
7 Diosan banax ka upíra  
'ikën, an ka nu upiti  
tsónun 'imia an 'akë  
ñukama ax ka upí 'ikën.  
Kamabi Dios kikë bana ax  
ka asérabi 'ikën, an ka  
uni mënin sinánñushi usa  
'ikëmabi sinánñuira 'inun  
'imia.  
8 Dios kikë banakama ax ka  
asérabi 'ikën, usa 'ixun ka

- an ñu upí 'akë unikama  
'ain nuitu kuëëmia.  
Ax kikësabi oi 'iti  
Diosan bana an ka  
bëtsi banakama këñun  
mëskukëma 'ikën, usa  
'ixun ka unin sinan upí  
'imia.
- 9 Diosmi katamëti ax ka  
upíira 'ikën,  
usa 'ain ka únsaranbi ax  
këñutima.  
Aín bana kikësoi tsóti ax ka  
asérabi 'ikën,  
usa 'ain ka axa ami  
katamëkë uni ax kikësay 'i  
tsóti ëntima 'ikën.
- 10 ¡Usa 'aish ka kuri upíira  
kupíkë usamaira 'ikën!  
¡'ianan ka buna rëpa bataira  
'ain bánu 'ikë usaribi  
'ixun nu 'unánmia!
- 11 'Ianan ka a banakamaxribi  
an 'ë 'unánmikë 'ikën, usa  
'ain kana ñu 'aisama 'aisa  
tankinbi,  
min uni 'ixun ax kikësokinbi  
'ati 'ain.
- 12 ¿Uín kara abi ñu 'atima  
'atankëxun 'ënbi kana  
usakin 'a kixun sinánti  
'ik?  
¡Usa 'ain kamina mix Dios  
'ixun 'ën 'akë 'uchakama  
'ë mëníoxunti 'ain!
- 13 'Ianan kamina min uni  
'ikë 'ëx rabiakakë a 'ë  
mëníoxunti 'ain;  
usa 'ain kamina rabiakakë  
anma usai 'inun 'imia 'ë  
'akinti 'ain.

Mëníoxunkin 'akinia ka  
achushi uni 'ikë uínbi 'ë  
'ucha otima 'ikën,  
'ianan kana mix kikësoi  
'isama tani chaira  
'uchakë anuax iékë 'iti  
'ain.

- 14 Min iskëx ka 'ëx kikë  
banakama 'ianan,  
'ën sinánkë ñukama asábi  
'iti 'ikën,  
mix kamina an 'ë bërúankë  
'ianan an 'ë iémikë a 'ain.

## Salmo 22

### Dios tëmërakinbi rabi ami kantati bana

- 1 'Ën 'Ibu Dios, mix 'ën 'Ibu  
Dios 'ixun kaina,  
¿uisa kupín 'ë ëan?  
¿uisa kupín kaina 'ë iémi  
áíma?  
¿uisa kupín kaina 'ëx  
tëmërai masá nuitukin  
kakëxunbi 'ën bana  
kuatima?
- 2 'Ën 'Ibu Dios nëtë 'imainun  
'imébi kana 'ëmi 'akinun  
kixun mi kain,  
'aínbi kamina 'ën kakëxunbi  
kuatima;  
¡'ëx anun tantiti nëtë ka  
'áíma 'ikën!
- 3 Usa 'ain kamina mix bëtsi  
dios kamasamaira 'aish  
uisaibi 'ikëma 'ain;  
usa 'ikë ka Israel unikaman  
mi rabiti 'ikën.
- 4 Nun papakamax ka mimi  
katamëakëxa;

- usai 'ia mimi katamëtia  
kamina min iémikin  
'akiankën;  
5 mia 'akinun kixun  
ñukákëxun kamina ax  
ami nishkë unikaman  
mëkënuabi;  
mimi katamëtia 'akinima  
'ikima 'akiankën.  
6 Usa 'ainbi kana 'ëx achúshi  
unisama achúshi xënasara  
'ain;  
jusa 'ëx 'ain ka 'ëmi uni  
kuaia!  
7 Uikaman kara 'ë isia ax ka 'ë  
isi 'ëmi kuaia;  
'ianan ka 'ëmi kuai ain  
kuëbí kuëñushi ain maxká  
shafkai tënkëti,  
8 ësai kikanía: Ëñë unix ka  
Diosmi katamëkë 'iakëxa;  
usa 'ikë ka Diosan iémikin  
'akinti 'ikën.  
Ax ka Diosan 'akinti 'itsaira  
kuëñia kikanía.  
9 Usa ka: usa 'ain kamina  
min 'ën titan pukunuax  
bakënun 'ë 'imiakën;  
'imixun kamina 'ain kisinu  
makaxun 'ain xuma  
'amikin 'ë kanionun  
'imiakën.  
10 Ëñë titan 'ë bakënkëma pain  
'ikëbi,  
kamina 'ë bërúankën;  
usa 'aish kamina 'ën titan  
puku 'ukëmëu,  
'ainbi mix 'ën Dios 'iakën.  
11 Ë 'ura kamina 'itima 'ain,  
anun 'ëx tëmëratí nëtë ka  
'urama 'ikën,

- 'imainun ka an 'ë 'akinti  
uibi 'aíma 'ikën.  
12 Axa 'ëmi nishkë unikaman  
ka vaca bënëkama nékë,  
Basánnu 'ikë usaribi 'ixun 'ë  
bëarabuiánxa;  
13 usa 'aish ka paru 'inúan  
nékë  
kamaxa kuëëti anchakë  
usaribiti 'ëmi banai  
kikanía.  
14 Ëx kana 'umpax ampénkikë  
usaribi 'ain;  
'ën xokama ëchikibutia  
tankësa kana tanin.  
'Ëñë nuitunëx ka charokëxa  
xara kuëxu charákësa  
usaribi 'ikën.  
15 Ëñë kuëbitax ka mapú  
xuíkëx ëski 'irukë usaribi  
'ikën;  
'imainun ka 'ën ana  
manxantanu takáshkikë  
usaribi 'ikën.  
jUsa 'ikë kamina bamax  
menu rakakësa 'itánun 'ë  
ëan!  
16 Kamun 'itsan, 'akësaira okin  
ka uni  
'atimakaman 'ë bëara  
buiánxa;  
usakin 'akin ka 'ën mëkënu  
'anan 'ën taënu  
'inúanën uni raëxpakësa  
okin 'ë 'axa.  
17 jUsa 'ain ka 'ën xokama  
mëratía iskin tupuntisa  
'iaxa!  
Ax 'ëmi nishkë unikaman ka  
ënkímaira 'ë bërúaiá;  
18 usa 'ixun ka atun 'ën chupa,

- uin karaisa bitsia  
iskatsikixun ñuratsu nikin  
anun pain tanxun bikanxa.
- 19 Usa 'ainbi kamina mix Dios  
an 'ë kushiokë a 'ain,  
jusa 'ain kamina 'ë ëntima  
'ain!, jberibi kamina 'ë  
'akini 'ëbë 'iti 'ain!
- 20 Aín manë xëtokën 'akin  
bamamiti 'ikëbi kamina 'ë  
iémiti 'ain,  
usa 'ixun kamina kamunsa  
unikaman an 'ë rëtënun  
ëntima 'ain,
- 21 atux paru 'inúansa 'ainbi  
kamina anuabi 'ë iémiti 'ain,  
jatúxa vaca bënëkama  
manchañusaribi 'ainbi  
kamina anua 'ë iémiti 'ain!
- 22 'Ën kana mi ñuikin 'ën  
aintsikama kanan,  
anuxun mi rabiti xubunuax  
mi rabi atubë kantati 'ain.
- 23 Mitsun kamina a 'unánkë  
'ixun Dios, rabikanti 'ain.  
jJacobnën rëbúnki Israel  
unikaman mitsun  
kamina aín kushi 'unánkin  
Dios rabikanti 'ain!
- 24 An ka ax Dios 'ixun ñuñuma  
uni tëmëraquin  
ñukákëxun kuakëmasa  
okinma 'akinia.  
jUsa ixun ka 'akinun kixun  
ñukákëxun kuakin 'akinia!
- 25 Min kaisa min unikama  
'uakamë 'ëokë atun  
kuamainunbi kana mi rabiti  
'ain;  
an mi rabikë unikaman  
ismainunbi kana 'ëx
- kikësabiokin mi 'axunti  
'ain.
- 26 Ñuñuma unikama mitsux  
kamina,  
puchákin pitankëx  
kuëenkanti 'ain;  
ainan 'ixun Dios rabi  
kamina mitsux,  
'itsabaritia 'imi tsókanti 'ain.
- 27 Kamabi ñakánu 'ikë Israel  
unibu 'imainun,  
bëtsi nëtënu tsókë  
unikamanribi ka  
ami sinánkin Dios rabiti  
'ikën;  
jusakin 'ai ka an ismainunbi  
rantinpuruni tsóbukanti  
'ikën!
- 28 Dios ax ka 'apuirá 'ikë usa  
'ain,  
usa 'ixun ka kamabi  
me kuainakë anu 'ikë  
ëmakamanu 'ikë unikama  
ax kikësabiokin 'anun  
'amia.
- 29 Usa 'ikë ka ami ñanati  
tëtúbukin ashi rabi  
kamabi uni axa 'uakamë 'ëoi  
tsókë unikama 'imainun,  
axa ñuti 'urama unikama,  
atúnribi ka mimi ñanati  
'ikin mi rabikanti 'ikën.
- 30 'Ën rëbúnkikamax ka Dios  
ashi rabianan,  
a ñui xëñibua 'ainbi tsóti  
'ikën;
- 31 'imainun ka axa bërí bakënti  
tuákamax,  
kani min kamina ñu  
chairabu 'akë kix kiti  
'ikën.



**Salmo 23**

**Diosan ka 'ën 'Ibu 'ixun  
an ñuina 'arakakë  
bëruánkë unisa 'ixun  
'ë bëruaia kikë bana**

- <sup>1</sup> Diosan ka an ñuina 'arakakë  
unin aín ñuina bëruánkësa;  
usaribi okin 'ë bëruaia, usa  
'ixun ka uisa ñu kara  
inutiabi 'ë 'akinia,
- <sup>2</sup> an ka unin basi paxa  
upíira pimitankëxun aín  
ñuinakama tantimikësa  
usaribi okin ka Diosan 'ë  
'imia,  
'imianan ka 'umpax bëchuni  
pakaxkikëma a xëakin 'ën  
shima tërënun 'ë 'imia,
- <sup>3</sup> 'ianan ka amiribishi ami  
kushitëkënun 'ë 'imixa,  
'imianan ka bai upitan nikësa  
'inun uisa ñu kara upí 'ikë  
ashi 'anun 'ë 'unánmia,  
ax ka usakin ñu 'axunkin aín  
anë rabiti kuëënia.
- <sup>4</sup> Anun nisama anun kuaníbi  
kana añu ñubi inútimi  
rakuétima 'ain,  
Dios mix kamina 'ëbë  
kamabi nètën 'ain;  
'imainun kamina ñu upíshi  
'anun 'ë 'imiti 'ain.
- <sup>5</sup> Axa 'ëmi nishkë unikaman  
'atimokin isiabi kamina;  
atun ismainunbi anu pinux  
timéti 'axunkin 'itsaira  
kuëënun 'ë 'imin,  
usakin 'anan kamina 'ën  
maxkánu ro tutukakin anun  
'ë machabonun 'amian,

usokin 'anan kamina 'ën ami  
xëati aribi buákakin 'aruan.  
<sup>6</sup> Min asérabi nuibanan 'ë  
'akinkëx kana nètë itsi  
nètë itsi  
inúmi mibë tsóti 'ain 'ën  
'Ibu Dios,  
mibë kana xëniuba 'aínbi  
nètétimoi min nètënu 'iti  
'ain.

**Salmo 24**

**Nukën 'Ibu anuxun  
rabiti xubunu timéxun  
rabiti ñuikë bana**

- <sup>1</sup> Nukën 'Ibunan ka kamabi  
me kuainakëa ax 'ikën,  
usa 'ain ka kamabi ñu anu  
'ikë a 'imainun,  
kamabi uni anu tsotia.
- <sup>2</sup> Nukën 'Ibun ka me uniokin  
parúmpapakamanu an  
tuinti 'anan  
ënë me uniokin bakakamanu  
'anan 'umpaxnuribi 'akëxa.
- <sup>3</sup> ¿Uix kara anua Diosan bashi  
kakë upíira anu kuantí 'ik?  
¿Uix kara anua 'ikë 'ain  
xubu upíira anu Dios rabi  
kuantí 'ik?
- <sup>4</sup> Anu kuantí uni ax ka upí  
sinánñu 'ixun ñu 'atima  
'ati sinani 'uchaima 'ianan;  
Dios asérabi ain anë ñui  
kikëma 'iti 'ikën.
- <sup>5</sup> Usa unikama ka Diosan  
iémianan,  
upíokín sinánxunkin  
'akianan usakian ñu  
upíokín 'ati 'unamiti 'ikën.

- <sup>6</sup> Usai ka Dios an barikë  
unikama ax 'iti 'ikën,  
usai ka Israelkaman Dios  
'akinun an ñukákë  
unikama atux 'iti 'ikën.
- <sup>7</sup> ¡Ax irapain 'ia Jerusalénnu  
'ikë xëputi chaiirakama ka  
xëókiti 'ikën!  
¡Xëókia anun atsían xëkuë  
ax mërakëbë ka  
anun 'apuirá ax atsínti 'ikën,  
ax ka kamabi unin 'apu  
'iti 'ikën!
- <sup>8</sup> ¿Ui kara 'apuirá 'ianan  
kushiira ënëx 'ik?  
¡Ax ka Nukën 'Ibu kushiira  
'ianan rakuëma 'ikën!  
¡Ax ka Nukën 'Ibu 'aish  
rakuëtimaishi 'akanania!
- <sup>9</sup> ¡Ax irapaia 'ia Jerusalénnu  
'ikë xëputi chaiirakama ka  
xëókiti 'ikën!  
Xëókia anun atsían xëputi  
mërakëbë ka  
'apuirá ax atsínti 'ikën, ax ka  
kamabi unin 'apu 'iti 'ikën.
- <sup>10</sup> ¿Ui kara 'apuirá 'ianan  
kushiira ënëx 'ik?  
¡Ax ka Dios kamabi kushiñu  
a 'ikën!  
¡Ax ka Dios 'apuirá a 'ikën!

### Salmo 27

Nukën 'Ibun ka barin  
pékakësa okin 'anan  
'ë iémia kikë bana

- <sup>1</sup> Nukën 'Ibun ka 'ë 'akianan  
bëruaia,  
¿uimi karana 'ëx rakuéti  
'ain?

- Nukën 'Ibunshi ka 'ën tsoiti  
bëruaia,  
usa 'ain ka 'ëx ami rakuéti  
uni 'aíma 'ikën.
- <sup>2</sup> 'Atima sinánñu unikamabë  
ka axa 'ëmi nishkë,  
akamax 'ë 'atima onux 'ëmi  
manánux timëtia;  
'aínbi ka atuxi 'ë 'akatsi kiax  
'ibi rakuéti abáti 'ikën.
- <sup>3</sup> Suntárukaman ka 'ë  
bëarabuinti 'ikën,  
'aínbi kana 'ën nuitu  
kushiokin sinani  
rakuëtima 'ain;  
'ë 'anux 'ëmi 'ikuatsinuxa  
mënókakëbëbi kana  
chuámashirua 'iti 'ain.
- <sup>4</sup> Achúshi ñushi kana Nukën  
'Ibu ñukan,  
usa 'ain kana achúshi ñu  
ashi kuëenin:  
ax ka anuxun Nukën  
'Ibu rabiti xubunu 'ëx  
kamabi nëtë anun tsókë a  
nëtékama 'ikën,  
a xubunuxun kana rabikin a  
ñukáti 'ain.  
Ñukákin kana an unio  
ñukama upí iskin ashi  
rabiti 'ain.
- <sup>5</sup> Uínsaran kara anun tëmëratí  
nëtë 'ia,  
anun ka Nukën 'Ibun  
anuxun rabiti xubunuabi  
'ë bëruánti 'ikën;  
usakin 'akëx kana a meu 'aish  
an tupëonkëx asábi 'iti 'ain.  
¡Usakin 'akëx kana mapara  
kini achúshinu unékësa  
'iti 'ain!

- 6 Usai 'ikin axa 'ëmi nishkë  
unikama abë 'akanankin  
'atankëxun kana;  
mi ñuina xaroxunti 'ain,  
xaroxunkin kana anuxun mi  
rabiti xubu anuax kuëëni  
munuma mimi kantakin  
Dios 'ikë mi rabiti 'ain.
- 7 Kushin banakin kakëxun  
kamina mix Dios 'ixun 'ën  
bana kuati 'ain.  
Kuakin 'ë nuibakin kamina,  
j'minribi 'ë kati 'ain!
- 8 'Ën nuitunën sinánkin:  
Kana Nukën 'Ibu ñukáti 'ain.  
'Imainun kana 'ën Nukën  
'Ibu 'ë 'akinun barin.
- 9 j'Usa 'ain kamina 'ëmi  
unékësa 'itima 'ain!  
j'Ëmi nishkin kamina 'ë  
timakësa otima 'ain!  
Min kamina 'ëshira ënkinma  
'ë 'akinti 'ain,  
mix kamina 'ën 'Ibu 'aish an  
'ë iémikë a 'ain.
- 10 'Ën papabëtan 'ën titan  
rakaniabi kamina,  
mix Nukën 'Ibu 'ixun  
ënkinma 'ë isti 'ain.
- 11 'Ën 'Ibu, mimishi  
katamëmainun kamina  
uisaira karana 'iti 'ai 'ë  
'unánmiti 'ain;  
'unámianan kamina  
upiokinshi ñu 'anun 'ë  
'amiti 'ain  
axa 'ëmi nishkë unikama ka  
anu 'ikë usa 'ain;
- 12 usa 'ain kamina an  
kuëënkësa okían 'ë  
'akanun 'amitima 'ain,

- atux ka 'ëmi 'ikuaianxa usa  
'ain ka atun këmëi banakin  
bënëkinshi ñu 'aisa tania.
- 13 'Aínbi kana 'ën asérabí  
kamina min ñu 'akën  
kixun 'unanin usa 'ixun  
kana asérabí ka Diosan  
'ë nuibakin ñu 'axa kixun  
isti 'ain,  
anun 'ëx tsókë nëtékama anun.
- 14 j'Nukën 'Ibumishi ka uni  
katamëti 'ikën!  
j'Katamëkin kamina kushikin  
'atimakin sinántima 'ain!  
j'Imainun kamina Nukën  
'Ibumishi katamëkanti 'ain!

### Salmo 32

#### Ñu 'atima 'akë chikínati bana

- 1 Uí unin kara aín 'uchakama  
chikinakin ñu 'atima 'akë  
ënia ax ka kuëënia,  
usai 'ikëbë ka asérabí aín  
'uchakama 'áima 'ítánun  
mëníoxunkë 'ia.
- 2 Chuámarua ka uni 'atima ñu  
'ati sinánkëma ax 'ikën,  
usa 'ikë ka Nukën 'Ibun a  
'atimokin isima.
- 3 'Ën 'uchakama mi chikina-  
xunkëmapain 'aish kana,  
nëtë kamabi ini 'ën nami  
bëtsia tani 'itsaira 'iankën,
- 4 usai 'ikin kana ñu 'atima  
'ai 'uchakësa tankën nëtë  
'imainun kamina imébi 'ë  
'atimokësa 'iakën.  
Usokëx kana ro uá barin  
urukin xarokëx núkai  
chushikë usaribiti 'iakën,

- usai 'i kana 'ën nami  
'aisama tani 'iakën.
- 5 'Aínbi kana 'ën 'akë ñukama  
këñun 'ën  
'uchakama mimi unpukinmaira  
chikinaxuankën;  
'ën 'uchakama mi chikinaxunti  
sinánkin kana usakin 'akën,  
'aia kamina mix 'Ën 'Ibu  
'ixun 'ën 'akë 'uchakama  
'ë mëníoXuakën.
- 6 Usa 'ain ka, anúan têmëratí  
'ikëbëtan an nuibakë  
unikaman mi ñukáti 'ikën,  
tëmërakë an ka baka chaiira  
kushi 'ëi mapurutankëxa,  
uiu kara sënënia anu sënén-  
kësokinribi têmëramiti 'ikën,  
usa 'aínbi ka anbi atu uisabi  
otima 'ikën.
- 7 Min kamina mimi  
katamëkëxun:  
'aisama ñu inutiabi 'akianan  
'ë bërúain,  
usa 'ain kana 'ëmi iémikin  
'akinkëx kuëëni munuma  
kantakin mi rabiti 'ain.
- 8 Nukën 'Ibu ka ësai kia:  
'ën kana mi usakinmi ñu 'ati  
'unánmiti 'ain,  
'ianan kana 'ën 'unánmikin  
bana ñuixunti 'ain,  
kianan kamina uisa upí ñu  
karana 'ati 'ai 'ë ismikatsi  
kian.
- 9 Mix kamina burro 'imainun  
caballosa 'itima 'ain,  
an ka uisakin kara kaia abi  
kuatima,  
usa 'ikë ka anun nikinkin  
nitsinakin buinati aín,

- kuëbínu mëxin tükërekaxun  
nikinkëx uisakin kara 'aia  
usaibi 'ia,  
usa 'ain ka bëtsiokin 'axun  
'uramamitisama 'ikën.
- 10 Uni 'atimakama an ka  
'aisamaira paë tani  
tëmëratí kaínti 'ikën,  
'aínbi ka axa ami katamëkë  
unikama 'itsaira  
nuibanan, 'akinia.
- 11 Nukën 'Ibumi kamina mënin  
sinánñushi unikama  
'imainun upí sinánñu  
unikama mitsux;  
jábë timëax kuëni  
sharákanti 'ain!

### Salmo 33

#### Dios an ñu unio 'ikë rabi kantati bana

- 1 Mitsux Nukën 'Ibun uni  
'aish kamina,  
jkuëni Nukën 'Ibumi kantati  
'ain!  
Uni upí sinan ñukama axa a  
rabi kantaia kuakë ax ka  
upí 'ikën.
- 2 Nukën 'Ibu kamina arpa  
mëëkë aín banabi tankin  
asabi ka kati 'ain  
'anan kamina manë  
sharikati a mëëkin rabiti  
'ain,
- 3 'ai kamina anun kantakëma  
kanta ió anúnribi,  
jkantai munuma banai  
kuëënkanti 'ain!
- 4 Nukën 'Ibun bana ax ka  
asérabi upíira 'ikën;

- usa 'ixun ka anbia unio  
ñukama upí 'inun ñuia.
- 5 Nukën 'Ibun ka aín bana  
kuati upiti tsókin upí ñu  
'akë uni nuibatia;  
jusokin ka an kamabi menu  
'ikë unikama nuibatia!
- 6 Diosan ka aín banan ishi  
naíkamë 'ëo uniokëxa,  
'anan ka bari 'uxë 'ispa  
akamaribi uniokëxa.
- 7 'Anan ka parúmpapa baka  
anubia  
'itinua timénun 'imiakëxa.
- 8 Nukën 'Ibu ax ka kamabi menu  
'ikë unin rabikë 'iti 'ikën;  
j'ianan ka kamabi unikama  
me kuainakëanu 'ikë  
atúnribi rabikë 'iti 'ikën!
- 9 An ka aín banakë anuinshia  
kamabi ñu uninun 'imiakëxa;  
'ianan ka ax usai ka 'iti 'ikë  
kikëbë ñukamax usaibi  
'iakëxa.
- 10 Nukën 'Ibun ka atun sinánkësa  
okían a rabikëma unikaman  
ñu 'ati kuëenkinma a 'atia  
sinánkë ñukama 'anun  
'amima,
- 11 'aínbi ka Nukën 'Ibun  
uisakin kara 'aisatania  
usakinbi ñu 'akin ax  
kikësabi oia 'inun 'imia.
- 12 Diosan unikamax ka aín 'ibua  
Dios 'ain kuëenkë 'iti 'ikën,  
atux ka Diosan kaískë 'ikën.
- 13 Nukën 'Ibun ka naínuxunbi  
iskin  
kamabi unikama 'unania;  
14 'anan ka uinu kara ax 'ia  
anuxunbi

- ënë menu tsókë unikama  
'unania;
- 15 an ka uni sinánñu 'inun  
uniokëxa usa 'ixun ka  
uisakin sinánkin kara unin  
ñu 'aia akamabi 'unania.
- 16 Uinu 'ikë 'apuxi ka aín suntáru  
'itsaira 'aínbi iétima,  
'ianan ka aín këru unixi aín  
kushínbi iétima;
- 17 caballokaman ka uibi  
iémitima 'ikën;  
atux kushiira 'ixunbi ka uibi  
iémitima 'ikën.
- 18 'Aínbi ka Nukën 'Ibun axa ami  
katamëkëkama 'imainun  
asérabi a nuibakë unikama  
an ka nu nuibati 'ikë  
kixun 'unania,
- 19 anun numi 'iti barin a piti  
'aíma 'aínbi numin  
bamanun ëntima 'ikën.
- 20 Nukamax kananuna Nukën  
'Ibumi katamëtin;  
jan ka nu 'akianan bërúai!
- 21 Nukamax kananuna nun nuitu  
chuámarua tani kuëenin;  
nun kananuna aín anëmi  
sinanin.
- 22 j'Usa 'ain kamina mix Nun  
'Ibu 'ixun, nu nuibakin  
'akinti 'ain,  
nun 'akinun mi kakësabiokin  
kamina nu 'akinti 'ain!

### Salmo 34

#### Nukën 'Ibun ka aín unikama nuibatia

- 1 'Ën kana Nukën 'Ibu kamabi  
nëtë,

- 1 ɛnkima rabiti 'ain.  
 2 'Èx kana Nukèn 'Ibumi  
    'itsaira sinani kuèènin;  
    jusa 'ain ka unikama sinan  
    mèninshi atux 'èbè a kuati  
    kuèènti 'ikèn!  
 3 Usa 'ain kananuna  
    kamaxunbi  
    an 'a ñukama sinánkin  
    Diosan anè rabiti 'ain.  
 4 Usa 'ain. Ka 'èn 'akinun  
    ñukákèxun kuankin 'è  
    'akiankèxa,  
    'ianan ka 'èn rakuèkèkama  
    nèténun 'imiakèxa.  
 5 Uikaman kara a isia ax ka  
    'itsaira kuèèni,  
    uínsaranbi rabinkèma 'iti  
    'ikèn.  
 6 'Èx ñuñuma unisa 'ixunmabi  
    kana Nukèn 'Ibun 'akinun  
    kixun ñukákèn,  
    ñukákèxun kuakin  
    'akinkin ka 'èx tèmèrai  
    masánuitutia iskin 'è  
    'akiankèxa.  
 7 Nukèn 'Ibun ka aín ángel  
    kushiira an rabikè  
    unikama  
    'akianan iéminun kixun  
    xutia.  
 8 Usa 'ain kamina Nukèn 'Ibu  
    asérabi kara mitsu 'akinia  
    kixun isnuxun tanti 'ain.  
    jUix kara ami katamétia a  
    unix ka chuámarua tani  
    ami katamèti kuèènia!  
 9 Nukèn 'Ibu kamina an  
    kaískè 'ixun mitsun an  
    kuèènkèsabi okin 'axunti  
    'ain.

- Usa 'ain ka an rabikè  
    unikamax ñuñuma 'itima  
    'ikèn.  
 10 Ñuñuira unikama ax ka  
    ñuñuma 'i tikiti 'ikèn, usai  
    'i ka ñuñu 'aínbi 'itsaira  
    pananti 'ikèn,  
    'aínbi ka axa Nukèn 'Ibumi  
    katamèkè unikamax  
    uínsaranbi upí ñuñumama  
    'itima 'ikèn.  
 11 'Èn nuibakè 'èn xukéantu  
    èsokin mitsu kamainun  
    kamina kuati 'ain:  
    'èn kana uisakin kara Nukèn  
    'Ibu rabiti 'ikè a mitsu  
    'unánmiti 'ain.  
 12 ¿'Itsa baritia 'imi kaina  
    tsótisa tanin?  
    ¿Uisai unin kuanun 'atimai  
    banaima kaina upiti tsoiti  
    'ain?  
 13 Míx 'atimai banakè a  
    kamina ènti 'ain,  
    usai 'i kamina min kuèbitan  
    kèméi banatima 'ain.  
 14 Ñu 'atima 'ati a ènkin  
    kamina ñu upí 'ati 'ain;  
    usakin 'akin kamina ami  
    'akè ñu a ènkinma abi 'ati  
    'ain.  
 15 Nukèn 'Ibun ka aín bana  
    'akè unikama bèruaia,  
    usa 'ixun ka an ñukákèxun  
    kuakin 'akinia.  
 16 'Aínbi ka Nukèn 'Ibun uni  
    'atima sinánñukama ènè  
    menua sinántèkèntima okin  
    nètémítiti 'ikèn.  
 17 Nukèn 'Ibun ka uni  
    upí sinánñu kaman

- ñukákëxun kuation, kuakin  
ka  
masá nuitutiabi 'akinia.  
18 Nukën 'Ibu ax ka kamabi  
nëtën 'urama 'ikën,  
usa 'ixun ka uikaman  
kara ñu 'atima 'aibi ami  
sinanatia a 'akinti 'ikën.  
19 Uni upí sinánñu kama ax ka  
'itsaira tëmëraia,  
usai 'iabi ka a ñukamanua  
Nukën 'Ibun 'akian.  
20 Usakin Diosan aín xokama  
bërúankëx ka  
ain xo achúshibi tëkëtima  
'ikën.  
21 An 'atima ñu 'ati sinánxun  
'akë unikama ax ka  
anunbi tëmërai ñuia;  
'imainun ka uni upí sinánñu  
ax 'atimokin tëmëramikë  
'iti 'ikën.  
22 'Aínbi ka Nukën 'Ibun  
uikamax kara 'ain bana  
'ai ami katamëtia akama  
iémia;  
jusa 'ain ka a unikamax  
kastikankëma 'iti 'ikën!

### Salmo 37

#### Nukën 'Ibumi katamëti ñuikë bana

- 1 An 'atima ñu 'akë unikama  
rabanan nëëti kamina  
nishtima 'ain,  
'ianan kamina uni 'atima  
kaman ñu 'akëbëbi atumi  
nutsitima 'ain;  
2 atun 'akë ñu ax ka basi  
tëakëx chushikë;

- jusaribiti bënëtiishi 'ia!  
3 Nukën 'Ibumi katamëkin  
kamina upí ñuishi 'ati  
'ain,  
usai 'i kamina ënë menu  
tsóti Dios kuëenkësabi oi  
'iti 'ain.  
4 Nukën 'Ibu nuibakin kamina  
an kakësabiokin 'ati 'ain,  
usokinmi 'akëbëtan ka  
min ñukákësabi okin mi  
'axunti 'ikën.  
5 Mìn tsóti Nukën 'Ibun  
bërúanxunun kamina ami  
katamëti 'ain;  
usaími 'ia ka an mi 'akinti  
'ikën.  
6 Usai 'ikin mi 'aia kamabi  
unin min 'akë ñu iskë ax ka  
aséabi 'aish barin xamarukin  
pëkakë usaribi 'iti 'ikën.  
7 An 'akinun kiox bënëkinma  
kamina Nukën 'Ibun mi  
munu;  
'akimainun kaínti 'ain.  
Usai 'ikín kamina an ñu  
'atima 'akë unikaman,  
'akësokin ñu 'atima 'ati  
sinántima 'ain,  
atun ka ñu 'atima 'atishi  
sinania.  
8 Mìx nishkë a ëni kamina  
nishkësa 'itima 'ain;  
nishkë an ka nun  
sinánkëkama 'atima oia.  
9 An ñu 'atima 'atishi sinánkë  
unikamax ka a menuax  
chikínkë 'iti 'ikën,  
'aínbi ka axa Nukën 'Ibumi  
katamëkë unikaman a me  
biti 'ikën.

- 10 Ēnuax 'itsama baritia 'ikëbë  
ka an ñu 'atima 'akë  
unikama 'aíma 'iti 'ikën;  
usai 'ikë barikinbi ka  
uinuabi mēratëkëntima  
'ikën.
- 11 'Aínbi ka uni aín sinan  
mēninshi  
akamax kuni Diosan atu  
'inánti menu 'iti 'ikën,  
anuax ka ax 'ikēsamairai  
chuámarua tani kuënti  
'ikën.
- 12 An ñu 'atima 'akëira  
unikaman ka uisakin kara  
an ñu upí 'akë unikama  
'atima oti 'ikë kixun baria,  
usai 'ikin ka ami xuamati  
nishkin upiokinbi istisama  
tania.
- 13 Usai atux 'ikëbëbi ka Nukën  
'Ibu anúan atu 'atima oti  
nētë,  
ka 'urama kuatsinia kixun  
'unani atumi kuaia.
- 14 An ñu 'atimaira 'akë  
unikaman ka aín manë  
xëtokë bianan aín kanti  
kanukín  
anun uni sinan mēninñushi  
'aish,  
jupítax tsókë akama  
'akatsikixun bitsia!
- 15 'aínbi ka aín manë xëtokë  
anunbi abi tarókati 'iti  
'ikën,  
usai 'ikëbë ka aín kantikama  
ax tsasipakë 'iti 'ikën.
- 16 Uni upí sinánñu axa  
chukúmashi ñuñu 'ikëxbi  
ka,  
uni 'atimakamaxa ñuñu 'ikë  
usamaira 'ikën.
- 17 Nukën 'Ibun ka an 'atima ñu  
'akë unikama 'atima okin  
këñuanan,  
an ñu upí 'akë unikama  
'akinti 'ikën.
- 18 Nukën 'Ibun ka axa uisa  
ñu 'atimabi 'aíma tsókë  
unikama bërúaia,  
a unikama anu 'iti nētë ax  
ka uínsaranbi këñutima  
'ikën.
- 19 Usa 'ain ka anúan numi  
'iti nētë 'ikëbë, numin 'i  
rabinkësa 'ima,  
raírinëxa a piti ñuñuma  
'imainun, atun piti 'itsaira  
'iti 'ikën.
- 20 'Imainun ka ñu 'atima 'akë  
unikamax basi chushikë  
bimikëxa rëkirutankëx  
këñúké usaíshi 'iti 'ikën;  
usai ka axa Diosmi nishkë  
unikama 'iti 'ikën, 'ianan  
ka kuin tēxëkirui kuani  
nētékë usaribiti 'iti 'ikën.
- 21 Ñu 'atima 'akë unin ka  
'inantëkëñuxun bëtsi unin  
ñu bixunbi a kupín aín  
'ibu kupíoima;  
'aínbi ka uni upí sinánñu an  
kuni usakin 'akinma aín  
ñu bixun asérabi aín 'ibu  
'inántëkënia.
- 22 Uikamax kara Nukën 'Ibun  
upíokin sinánxunkë 'ikë  
akamax ka Nukën 'Ibun  
'inánti me anu 'iti 'ikën,  
'aínbi ka Nukën 'Ibun  
upíokin sinánxukëma



- unikama ax 'atima okin  
masókë 'iti 'ikën.
- 23 An ñu upíokin 'aia isi  
kuëenkin ka  
Nukën 'Ibun aín uni uisai  
kara tsóti 'ikë kixun  
'unánmia;
- 24 usakin 'akin ka uisa ñu  
'atima 'ai kara pakëtia  
usai 'iabi ka pakëkëmasa  
'itánun Nukën 'ibun  
'akinti 'ikën.
- 25 'Ëx kana bënë 'iakën, bërí  
kana 'ëx uni kaniakëkë  
'ain, 'aínbi kana  
uinsaranbi uni ñu 'atima  
'akëma kamaxa ñuñuma 'i  
tëmëraia isama 'ain.  
'Ianan kana aín bakë  
bëchikëkamaribi  
uínsaranbi bëtsi unikama  
aín piti ñukáti nitsia  
isama 'ain.
- 26 Usa 'ixun ka kamabi nètën  
nuibakin bëtsi aín ñu na  
'inántëkënun 'inania;  
usakin 'akëbë ka aín bakë  
bëchikëkama ax upíokin  
sinánxunkë 'ia.
- 27 Ñu 'atima 'akë ënkin kamina  
ñu upíshi 'ati 'ain,  
usakin 'ai kamina anu  
xëñibua 'aínbi tsóti  
nètënu 'iti 'ain.
- 28 Nukën 'Ibu Diosan ka upí  
ñuishi 'ati kuëenia.  
Usa 'ixun ka an ënkinma  
a rabikë aín unikama  
ëñima;  
'aínbi ka an ñu 'atimaira  
'akë unikama këñuia
- këñukin ka atun bakë  
bëchikë rëbúnkiñuma  
'inun 'imiti 'ikën.
- 29 An ñu upí 'akë unikama a ka  
Nukën 'Ibun nuibakin,  
me anua xëñibua 'aínbi tsóti  
'inánti 'ikën.
- 30 Uni upí sinánñu ax ka  
sinaínrax banaia;  
usa 'ain ka uni upí sinánñu  
ax asérami ñu 'anux  
këmëima banaia.
- 31 Aín Diosan bana 'unánkë ax  
ka aín nuitunëñbi sinánkë  
'ia,  
usakin 'ai ka juínsaranbi ñu  
'atima 'ati sinanima!
- 32 An ñu 'atima 'akë uni an ka  
an ñu upí 'akë uni a rëtëti  
sinánxun 'utunia;
- 33 Nukën 'Ibun ka usakian atun  
'anun ëntima 'ikën,  
'ianan ka usakin ka 'axa  
kixuan ñuitanun 'amitima  
'ikën.
- 34 Nukën 'Ibumi katamëkë 'ixun  
kamina, min aín bana  
kikësa okinshi 'axunti 'ain,  
usakin 'aia ka anua aín bana  
'akë unikama 'itia 'akë  
anu mi 'imiti 'ikën,  
¡Anuxun kamina min  
bërúnbi an 'atima ñuishi  
'ati sinánkë unikama  
Nukën 'Ibun masókin  
'atima oia isti 'ain!
- 35 'Ën kana an 'atima  
ñuira 'akë unikamaxa,  
rabiakakë axa uni 'itsañu  
'aish í pëi bunkuira iskë  
usai 'ia isakën;

- 36 'aínbi ka bënétishi nētéakëxa;  
usai 'ia barikinbi kana anua  
'ikë anuabi mërama 'ain.
- 37 An ñu 'atima 'akëma  
'imainun uisa ñu 'atima  
'aímabi tsókë uni akamina  
isti 'ain:  
Usa 'ain ka a unin ñu 'akëx  
upí iskë 'iti 'ikën.
- 38 'Aínbi ka an bana kuaisama-  
tankë unikamax masókin  
achirabi bërutanuma  
këñúkë 'iti 'ikën;  
usakin 'akëx ka an ñu 'atima  
'akë unikama aín tsótinëx  
amiribishi unitëkënim  
'atima okë 'iti 'ikën.
- 39 Usa 'ain ka uni upíkama ax  
Nukën 'Ibun 'akinkë 'ikën,  
usa 'ikë ka anúan tëmërati  
nëtékama 'ikëbëtan 'akinia,
- 40 Usa 'ikë ka Nukën 'Ibun  
'akinkin iémia.  
Usakin 'anan ka an ñu 'atima  
'akë unikaman 'atima oisa  
taniabi bërúaiia;  
usakin ka an 'akinun  
barikëxun axa ami  
katamëké unikama 'aia.

### Salmo 40

'Ën kana mixmi 'ën Dios 'ain  
min kuëenkësokinshi mi  
'axunti kuëënin  
(Sal 70.1-5)

- 1 Uisai karana Nukën 'Ibumi  
katamëti 'ai kixun kana  
'ën 'unánkën,  
usa 'ain ka munuma banakin  
'ën kakëxun kuakëxa;

- 2 an ka 'ë uisa ñu inuti kara  
bamati,  
'ikëbi 'ë iémiakëxa;  
usakin 'akin ka chua menu  
nanékësa 'aish bamakësa  
'ikëbi 'ë 'akiankëxa.  
Usakin 'akëx kana anuax  
uisaibi 'itëkënuuxma  
maparanu nikësa 'inun  
'ëx 'ikë ñukama inuti  
mëniokakën.
- 3 Usa 'ikë ka anun a rabi  
kantanun 'ë Diosan kanta  
ió achúshi 'unánmiakëxa.  
Usai 'ëx 'ia isi ka 'itsaira  
unix kuëëni chikirakëkin  
Nukën 'Ibu rabiakëxa.
- 4 ;Chuámarua ka uni ax Nukën  
'Ibumi katamëké ax 'iti 'ikën,  
usa 'ain ka sinánñumasa  
'aish rabinimaishi banakë  
unikama,  
'ianan an Diosmabi bëtsi  
ñu rabikë a unikaman  
kakësoi 'itima 'ikën!
- 5 Nukën 'Ibu, 'itsaira ka min  
'akë ñu upíbu 'ikën  
'imainun ka numi 'axunkë  
ñukama axribi 'itsaira  
'itsa 'ikën.  
;Usa 'ain ka misaribi bëtsi  
Dios 'aíma 'ikën!  
'Ën kana a ñukama ñuiti 'ain,  
'aínbi ka 'itsaira 'aish  
tupubiankin ñuitisamaira  
'ikën.
- 6 Min kamina bëráma 'asa okin  
ñuina rëxun xaronan ñu bimi  
bixun 'inántëkënti a  
kuëëniman; usa 'ixun  
kamina 'aímai këñutanun

- ñuina xaroxunkin  
 'uchakëkama mënfonun  
 ñu 'inaínshiti kuëëniman.  
 Usa 'ixun kamina min bana  
 kikësokinshi nun 'axunti  
 kuëënin.
- 7 Usa 'ain kana 'ën mi kan:  
 Ènu kana 'ëx 'ain,  
 usai ka 'ë ñuikin kirikanu  
 kuëëno bana ax kia.
- 8 'Èn 'Ibu Dios 'ëx kana mix  
 kikësabiokin 'ai 'itsaira  
 kuëënin;  
 ¡usa 'ain kana min  
 'unánmikë banakama  
 manukinma 'ën  
 nuitunënbi sinanin!
- 9 Min unikama 'itsaira  
 nëbétsinuxun kana;  
 usaími kikë bana unëkima  
 atu ñuixuan.  
 ¡Mínbi kamina upiókin  
 'unanin 'Èn 'Ibu Dios.  
 'Èn kana unékinma min  
 bana ñuian!
- 10 'Èn kana min unikama  
 kaímama 'ikima min 'akë  
 ñukama ñuikin kan;  
 usakin ñuixuanan kana  
 Diosan ka nuibakin nu  
 iémiti 'ikë kixun kamabi  
 menu 'ikë unikama kakën.  
 Uisaxunbi kana mix kamina  
 asérabi nuibanairakë 'ai  
 kixun 'aisamaira 'ikëbi min  
 unikama kaima 'iama 'ain.
- 11 Mix 'ën 'Ibu 'ixun kamina,  
 'ë nuibakin ëntima 'ain;  
 min kamina ënkinma  
 asérabi 'ë bërúanti 'ain.
- 12 'Èx 'aisamaira ñu 'inúkë ax ka

- ñuikinbi sënëoinsamaira  
 'ikën.  
 Usa 'ixun ka anbi 'ë upiókin  
 istisama oia;  
 ¡usa 'ixun ka 'ën ñu 'atima  
 'akë anbi 'ë sinánñuma  
 unisa 'inun 'imia!  
 Usa 'aish ka 'ën maxkánu  
 'ikë bubëtan sënémaira  
 'ixun uisa ñubi 'aisama  
 okin bëtsi sinánmia.
- 13 'Èn 'Ibu Dios 'ë kamina  
 iémiti 'ain, 'ianan kamina  
 bënëékin, ¡'ishtun 'ë 'akinti  
 'ain!
- 14 ¡An 'ë 'aisatankë unikama  
 kamina bëtsi bëtsi ñu  
 inútanun 'imiti 'ain!  
 ¡Usokëx ka rabinkësa 'aish  
 an 'ë 'aisama oti kuëënkë  
 unikamax kuantu 'ikën!
- 15 ¡Usai 'i ka rabinkiani axa  
 'ëmi kuaikë unikama abáti  
 'ikën!
- 16 'Aínbi ka an mi 'akinun  
 barikë unikamax 'itsaira  
 kuëënti 'ikën;  
 uikamax kara min iémikin  
 'akinti kuëënia: “¡Akamax  
 ka: ënima Nukën 'Ibu ax  
 ka chaira 'ikë kiaux kiti  
 'ikën!”
- 17 Usa 'ain kamina 'ëx  
 ñuumarasa tani bënëti  
 tëmëraia mix Dios 'ixun 'ë  
 manutima 'ain.  
 Mix kamina an 'ë 'akianan  
 chuámarua 'inun 'imikë  
 a 'ain;  
 ¡'akintimi panakima kamina  
 bënëékin 'ë 'akinti 'ain!

## Salmo 42

Diosan 'è 'akinti kana  
kuëënin kikë bana

(An ënë bana kuëëno  
uni an ka bëtsi menu  
buankan 'ixun cuarenta  
y dos 'imainun cuarenta  
y tresnu kikë bana ënë  
kuëënokëxa.)

- <sup>1</sup> Chaxun shimaxun 'umpax  
xëanuxun barikësa,  
usaribi okin kana 'ën Dios  
'ixunmi 'è 'akinun mi  
barin.
- <sup>2</sup> Mix kamina Dios an uni  
tsónun 'imikë a 'ain,  
usa 'ain kana 'ën mishi  
barin.  
¿Uinsaran karana anuxun  
mi rabiti xubunuxun mi  
rabi kuantëkënti 'ain?
- <sup>3</sup> Nëtë 'imainun imébi kana 'ën  
piti pikësa 'inun tëmërai  
bëunan mëskúkin ëniman,  
usai 'ia ka kamabi nëtën  
unikaman 'ëmi kuaikin 'è  
ñukatia:  
“¿Uinu kara min Dios ax  
'ik?”
- <sup>4</sup> Kixuan 'è kakan a sinani  
kana  
uínsaran karana 'èx tëmëra  
akama sinani anun 'itsaira  
masánuituti paëin;  
'ianan kana anuxun mi  
rabiti xubu Jerusalénnu  
'ikë anuax unikamabë  
kuanxun fiesta 'akin mi  
rabi munuma kuëëni 'ia  
akama sinanin.

¡Ax ka fiesta chaiira nun  
'akë 'iakëxa!

- <sup>5</sup> ¿Uisa kupín karana Diosmi  
sinanatëkëni kana 'aima  
kiax kiti 'ain?  
¿Uisa kupín karana 'itsaira  
sinánti 'ain?  
'Ën 'Ibu Dios ashi kana an 'è  
'akinun rabiti 'ain.  
¡An ka 'ën Dios 'ixun 'è iémia!
- <sup>6</sup> 'Ën kana 'itsaira kana 'atima  
'ai kixun sinanin usa 'ain  
kana año ñubi 'aisama  
tanin.  
Usa 'ain kana Jordán kakë  
baka anu 'ikë me anuxun  
'anan,  
Hermón kakë aín bashi  
'imainun Mísar anuxun mi  
'itsaira sinani kuantí 'ain.
- <sup>7</sup> Usa 'ain kana 'ën bëri  
aín bashinuaxa 'umpax  
kushiira 'ibúti maparami  
chakabuti banakë an ka 'è  
bakami kimikësa tamia;  
xukirui kushiira banaia  
kuakësa, usaribi kana  
'ëmi tëmëramikëxun tanin.
- <sup>8</sup> Usai 'iabi ka nëtën Nukën  
'Ibun 'è nuibakin 'akinia,  
'ianan kana iméribi  
ënimaira ami kantain  
usai 'ikin abë banakin kana  
'ën Dios an 'è tsónun  
bëruánkë a ñukatin.
- <sup>9</sup> 'Ën kana Dios an nuibakin 'è  
'akinkë, a ësökín kati 'ain.  
“¿Uisa kupín kaina 'ëmi  
manuan?  
¿Uisa kupín karana axa 'ëmi  
nishkë unikaman 'atima

- okëx masá nuitukë 'aish  
niti 'ain?"
- <sup>10</sup> Axa 'ëmi nishkë unikamax 'ë  
ñui banakë kuakë anunbi  
kana 'ën namikama  
paëkësa tani atsan,  
usai 'ia ka panakimaira  
kamabi nëtën atun 'ë  
ñukatia.  
“¿Uinu kara min Dios ax 'ik?”
- <sup>11</sup> ¿Uisa kupín karana sinanati  
kana 'aima kiox kiti 'ain?  
¿Uisa kupín karana 'itsaira  
sinánti 'ain?  
'Ën 'Ibu Dios ashi kana an 'ë  
'akinun rabiti 'ain.  
¡An ka 'ën Dios 'ixun 'ë  
iémia!

### Salmo 43

- <sup>1</sup> 'Ën 'Ibu Dios 'ë 'akinkin  
kamina;  
¡bëtsi unikama 'ën 'akësa  
'ikëa 'unánkanun 'ati 'ain!  
¡akin kamina këmë unikama  
'imainun ñu 'atimashi 'akë  
unikamanua 'ë iémiti 'ain,
- <sup>2</sup> mix kamina 'ën Dios 'ianan  
an 'ë 'akinkë a 'ain!  
¿Uisa kupín kaina mi 'ura  
'inun 'ë 'imin?  
¿Uisa kupín karana masá  
nuitukë nianan,  
axa 'ëmi nishkë unikaman  
'atima okë 'iti 'ain?
- <sup>3</sup> Min kamina min kushi an  
tirísa;  
'ixuan aín bashi upí kakë  
anu buánan,  
anuxun mi rabiti xubu,

- anu kuanun 'ë 'imiti 'ain.  
<sup>4</sup> 'Imikëxun kana anuxun mi  
ñuina xaroxunti 'akë a  
'urama oti 'ain 'ën 'Ibu  
Dios,  
anuxun kana mi rabikin  
'itsaira kuëenkin,  
arpa mëekin mi rabiti 'ain  
'ën 'Ibu Dios,  
usa 'ixun kamina 'itsaira  
kuëenun 'ë 'imiti 'ai 'Ën  
'Ibu Dios.
- <sup>5</sup> ¿Uisa kupín karana sinanati  
kana 'aima kiox kiti 'ain?  
¿Uisa kupín karana 'itsaira  
sinánti 'ain?  
'Ën 'Ibu Dios ashi kana an 'ë  
'akinun rabiti 'ain.  
¡An ka 'ën Dios 'ixun 'ë  
'akinti 'ikën!

### Salmo 46

- Nun 'Ibu Dios ax ka nu  
'akini nubë 'ia kikë bana**
- <sup>1</sup> Nukën 'Ibu Dios ax ka  
an nu kushionan ami  
katamëkëxun 'akinkë  
'ikën,  
usa 'ixun ka uínsaran  
karanuna 'aisama ñu inuti  
anuabi nu 'akinia.
- <sup>2</sup> Usa 'ain kanaanuna me shaí  
kikin,  
parúmpapa nëminnu ain  
bashikama nanémainun,
- <sup>3</sup> nëtétimaira parúmpapa  
kushiira ain bëchunkë,  
xukirukëbë ain bashikama  
shaíkikëbëbi rakuétima  
'ain.

- 4 Achúshi baka xobutia  
aín panakakama 'ikësa  
usaribiti ka  
anua 'ikë Diosan ëma  
Jerusalén kakë ax  
ëmakamasama upíira  
'ikën.
- 5 Usa 'ain ka a nëbétsinbi  
'ixun Diosan aín ëma  
bëruánti 'ikën.  
Anuxun ka Diosanbi  
nëtë pëkarakuatsinia  
xabakuatsinun 'imiti 'ikën.
- 6 Uinsaran kara Diosan bëtsi  
bëtsi menu 'ikë uni aín  
bana kuanun 'imia anun  
ka  
ratuti bëtsi ëmanu 'ikë  
'apukama me shaíkikë  
anunbi rakuéti 'ikën.
- 7 ¡Nukën 'Ibu kamabi  
kushiñuira ax ka  
nukamabë 'ikën!  
¡Jacobnën rabia Dios ax ka  
aminu katamëkë 'ikën!
- 8 Rikuatsinxun kamina  
ñukama chaiirabu,  
kamabi menu Nukën 'Ibun  
'akëkama a isí uti 'ain:
- 9 an ka kamabi menu 'ikë  
unikama 'akánantëkënia,  
anuishí sënënmikin aín  
manë pará 'ianan aín  
piakama 'imainun,  
anuaxa 'akanankë  
caballonën nirinkë manë  
'akë akama mënionun  
'amia.
- 10 ¡Usakín 'amikëxun ka!  
“¡'Ëx kana Dios 'ai kixun  
'unánkanti 'ikën,

- kamabi menu 'ikë unikama  
manámi kana 'ëx 'ain!  
¡'Ëx kana kamabi me  
manánmira 'ain!”
- 11 ¡Kamabi kushiñu Nukën  
'Ibu ax ka nubë 'ikën!  
¡Usa 'aish ka Jacobnën Dios  
'ia 'aish nun Diosribi 'ixun  
nu 'akinia!

### Salmo 47

#### Dios ax ka kamabi unikaman 'apúira 'apu 'ikën

- 1 ¡Kamabi menu 'ikë  
unikamax ka kuëëni,  
mëtashkikan!  
¡'Ianan ka a rabi kuëënkín  
munuma sharákin Dios  
rabikan!
- 2 Nun 'Ibu ax ka kushiira 'aish  
manámi 'ikë 'aish ami  
rakuéti 'ikën;  
ax ka 'apúira 'apu 'aish  
kamabi menu 'ikën,
- 3 an ka kamabi ëmanu 'ikë  
'ianan bëtsi mekamanua  
'ikë unikama nux  
atusamaira 'ikë,  
nu mea 'inun 'imiakëxa,
- 4 an ka anu nux 'iti me nu  
kaisxuankëxa nun  
chaitiokë Jacob nuibakín  
kásabiokín, usa 'ain  
kananuna 'itsaira  
kuëënin.
- 5 ¡Nukën 'Ibu Dios ax ka anua  
'ikë anu kuaruaxa,  
kuëëni sharákin carnero  
mancha banokëbë ka  
kuaruakëxa!

- 6 ¡Usa 'ain kananuna Dios  
anun kantati anun ami  
kantakin rabiti 'ain!  
¡A mi kantakin kananuna ax  
'apuirá 'ikë a rabiti 'ain!
- 7 ¡Dios ax ka ami upiti  
kantakin rabiti 'ikën!  
ax ka kamabi menu 'ikë  
unikaman 'apu 'ikën.
- 8 ¡Dios ax ka kamabi menu  
'ikë unikaman 'apuirá  
'apu 'ikën!  
¡Usa 'aish ka Dios ax anua  
tsókë upíira anu tsótaxa!
- 9 Usa 'ain ka kamabi menu  
'ikë 'apukama 'imainun,  
Diosan aín uni 'iti  
kaisa Abrahámën  
rëbúnkikamabë timéti 'ikën,
- 10 usa 'ain ka kamabi menu  
'ikë 'apukaman ainan  
'ixun aín unikamabëtan  
Dios rabiti 'ikën.  
¡Ax ka ñukama manánmi  
'ikën!

### Salmo 51

#### Davidtan aín 'uchakë mënióxunun Dios ñuká bana

- 1 Mix nuibanairakë, Dios 'ixun  
kamina 'ë nuibati 'ain;  
usa 'ixun kamina 'ë  
nuibakin 'ën 'atimakin  
sinánxun ñu 'akëkama a 'ë  
tërënxunti 'ain.
- 2 ¡'Ën ñu 'atima 'akë a kamina  
'ë mënióxunti 'ain!  
¡Anan kamina 'ëx  
'uchakëkama a 'ë  
tërënxunti 'ain!

- 3 'Ën kana aséjabi upíokin  
'unanin min kakësokin  
'aíma kana 'atima ñu 'ai  
'ucha kixun;  
'ën 'uchakë ax ka 'ën  
sinánnuax nëtétisama  
tania.
- 4 Mimi kana 'ëx 'uchan,  
usai 'ikin kana, a 'aia min  
uni 'aisama iskë ñu a 'an,  
usa 'ain ka min bana usakin  
ñu 'akatsimi kikë ax  
aséjabi 'ikën.
- 5 Aséjabi kana 'ën titan  
tuakëxbi 'uchañu 'iakën;  
usa 'aish kana 'ën titan puku  
'ukëmëu 'aishi 'uchañu  
'iakën.
- 6 Mìn kamina aséjabi sinan  
mëniñnushi uni a nuibatin,  
usa 'ixun kamina 'ëribi  
sinan ñuira 'inun 'imia.
- 7 'Ën 'uchakë 'ë mënióxunkin  
hisopo kakë i pëñan anun  
'akësa 'itánun 'ë mëniokëx  
kana upíira bërúti 'ain;  
usokin min 'ë mëniokëx kana  
matsi uxua iskësamaira  
'imainun xapu tunkikë  
usaribi 'inun 'ën nuitu  
mëniokati upíira 'iti 'ain.
- 8 'Ë kamina 'itsaira tëmëranun  
'imian;  
'aínbi kamina amiribishi  
'itsaira kuëënun 'ë 'imi  
tëkënti 'ain.
- 9 'Ën 'uchakëkama a kamina  
istima 'ain  
'ianan kamina 'ën ñu 'atima  
'ati sinánkë a 'ë tërënxunti  
'ain.

- 10 'Ēn 'Ibu Dios, 'atima ñu  
sinánxuma 'anun kamina  
'ë ëntima 'ain.  
¡Ianan kamina upí sinánñu  
bërí 'inun 'ë 'imiti 'ain!
- 11 Minan 'ikë kamina 'ë ëntima  
'ain,  
'ianan kamina 'ënua 'ikë  
min bëru ñunshin 'ë  
bikuantima 'ain.
- 12 Min kamina amiribishi  
kuëntëkënun 'ë 'imiti 'ain;  
min bëru ñunshin an ka uisa  
kara mix kikësabi oi 'iti  
min bana a 'ë 'unamiti  
'ikën,
- 13 usakin 'akëxun kana 'ën uni  
'atimakama a atun ñu  
'atima 'akë ëni kara uisai  
tsóti 'ikë kixun 'unánmiti  
'ain,  
'imainun ka usakin  
'ën 'unánmikëx uni  
'uchañukama ax minan  
'iti 'ikën.
- 14 An uni 'akë uni 'isataniabi  
kamina a sinánua 'ë  
mëníoti 'ain,  
mix kamina 'ën Dios an 'ë  
iëmiti a 'ain,  
usa 'ixun kana mi rabi  
kantakin mix kamina usa  
'ai kixun 'ën ñuiti 'ain.
- 15 'Ēn 'Ibu min kamina 'ën  
kuëbitan bananun 'ë 'imiti  
'ain,  
usakin 'ën kuëbí 'akëxun  
kana anun upiti kantakin  
mi rabiti 'ain.
- 16 'Ēn kana kuëñkin ñuina  
rëtankëxun mi xaroxuanan

a mi 'inaínshiti ñukama  
mi 'inánti 'ain,  
'aínbi kamina min a ñukama  
'axunti kuëëniman.

- 17 Mi ñuina 'axun xaroxunkë  
usamaira ka uin kara Dios  
'ikë;  
¡asérabi ain nuitunënbi mi  
sinania ax 'ikën usa 'ikë  
kamina timaiman!  
(Ēnë banax ka Davidtan  
kuëñëomasa 'ikën, usa  
'aish ka bëtsi menu buánkë  
'ixuan uni itsin kuëñëosa  
'ikën Jerusalén ëma anun  
këñëkë këñë rurupa 'ain.)
- 18 Mìn kamina upíokin Sión  
kakë me a 'ati 'ain 'anan  
kamina Jerusalén;  
ëma anun këñëara a  
birutëkënun 'amiti 'ain.
- 19 Usa 'ain kamina mi  
'inaínshiti ñukama a  
'imainun,  
'aímai këñutanun mi ñuina  
xaroxunkë a upí isti 'ain,  
usokin 'akëbëtan ka  
anuxun ñuina xaroxunti  
'akë anxun mi ñuina  
xaroxunkanti 'ikën.

### Salmo 63

**Diosmi katamëti ka  
uni kuëënti 'ikën.**

*(Ēnëx ka Davidtan  
kuëñëo bana 'ikën)*

- 1 ¡'Ēn 'Ibu Dios, mix kamina  
'ën Dios 'ain!  
Usa 'ikë kana mi 'aisabi  
tankin kuëñkin barin: 'ën



- kana shimaxun 'umpax  
barikë usaribi okin mi  
barin;  
usa 'ain ka anu 'umpax  
'ikëma me ëskikë usa 'ën  
nán 'ikën.
- <sup>2</sup> 'Ën kana anumi 'ikë min  
xubunua mi istisa tanin,  
anua mi iskësaribi okin  
kana min kushinmi ñu  
chairabu 'akë a istisa  
tanin,
- <sup>3</sup> jminmi 'ë nuibakë ax ka ën  
tsókë usamaira 'ikën!  
Usa 'ikë kana 'ën kuëbitanbi  
mi rabiti 'ain;
- <sup>4</sup> 'anan kana 'ëx anun tsókë  
nëtëkama anun mi rabiti  
'ain,  
'usakin 'akin kana 'ën  
mëkën manámiokin mi  
ñukáti 'ain.
- <sup>5</sup> Usai 'itsaira kuëëni kana,  
unin timéxun piti upíokin  
'axun pianan xëai  
kuëënkësa usaribiti 'ikin,  
'ën kuëbitanbi kuëënkín mi  
rabiti 'ain.
- <sup>6</sup> Ñantan 'uxi rakábukë  
anuxunbi kana mimi  
sinanin;
- <sup>7</sup> mix kamina an 'ë 'akinkë a  
'ain.  
jUsa 'ain kana ñuina  
pëchiñunën 'ain tuá  
bëruankin 'ain pëchi tëmú  
'akësa usaribi okinmi  
'akëx chuámarua tani min  
bëruankëx kuëënin!
- <sup>8</sup> 'Ën namikama ax ka asérami  
minan 'ikën;

- usa 'ain kamina min mëkën  
mëkeu anun kushiokin  
tuinkësa okin 'ë ëntima  
'ain.
- <sup>9</sup> An 'ë 'aisa tankë unikama ax  
ka,  
me kini 'ukëmëu nipakëkë  
'iti 'ikën;
- <sup>10</sup> jatux ka manë xëtokën 'akëx  
bamakë 'iti 'ikën,  
usakin 'akë ka an nami paxa  
pikë raëkëma shórapána  
akaman aín nami piti  
'ikën!
- <sup>11</sup> 'aínbi kana 'apu 'aish  
Diosmi kuëënti 'ain;  
usa 'ain ka uikamax kara ami  
sinania ax sinanatëkentima  
oi ami kantati 'ikën,  
'aínbi ka axa këmëishi  
banakë unikama uisaibi  
banatima okin aín kuëbí  
xëpúti 'ikën.

### Salmo 65

#### Dios ax ka rabiti 'ikën

- <sup>1</sup> 'Ën 'Ibu Dios Jerusalén  
menu 'ikë,  
jmix kamina ashi rabiti a  
'ain!,  
jmin kamina ñu asérami  
'axunuxun katankëxun  
'axunti a kuëënin,
- <sup>2</sup> min kamina mibë banakin  
nun ñukákëxun kuatin!  
Kamabi menu 'ikë unin ka  
mibë banakin mi rabiti  
'ikën.
- <sup>3</sup> Nun ñu 'atima 'akëkama an  
ka nu 'atimakin sinánmia,

- 'aínbi kamina min  
nun 'uchakama nu  
mëníoxunin.
- 4 Chuámarua ka ami kaískë  
unikama an tania  
usa 'ikë kamina mi 'urama  
'inun atu 'imin,  
'imikëx ka anuxun mi rabiti  
xubunu 'ia.  
¡Usa 'ain ka min xubunu 'ikë  
unikama min bana 'aiami  
'akinkëx piti pi anun  
puchacë usa 'ikën!
- 5 Nukën 'Ibu Dios an nu  
ëñëmikë,  
min kamina mi 'urama  
'inuxa atux min xubunu  
'inun 'imin, usa 'ixun  
kamina ñu chabu  
'imainun upíira 'axunkin  
mishi rabinun nu 'imin;  
ënë menu tsókë kamabi  
unikama 'imainun,  
parúmpapa 'ukëmanan  
tsókë unikama ax ka mimi  
katamëtia;
- 6 min kamina mix kushiira  
'ixun,  
anubia 'itinu bashikama  
uniokën.
- 7 Min kamina parúmpapa  
bëchuni xukiruiabi aín  
bëchunkë nëtémianan,  
ëmakamanu 'ikë unikama  
axa nishanani tsuákiruiabi  
bukubunun 'imin;
- 8 usakin mi 'akëbë ka anua  
me sënënakëa anua tsókë  
unikama axribi,  
min 'á ñu upíbu isi rakuéti  
'ikën;

- usai 'ibi ka munuma sharati  
kuënkëni,  
amiaxa bari urukë a  
'imainun amia bari  
kuabúkë amiaxi kuëënti  
'ikën.
- 9 Min kamina mekama  
bëruáankin;  
ñu 'apákëkama kómiti  
'uíribi 'ibúnun 'imin;  
usakin 'akëxuan xëxatan  
'ëkin mapurukin  
chabókëxun ka ñu  
'apákëkaman tuaia.  
¡Usakin 'akin kamina me  
anu ñu 'apátisabi 'inua  
mëníokanun 'imin!
- 10 Min kamina anu ñu 'apáti me  
tukakin buinakë a 'aimaia  
chabátanun 'imianan,  
aín tukakëkamaxa 'aímai  
tsënkitanun 'imin;  
usakinmi 'itsaira 'uí  
'ibúmikin chabókëx me  
'aímai tsënkikëbë ka ñu  
'apákëx 'itsaira aín bimi  
'inun bimia,  
usakin 'akin kamina unin  
ñu 'apákë 'itsaira biminun  
upíokin sinánxunin.
- 11 Min upíokin sinánxunkëx ka  
bari këñúkëbëtan 'apákë  
ñu ax 'itsaira aín bimi 'ia,  
usai ka minmi usai 'iti  
sinánxunkë me anuax 'ia;
- 12 usai 'ikëbë ka anu uni  
'ikëma menua 'ikë basi ax  
paxaira 'imainun,  
matá upírabu 'inun  
aín bashikamanu 'ikë  
pëikamaribi mëníokatia;

13 usai 'imainun ka anu pasto  
 'axunkë anu 'aisamaira  
 oveja 'ia,  
 'imainun ka me sapankama  
 anuribi 'aisamaira trigo  
 'apákë 'ia;  
 ¿usai 'ikëbë ka kamabi uni  
 kuëëni kantai sharatia!

### Salmo 66

Diosan aín kushin unió  
 ñukama ax ka upíira upí 'ikën

1 Kuëëni ka Diosmi kantakan,  
 kamabi menu 'ikë unikama;  
 2 Dios rabi kantakin ka aín  
 anë rabikan;  
 usai 'ikin ka an 'a ñukama  
 chaiirabu 'a sinánkin  
 rabikanti 'ikën.  
 3 Rabikin kamina Dios kati 'ain:  
 ¿Mín unio ñukamax ka  
 upíirabu 'ikën.  
 Mix kushiira 'ixun kamina,  
 axa mimi nishkë unikama  
 rakuétia menu nipakëkësa  
 'itánun 'imin;  
 4 kamabi menu 'ikë unikaman  
 ka kuëënkín mi rabia,  
 'ianan ka kantakin min anë  
 ñuikin mi rabia!  
 5 Diosan chaiirabu ñu 'akë  
 kamina isi ukanti 'ain,  
 aín unikama 'axunkin upíira  
 ñu 'akë a kamina iskanti  
 'ain:  
 6 an ka parúmpapa me ishi  
 rakati ësquinun 'imiakëxa,  
 usakin 'imikëbë ka anun  
 nun chaiti okëkama  
 nikiani sikarakëkankëxa;

¿usa 'ain kananuna  
 akama sinani Dios rabi  
 kuëënkanti 'ain!

7 Usa 'ain ka ax kushiira 'ixun  
 xëñibua 'aínbi;  
 kamabi nëtënu 'ikë aín  
 unikama isia;  
 an ka ñunshinakëkin bana  
 kuakëma unikama ami  
 nishkima,  
 tsuákirukin 'atima oti  
 rabanan bërúaia.

8 ¿Bëtsi menu 'ikë unikama  
 mitsun kamina Nukën 'Ibu  
 Dios rabikanti 'ain!,  
 ¿usakin rabikin kamina mitsun  
 bana Dios kuamikanti 'ain!

9 Diosan ka uisa ñu kara inuti  
 'ikëbi nu 'akianxa;  
 usa 'ixun ka bëtsi ñukama  
 inútisama okín nu bërúanxa.

10 Mix nun Dios 'ixun kamina,  
 nukama uisai karanuna 'i  
 isnuxun nu tankën,  
 ¿usakin 'akin kamina manë  
 uxua charokëxa upíira  
 'ikësa usaribi 'inun 'imikin  
 nu mëníokën!

11 'Anan kamina anua pakëti  
 'akënuu ñuina pakëkë  
 usairibi nux 'inun nu  
 'imiakën;  
 usokin 'akëx kananuna  
 'itsaira tëmërakën.

12 Usakin 'akin kamina  
 bëtsi unikamanbia atun  
 kuëënkësa okín nu  
 tëmëraminun ëankën,  
 usokëx kananuna bakan  
 sikánan tsi rëkirukë iskësa  
 anun nu inúmiakën,

- usakin pain abëtsinkin  
kamina anua piti  
'aisamaira 'ikë me upí ënu  
nu bëakën.
- 13 Usa 'ain kana bërfí anuxun  
mi rabiti xubunu atsínxun  
'aímai këñutanun ñuina  
rëxun mi xaroxunti 'ain;  
usakin kana 'ën mi  
'axunuxun kakësabiokin  
mi 'axunti 'ain,
- 14 usakin 'axunuxun kana,  
'ënbi 'aisama ñukama inuti  
tëmarakin mi kakën.
- 15 Usakin 'akin kana 'aímai  
këñutanun ñuina xuairabu  
a xaroxunkin vaca  
bënëkama 'imainun cabra  
'ain bënëkama;  
'imainun carnero akamaribi  
mi xaroxunti 'ain.
- 16 ¡Kamabi an Dios rabikë,  
mikamax kamina rikuatsinti  
'ain!  
Rikuatsinxun kamina usakian  
an 'ë ñu 'axunkëkama  
ñuixumainun kuati 'ain.
- 17 'Ën kuëbitanbi rabikin kana,  
'ëa 'akinun kixun kakën.
- 18 'Ëx 'atima sinánñu uni 'ikë ka  
Diosan 'ën bana kuakë  
'itsianma;
- 19 ¡'aínbi ka an 'ën bana kuakin  
'ën ñukákësabi okin 'ë  
'axuankëxa!
- 20 ¡Usa 'aish ka Dios ax  
upíokin rabikë 'iti 'ikën,  
an ka 'ën ñukákëxun  
kuashikësa onan,  
kana 'aima kikínma 'ë ñu  
'axuankëxa!

## Salmo 69

- 'Aisamaira tëmërai Diosan  
'akinun David kia bana
- 1 'Ën 'Ibu Dios 'ë kamina  
iëmiti 'ain,  
'ëx inúkë ñukama an ka  
bakami kikësa 'inun 'ë  
'imia;
- 2 'ëx kana 'ian pëanpëankikë  
nëminra anu nanékësa  
'inun 'itsaira ñu inúkin  
tanin,  
usa 'ain ka 'ën taën anu  
amátí 'aíma 'ikën.  
'Ëx kana baka nëminra anu  
'ain,  
anua ka aín xobukë  
kushiira an 'ë taranpakín  
ubanpaxa.
- 3 'Itsaira banai kana tëëxan;  
usa 'ain kana 'ën tëru paëia  
tanin;  
¡usai 'ianan kana uni kara  
bain aia kixun kainkësa  
okin 'ën Dios kainin!
- 4 Añu ñu 'ën 'akë 'aímabi ka  
ax 'ëmi nishkë unikamax  
'itsaira 'aish 'ën maxkánu  
'ikë bun 'itsamaira  
'ikën;  
axa 'ëmi nishkë unikamax  
ka 'itsaira 'ikën,  
usa 'ixun ka bëtsi ñu  
'akëmabi 'ë 'aisa tankania,  
'imainun ka atun ñu  
mëkamakë 'ikëmabi 'ë ñu  
'inánun kixun ubioia.
- 5 'Ën Dios min kamina usakin  
'atimabi 'ën 'akë ñukama  
a 'unan;

- usa 'ain ka 'ën 'uchakama ax  
mimi unëtisama 'ikën.
- 6 Dios kamabi kushiñuira;  
jaxa mimi katamëkë akamax  
ka 'ëx 'uchakë anun  
rabinkë 'itima 'ikën!  
Israel unikaman Dios,  
'ëx 'uchakë kupín ka  
an aséjabi mi barikë  
unikaman ka  
uisai karana 'iti 'ai kiox  
bënëkinma munu 'akinun  
mi barikanti 'ikën.
- 7 Mi kupín kana unin  
uisakinshi kara 'ë  
ñuikëxunbi tënëa;  
usai 'i kana 'ën bëmanabi  
xanai rabian;
- 8 jusa 'ikë ka achúshi uni bërí  
ukë 'unánkëmasa,  
'ën xukén 'ibukamanbi 'ë  
isia!
- 9 'Ën anuxun mi rabiti xubu a  
nuibakin  
bëruánkëbëa 'ëmi bananan  
an mi ribi ñuikë unikama  
bana ax ka 'ënan 'aisama  
'i axa.
- 10 Usa 'ain 'ëx pima 'ianan inia  
isi  
unikama 'ëmi kuaikania;
- 11 'ën uni ñukëbëtan pañuti  
chupa pañuia isi  
ka 'ë 'usani kamabi uni kuaia,
- 12 Kamabi unikama ëmanu 'ikë  
'imainun,  
axa ñu xëax paénkë  
unikamaxribi ka 'ë ñui  
'atimati banaia.
- 13 'Aínbi kana, 'ëx ënima mibë  
banain.

- 'Ën 'Ibu Dios, j'bërí kamina  
min 'ë 'akinti 'ain!  
Min 'itsaira nuibakin,  
j'kamina 'akinsatankin 'ë  
kati 'ain!  
'Ën kana ënkinmami, j'ë  
'akinkëxun 'unanin! Usa  
'ain kamina 'ë j'iémiti 'ain!
- 14 j'Chua menu nanékësa 'iabi  
kamina anua 'ë ëntima  
'ain!  
j'Axa 'ëmi nishkë unikamaxa  
'ëmi nishiabi 'akianan,  
kamina baka nëminnu  
nikësa 'aish tëmëraiabi 'ë  
'akinti 'ain!
- 15 j'Itsaira ñu inúkin baka  
kushin taranpakësa taniabi  
kamina 'ë ëntima 'ain!  
j'Ianan kana baka nëmin  
samani birikian ñu nanëni  
urutëkënkë usanu 'ikësa  
tanin, usa 'ain kamina anu  
'ikësa 'ikëbi 'ë ëntima 'ain!
- 16 'Ën 'Ibu Dios, mix upí 'ixun;  
j'nuibairakin kamina  
timakësa okima 'ë kati  
'ain!  
Usa 'ain kamina mix  
nuibanairakë ixun 'ë  
nuibati 'ain;
- 17 jusa 'ain kamina min uni 'ikë  
'ë kuashikësa otima 'ain!  
j'Atima ñu inuti bënëtia  
isëshikinma kamina, 'ë  
'akinti 'ain!
- 18 Usa 'ain kamina, 'ë 'urama  
okin 'ë 'akinti 'ain;  
j'ë 'akinkin kamina axa 'ëmi  
nishkë unikamanua 'ë  
bëruánti 'ain!

- 19 Min kamina 'unan uisai  
 karana 'ichakin ñuikankëx,  
 katéti 'itsaira 'ëx tëmëra kixun;  
 'imainun kamina uikamax kara  
 'ëmi nishia kixun 'unán.
- 20 Usa 'ain kana 'itsaira  
 ñuikankëxun kuakin bëtsi  
 bëtsiokin sinanin;  
 ;usa 'aish kana bëtsiokin  
 sinani kushiñumasa 'ain!  
 Usai 'ikin kana ñu 'ati  
 'unánma unisa 'ixun  
 uin kara 'ë nuibakin 'akinti  
 'ikë kixun sinánkin barían.
- 21 'Ën pitinubi muka ñu  
 'aruanan ka,  
 shimaia 'ë ñu bimi baka  
 kachakë xëanun kixun  
 'inánkëxa.
- 22 ;Usa 'ain kamina min atúan  
 timéxun anu  
 bukuxun piti 'akë anuxun  
 piti 'axun piäxa,  
 anunbi atux 'atimanun 'imiti  
 'ain!
- 23 ;Usakin 'imianan kamina  
 bëxuñu 'ixun iskasmanun  
 'imianan,  
 nëtétima aín xokamax  
 bërënun 'imiti 'ain!
- 24 Mix atumi nishkin kamina;  
 ;uisa ñu kara atunu 'ia 'ikëbëa  
 atux tëmëranun 'imiti 'ain!
- 25 Usaia 'ikëbë ka anua 'ikankë  
 atun ëma ax anu uni  
 'ikëmasa 'iti 'ikën,  
 'imainun ka atun xubu ënkë  
 'ain uixi anu 'ikëmasa 'iti  
 'ikën;
- 26 Min kamina 'ë atsánkë  
 'ikëbi,
- 'itsaira tëmëramiakën,  
 usa 'ikëbi ka axa 'ëmi nishkë  
 unikaman paë tamikin 'ë  
 ñui 'ënun kuaikania.
- 27 Usa 'ain kamina atux  
 'uchañu 'ikë 'atima okin  
 atun 'uchakë kupín  
 tëmëramiti 'ain;  
 ;'aínbi kamina uibi atun  
 'ucha mënioxuntima 'ain!
- 28 ;Usokin 'akinma kamina  
 a unikaman anë anua  
 xëñibua 'aínbi min  
 unikama mibë 'iti anua  
 atun anë tërënti 'ain!  
 ;Usakin 'akin kamina atun  
 anë,  
 anua mix kuëënkësabi oi  
 'ikë unikaman anë 'ikë  
 anubi atun anë nantima  
 'ain!
- 29 'Aínbi kamina 'ëx 'insínkë  
 'aish tëmërai atsánkë,  
 'ikëbi mix 'ën Dios 'ixun  
 iémikin 'ë 'akinti 'ain.
- 30 Usakin 'akëxun kana 'ën Dios  
 'ikë mi ñuikin rabiti 'ain;  
 usakin kana mixmi chaiira  
 'ikë min anë rabiti 'ain,
- 31 usakin 'axunkëx ka Dios  
 asérami kuëënrati 'ikën,  
 baka aín bënë 'axun  
 xaroxuanan,  
 ñuina 'arakakë manchañu  
 'imainun 'untsisñu  
 'axun xaroxunkëxa 'ikë  
 usamairai kuëënti 'ikën.
- 32 Usokin 'aia isi ka  
 uni tëmërakëkama ax  
 chuámarua tani kuëënti  
 'ikën,

usai 'ia isi ka an Dios barikë  
unikama ax atun nuitunën  
munu sinanati kuënkanti  
'ikën;  
33 usai 'ikëbëtan ka Diosan uni  
ñuñumakama aín bana  
kuanan;  
aín unikama bëtsi unikaman  
ñatanbiankin 'ain menu  
buánkë akamaribi  
kuakëmasa otima 'ikën.  
34 ¡Dios a ka an unio naí me  
parúmpapa 'imainun,  
kamabi ñukama anbi rabikë  
'iti 'ikën!  
35-36 Diosan ka Jerusalénnu 'ikë  
unikama iémianan Judá  
ëmakama amiribishi  
birutëkënkín 'anun 'amiti  
'ikën.  
Usakin 'akë 'ain ka min  
unikamax a ëma 'ibuai  
anu tsóti 'ikën;  
usai 'ikin ka min unikaman  
rëbúnkinën atunanbi 'inun  
a ëmakama biti 'ikën,  
¡Ui unikaman kara min anën  
mi rabikin mix kikësabiokin  
'aia atun ka anu tsókin a  
ëmakama 'atëkënti 'ikën!

### Salmo 72

#### 'Apu 'iti uni a Dios ñukáxuan bana

1 ¡Ën 'Ibu Dios, axa 'apu 'iti  
uni ënë kamina,  
mín 'akësarabi okín upíokin  
ñu 'anun 'amiti 'ain,  
2 usakin 'anun mín 'amikëxun ka  
mín unikama 'imainun uni

ñuñumakama aribi upíokin  
'akinti 'ikën.  
3 'Imainun kamina aín bashi  
kamakëñun,  
matá mekama atunan 'ain  
uínbi ubíokëma upitax  
anu bukukanti 'ikën.  
4 ¡'Apun ka uni ñuñumakama  
an kakësabiokin aín bana  
tankin 'anun 'amiti 'ikën!  
¡'Amianan ka aín bakë  
bëchikëkama aribi  
upíokin 'akinti 'ikën,  
'akianan ka an këmëxun atu  
'atima okë uni akamaribi  
'atima oti 'ikën!  
5 ¡Usa 'ain ka a 'apux mín  
kakësabiokin 'ai  
baribëa 'uxë këñutisamapan  
'ain xëñibua 'aínbi tsóti  
mimi rakuéti 'ikën!  
6 ¡Usai 'i ka 'uñë 'imainun  
nibitan menu ñu 'apákë,  
chabónan pasto chabókë  
usaribi 'iti 'ikën!  
7 ¡Usakin 'anan ka ax 'apu  
'ixun ñu upíokin 'akëbë,  
a nëtëkaman uni upitax  
bukuti 'ikën,  
anúan 'uxë nëtéti nëtë  
'itámainun!  
8 ¡'Anan ka parúmpapa itsi  
parúmpapa itsi anuabi 'anan,  
Éufrates kakë baka  
anuabi uinu kara me  
kuainakëakëxa ax 'apu 'ixun  
ainan 'inun 'imiti 'ikën!  
9 ¡Axa ami nishkë unikama,  
anu uni 'ikëma menua 'ikë,  
akamax ka an ñu 'aia kuati  
ami rakuéti 'ikën!

- 10 ¡Imainun ka a 'inaínshiti  
ñukama bëanan 'apu  
'inánti bikë akama  
Tarsisnu 'ikë 'apukama  
'imainun paru nasínu,  
'ikë akamanribi bëxun  
'inámainun ka,  
Sabá 'imainun Sebá anu  
'ikë 'apukamanribi bëxun  
'inánti 'ikën!
- 11 ¡Kamabi menu 'ikë  
'apukamax ka,  
an ismainunbi menu  
rantinpuruni tsóbuti 'ikën!  
¡Kamabi menu 'ikë  
unikaman ka an  
kakësabiokin aín bana  
tankin ñu 'ati 'ikën!
- 12 An ka uni ñuñumakama  
'akinua ñukákëxun  
'akianan,  
an 'akinti 'aíma 'aia tëmërai  
uin kara 'akinti 'ikë kixun  
sinánkë a unikamaribi  
'akinti 'ikën.
- 13 Ax ka uni mënin  
sinánñushikamax tëmëraia  
isi anun masá nuituti 'ikën,  
'imainun ka ñuñuma  
unikamaribi upiti tsónun  
'akinti 'ikën.
- 14 'Anan ka an paránxun ñu  
mëmikë unikamanua  
chikíanan,  
an 'ishtuinshi, bënëkinshi  
ñu mëëxunun kikë  
unikamanua atu chikínti  
'ikën,  
atun tsóti ax ka an iskëx  
'itsaira kupikë ñusamaira  
'iti 'ikën.

- 15 ¡Apu ax tsókëpan 'ikë ka!  
¡Sabá menua 'ikë kuri  
'inankanti 'ikën!  
¡Usakin 'anan ka ënkinma  
abi Dios ñukáxunti 'ikën!  
¡Usa 'aish ka ax upíokin  
sinánxunkë 'iti 'ikën, 'apu  
ax ka xëníbua 'aínbi tsóti  
'ikën!
- 16 ¡Usa 'ain ka a menu  
'aisamaira trigo 'iti 'ikën,  
'ianan ka bashi rëbu anubi  
trigo 'aisamaira 'iti 'ikën!  
Usa 'ain ka Líbano menu  
trigo 'apákëxa bimikë  
usaira aín bimi 'i xubi  
koia iskë usaira 'iti 'ikën!
- 17 ¡Usa 'ain ka 'apun anë ax  
manukima usabi okin  
sinánkë 'iti 'ikën;  
usa 'ain ka an 'akë ñukama  
kamaxunbi 'unánkë 'aish  
bari këñutisama pain  
'ain an 'akë ñukamaxribi  
këñutima 'ikën!  
¡'Ianan ka kamabi menu  
tsókë unikama  
a 'apu kupín upíokin  
sinánxunkë 'iti 'ikën!  
¡Usa 'ain ka kamabi menu 'ikë  
unikaman ax ka chuámarua  
tsotia kixax kiti 'ikën!
- 18 Chuámarua ka Israel  
unikaman 'Ibu 'imainun  
atun Dios ax 'iti 'ikën,  
axëshi ka an ñu chairabu  
'akë a 'ikën;
- 19 aín anë upíira ax ka xëníbua  
'aínbi sinánkë 'iti 'ikën.  
¡Usa 'ain ka aín kushi ax  
xëníbua 'aínbi kamabi



menu 'ikë unikaman  
 'unánkë 'iti 'ikën! ¡Usa ka  
 'iti 'ikën ashi!  
 20 Ënushi ka David Jesénen  
 bakë bëchikë axa Diosbë  
 bana ënë sënënia.

### Salmo 73

#### Diosan ka upíokin ñu 'aia kikë bana

1 ¡Dios ax ka Israel unikamabë  
 upí 'ianan,  
 uin kara 'ain nuitunën  
 upíokin ami sinania a  
 unikamabëribi upí 'ikën!  
 2 'Ën kana ñu 'atima 'ai  
 'uchati chamara 'aisaira  
 tankinbi tënëan;  
 usai 'ikinbi kana chamara  
 ñu 'atima 'ati tënëakën.  
 3 'Ëx kana 'atima sinánñu  
 unikama 'imainun axa  
 rabiakakë unikama ñuñu  
 'ia,  
 isi atumi xuatemati nishakën.  
 4 A unikamax ka kana  
 bamati 'ai kixun sinanibi  
 bënëtima,  
 usai 'ika chuámashirua tani  
 uisa ñubi 'inutima bukuia;  
 5 usai 'i ka bëtsi unikama  
 'ikëσαι ñu mëi tēmëraikinbi  
 tankëma 'ianan,  
 bënëruxun rafrí unikaman  
 'akësokín ñu 'aima.  
 6 Usa 'ain ka atúxa rabiakakë  
 ax 'ain tēutisa 'ianan  
 atun bënëruxun ñu 'atima  
 'akë ax atún pañukë  
 chupasa 'ikën;

7 atux ka 'aímai xuati atun  
 bëru bëtsëkërës kikësabu  
 'ianan;  
 atun ñu 'atima 'ati sinánkë  
 ax 'aisamaira 'ikën.  
 8 Usa 'aish ka rabiakati an  
 kuanuma unimi kuai,  
 bënëkinshi 'atima ñu  
 'akatsikiax banaia;  
 9 usai 'ika aín kuëbitan  
 naikamë 'ëo këñun Dios  
 ñui banai kia,  
 'ianan ka kamabi menu 'ikë  
 unikama ñui banaia.  
 10 Usa 'ikë ka unikaman atu  
 rabia,  
 'ianan ka atun ñu 'atima  
 'akëbi mëraima.  
 11 Usa 'ain ka atux kánani kia:  
 ¿Diosan kara nun 'akë  
 ñukama 'unánti 'ik?  
 ¿Uisaxun kara Diosan ax  
 chaiira 'ixunbi nun 'akë  
 ñu uisaxun kara axa kixun  
 'unánti 'ik?  
 12 ¡Uni 'atima sinánñukama,  
 atun ñu 'aia kamina isti  
 'ain!  
 Atun ka ñuñu 'i upiti tsókinbi  
 'itsaira ñuñu 'iti kuënia.  
 13 ¡Usa 'aínbi 'ën upiokin  
 sinánkë 'ixunbi atun ñu  
 'aia iskin,  
 'ën sinánkë ax ka ñankáishi  
 'ën usokin sinánti  
 chukúmara pishinkë 'i axa!  
 14 Usa 'ain kana kamabi nētën  
 rishkiakatin,  
 'ianan kana kamabi nētën  
 tēmëramikín 'atimokë  
 'ain.

- 15 'Ēn atun sinánkësa okin  
sinánkë uni 'ixun kana,  
an min bana 'akë unikama  
'atimokin 'ën paránkë  
'itsían.
- 16 'Ēn kana uisokin kuaisa kara  
kixun tankën,  
'aínbi ka 'ënan kuaisama  
tëiratë 'iakëxa.
- 17 Usa 'ain kana anuxun Dios  
rabiti xubu anu atsínxun  
ira,  
uinuira kara atux 'inuxun  
'aia kixun 'unánkë:
- 18 usa 'ain kamina min atun ñu  
'atima 'akënbia,  
ñu tuñunuax raishki  
'ikësaí 'ia atúxbi 'anuax  
tëmëranun 'imian.
- 19 ¡Atux ka bënëkinshi këñúké  
'iti 'ikën!  
¡Usa 'ain ka rakuékë ax  
atubëbi këñuti 'ikën!
- 20 Uínsaran kaina mix Nukën  
'Ibu 'aish uníxa aín  
'uxkënuax  
bësukin afn namákë  
manukësa usakin,  
atun ñu 'akëkama a timati  
'ain.
- 21 'Ēx kana 'itsaira nishkë  
'iakën,  
usa 'ain kana 'ën  
sinánkënenbi 'ën nuitu  
'itsaira paëi 'iakën,
- 22 usai 'ikin kana bana  
kuakëma unisa 'ixun 'ënbi  
'unánma 'ain;  
¡usa 'aish kana min iskëx  
achúshi ñuina raëkëmasa  
'iakën!
- 23 Usa 'aínbi kana 'ëx mi  
ënima mibëbi 'iakën.  
Usai 'ia kamina min  
kushínbi 'ë 'akiankën,
- 24 'anan kamina min bana  
kikësabiokin 'anun 'ë  
'unánmiakën,  
usa 'ain kamina anun ñuti  
nëtë 'ikëbëtan minan 'ikë,  
upiookin kamina 'ë ñu  
'axuan kakin biti 'ain.
- 25 ¿Uix kara naínu an 'ë  
'akinkë a 'ik? ¡Mixëshi  
kamina a 'ain!  
'Ēx mibë 'ixun kana añu  
ñubi ënë menu 'ixun  
kuëëniman.
- 26 Kamabi 'ën namikama  
ñusmakësa tankim kana  
kushiñumasa tanin,  
'aínbi ka Diosan xënbua  
'aínbi anun tsóti ñu 'ë  
'inánti 'ikën,  
'ianan ka an 'ë upiookin abi  
sinánun 'imia.
- 27 Uikamax kara minan  
'isamatania, akamax ka  
bamakë 'iti 'ikën;  
'imainun kamina  
uikaman kara min bana  
kikësabiokin 'aisama tania  
akama këñunun 'imiti 'ain.
- 28 'Aínbi kana 'ëx Dios 'urama  
'iti 'ain,  
ax ka 'ënan asábira 'ikën.  
Mix kamina 'ën 'Ibu 'ianan  
'ën Dios 'ain, usa 'aish  
kamina an 'ë bërúankë a  
'ain,  
usa 'ain kana kamabi ñumi  
'akë akama ñuiti 'ain.

### Salmo 80

#### Diosan kamabi nu nuibanun ñukati bana

- <sup>1</sup> An Israel unikama bërúankë;  
an ka Israelnën  
rëbúnkikama achúshi  
ñuina aín 'ibun  
bërúankësa okin bërúanti  
'ikën,  
mix anu 'ikë anu ka  
querubinkama ax 'ikën,  
jusa 'ain kamina bëri  
nukaman ñukákëxun kuati  
'ain!
- <sup>2</sup> Mix kushi 'ixun kamina.  
Efraín Benjamín 'imainun  
Manasés aín rëbúnkikama  
'akinti 'ain,  
jusa 'ain kamina min kushin  
ismikin nukama iémiti  
'ain!
- <sup>3</sup> Mix nun Dios 'ixun kamina,  
jberáma 'iásai bi 'inun nu  
'akinti 'ain!  
jUpiokín iskimi nu 'akinkëx  
kananuna nukamax iékë  
'iti 'ain!
- <sup>4</sup> Nun 'Ibu Dios kamabi  
kushiñuira,  
¿uínsarainra kaina min  
unikaman  
ñukákëxbimi nishkë 'ixun  
atu 'akinkëma a ënti 'ain?
- <sup>5</sup> Nukamina nun bëun piti  
'akësokín nun pinun nu  
'amian;  
usakin 'amianan kamina  
nun bëun xëati 'itsaira  
xëakësa okinnu 'anun nu  
'amian.

- <sup>6</sup> Usokinmi nu 'akëbë ka nu  
'urama 'ikë unikama numi  
kuaimainun,  
axa numi nishkë  
unikamaxribi nu iskin  
usani nukamami kuaia.
- <sup>7</sup> Nukën 'Ibu Dios kamabi  
kushiñu nukama kamina,  
jberáma 'iásabinu 'inun  
'akinti 'ain!  
j'Ianan kamina min upiokín  
nu isti 'ain, usakinmi  
'akëx kananuna iékë 'iti  
'ain!
- <sup>8</sup> Mín kamina nukama Egipto  
menuabi uvas 'apákë  
'akësa obëtsinkin;  
bëxun anua bëtsi unikama  
tsókë me a atu chikínxun  
nu 'inánkën.
- <sup>9</sup> Usakin kamina anu nux  
'inun me mëniókën,  
usakin 'akëx ka 'apákëxa  
uvas tapuni 'ikësaribiti  
me tsitsirui 'uakamë  
'ëokankëxa.
- <sup>10</sup> Usai 'ikin kananuna anu 'ikë  
aín bashikama ñu tupënan  
'akësokín tsitsiruakën,  
'anan kananuna Líbanu me  
kamabi tsitsirukín biakën.
- <sup>11</sup> Usa 'ain kananuna a menuax  
kaikamë 'ëoi parúmpapa  
'ikë anuaxbi.  
Éufrates kakë baka anubi  
sënëni tsóakën.
- <sup>12</sup> ¿Uisoti kaina nukama  
usainu nux tsóa a ënun  
nukama 'imian 'imixun,  
usakin min nu 'akë 'ikëa  
numi nishkë unikaman

- nun bain inúkin nu 'atima  
onun 'amin?
- 13 Jabalí kaké ñuina ninu  
'ikësa 'ianan;  
;raëkëma ñuinasaribi 'ixun  
ka nu këñuia!
- 14 Usa 'ain kamina, mix Dios  
kamabi kushiñuira 'ixun;  
anumi 'ikë ñakamë 'ëo  
anuxunbi iskin nu 'akinti  
'ain,  
'akinkin kamina min 'apá  
'uvasa nux 'ikë minan  
'inun 'imiti 'ain,
- 15 minbi kamina uvas 'apákësaribi  
'itánun nu bëakën,  
usokin 'axun kamina minbi  
nu bërúankën.
- 16 Axa numi nishkë unikaman  
ka nun ëmakama ñu tëaxun  
xarátanun 'akësokin nëaxa;  
usa 'ain kamina min atu  
'atima oti 'ain;
- 17 'aínbi kamina min kaískë  
uni a 'akinti 'ain,  
ax ka bërámbimi kaisa  
unikama atun bakë  
bëchikë 'ikëmi ënë menu  
bëakama a 'ikën,
- 18 usa 'ain kananuna únsaranbi  
nux mi ëni mimi  
manútënkëntima 'ain.  
;Usokinmi anu tsóti nu  
'inánkëxun kananuna  
mishi rabiti 'ain!
- 19 Nun 'Ibu Dios kamabi  
kushiñuira,  
;Bëráma nux 'iásabi tsónun  
kamina, nu 'akinti 'ain!  
;Usokin nu 'akinkin kamina  
nu iémiti 'ain!

## Salmo 84

**Dios anuxun rabiti xubu ax  
ka upíira 'ikë kiax kikë bana**

- 1 ;Upíira upí ka anumi mix  
'ikë min xubu ax 'ikën,  
Nukën 'Ibu Dios kamabi  
kushiñuira!
- 2 ;'Ëx kana kuëëinra kuëëni  
anua min xubu  
'ikë ëman me mëníokë anu  
'iisa tanin!  
;Usa 'ain kana 'ën  
nuitunënbi kuëëni mixmi  
Dios an uni tsónun 'imikë  
mimi kantati 'ain!
- 3 Chunu 'imainun xapu chunu  
an ka  
anuxun mi ñuina xaroxunti  
'akë a  
'urama aín na 'atankëxun  
anu tuaia,  
'ën 'Ibu Dios kamabi  
kushiñuira,  
mix kamina 'ën 'apu 'ianan  
'ën Dios 'ain.
- 4 ;Uikamax kara anuxun mi  
rabiti xubunu 'ia,  
atux ka mi rabi chuámarua  
tani kuëënti 'ikën!
- 5 ;Chuámarua ka uikamax kara  
min 'akinkëx kuantankëx,  
'unánkëma bashi 'abiani  
anuxun mi rabiti xubu  
anu bëbaia atux 'iti 'ikën!
- 6 Únsaran kara tëmërai  
bëunan, mëskukë kakë me  
sapan anun inuti kuani,  
anun ka min 'uñe 'ibúkian  
xëxá 'ëmikín buakarukësa  
usaribi 'itánun,

- a men 'inutia nu upíokin  
sinánxunkin 'akinin;  
7 usai anun kuani ka atux  
atiainra kushiñuira 'ikanti  
'ikën,  
'ianan ka Jerusalénnu  
bëbakin anuxun a rabiti  
anua Dios kushiira a isti  
'ikën.  
8 Nukën 'Ibu Dios kamabi  
kushiñuira,  
'ianan Jacobnën Dios, j'ën  
mi ñukákëxun kamina  
kuati 'ain!  
9 Dios nu 'akinkë, 'ixun  
kamina nu nuibakin min  
kaískë 'apu an kara uisakin  
ñu 'aia isti 'ain.  
10 jAsábira ka achúshi nëtën  
min xubunu 'ikë me  
mëñókëkama anu 'iti ax  
'ikën,  
ax ka mil nëtëkama 'iminu  
'ikësamaira 'ikën!  
'Ën anuxun Dios rabiti xubu  
aín xëputi bërúankë ax ka  
asábi 'ikën,  
ax ka uni ñu 'atima 'akë  
kamabë 'ikësamaira 'ikën.  
11 Nukën 'Ibu Dios an ka  
'akianan nu bërúaiia;  
Diosan ka uni an ñu upí 'ai  
tsókë akama nuibanan  
'akinia,  
'akianan kana 'inanima  
kixun ñu upí ñonkinma  
'inania.  
12 Dios kamabi kushiñuira,  
jaxa mimi katamëkë  
unikamax ka chuámarua  
tani kuëëni tsókanti 'ikën!

## Salmo 87

### Diosan kaisa Jerusalén ëma rabi kantati bana

- 1 A mi ëma biruti Diosan ëma  
kakë,  
ax ka upí kakë bashi anubia  
'amia 'ikën.  
2 Diosan ka Jerusalénnu 'ikë  
ëma xëkuëkama bëtsi  
ëmakama Israelnu 'ikë  
'akësamaira okin upíokin  
bërúaiia,  
Israelnën anu 'inuxun  
xubukama 'asamaira okin.  
3 Diosan ëma upíira,  
mi ñui ka unikama upíira ka  
ax 'ikë kiox kikanía:  
4 Ësai ka Dios kiox, an  
'ë 'unánkë ëmakama  
raírinua kana ënë uni raíri  
kaísan, akamax ka 'ikën,  
Egipto, Babilonia, Filistea,  
Tiro, 'imainun Etiopía,  
ënë ëmakama ka Jerusalénnu  
'ikë unikaman ka 'unánxa.  
5 Usa 'ain ka a ëmanu 'ikë  
unikamax kikanti 'ikën:  
Sión kakë ëmanuxun  
kananuna Dios 'unan  
kiox kinkanti 'ikën, Dios  
manámi 'ikë kushiira ax  
ka usai kia.  
'Imainun ka Jerusalénnu  
'ikë unikamaxribi usaribiti  
kiti 'ikën.  
6 Nukën 'Ibu ka kirikanu  
anubia 'iti ëmakaman anë  
kuënëoti 'ikën:  
a unikaman ka anuax  
bakëan 'ixun

Jerusalénnuxun Dios  
'unánkëxa.

- 7 Usa 'ain ka ax kantai  
ransakë, a unikamax kiti  
'ikën:  
nun kananuna Dios  
Jerusalén ëmanuxun  
'unánkë kïax ka kikanti  
'ikën.

### Salmo 89

**Diosan an kakësabiokin  
'akinuxun David ka bana**

- 1 'Ën 'Ibu Dios, 'ëx mimi  
kantai  
kana mix kamina  
nuibanankë 'ai kïax  
kïanan;  
xëñibua 'aínbi kana mix  
kamina ñu 'atima 'ati  
kuëenkëma a 'ai kïax mi ñui  
kiti 'ain.
- 2 'Ianan kana munuma  
banakín min uni nuibakë  
ax ka këñutima okimi 'á  
'ikë kixun ñuianan;  
mix kamina usa 'ai kixun  
ñuikë ax ka naíkamë 'ëo  
usaribi bëtsiokëma usabi  
okin ñuikë 'iti 'ikën.
- 3 Min kamina achúshi ñu min  
uni Davidbëtan 'akën;  
'akin kamina ñu 'axunuxun  
mín kaískë uni kakën:
- 4 "Ën kana mix ñua 'aínbia  
mín rëbúnkikamax  
mix 'íasaribiti nëtétima 'apu  
'inun 'imiti 'ain."
- 5 ;'Ën 'Ibu Dios naíkamë  
'ëonuxunbi ka mín ángel

- kamanbi ka unin iskëma  
chairabu ñu mi 'a  
sinánkin mi rabiti 'ikën!
- 6 ;Uinubi ka naínu misaribi,  
dios 'aíma 'ikën 'ën 'ibun!
- 7 Dios chaira 'imainun ami  
rakuéti mi ka,  
naínuxun mín ángelkaman  
mi bëarabuinxun  
rabikania.
- 8 Nukën 'Ibu Dios kamabi  
kushiñuira misaribi axa  
kamabi kushiñu ka 'aíma  
'ikën;  
usa 'ain ka mín nan  
banakama ax aséribi  
'ikën;  
;uinubi ka misaribi bëtsi  
Dios 'aíma 'ikën!
- 9 Mín kamina parúmpapa  
'unsaira 'inua aín bëchun  
tukiabi  
aín bëchunkë axa  
bukubunun 'imin.
- 10 Mín kamina parúmpapanua  
bëtsi ñuinakama chairabu  
'akësa okin 'akëxa bamati  
'ikëbi Rahab 'i'ëmiakën;  
usakin 'anan kamina axa  
mimi nishkë unikama mín  
kushínbi abánun 'imiakën.
- 11 Me 'imainun naíkamë 'ëo  
ax ka mín unio 'aish  
mínan 'ikën; mín kamina  
me uniokín anua 'ikë  
ñukamaribi uniokën.
- 12 'Anan kamina aín tsipumi  
'imainun aín rëbumi 'iti  
akamaribi unionan,  
kamina aín bashikama  
Tabor 'imainun Hermón

- aribi 'akën, usa 'ikë ka  
 anu tsókë unikaman mi  
 rabi kuëenti 'ikën.
- 13 Min kushi ax ka chaiira  
 'ikën;  
 min mëkën mëkeu 'ikë ax  
 ka kushiira 'ikën, usa 'ain  
 kamina axa mimi nishkë  
 unikama kupitanuma 'ati  
 'ain.
- 14 Min kamina achúshi 'apun  
 'akësokin upíira okin ñu  
 'ain;  
 usa 'ixun kamina min  
 kushínbi kamabi ñu 'akin  
 ënkinma nu nuibati 'ain.
- 15 'Ën 'Ibu Dios chuámarua ka  
 uinu 'ikë unikaman kara  
 mi rabiti 'unánxa an mi  
 kuëenkin rabikë ax 'ikën.  
 'Ianan ka min bana 'ai,  
 tirítan pëkakësa 'aish  
 'upitax bukukanti 'ikën,
- 16 usai 'ika min anë rabi ka  
 nëtë kamabi kuëenkanti  
 'ikën,  
 usai 'ikin ka min kakësa-  
 biokin 'upiokin ñu 'akánti  
 'ikën.
- 17 Aséjabi kamina mix an nu  
 kushiokë a 'ain 'ianan  
 kamina nu upí 'imin;  
 usakin 'imikëx nux kushiira  
 'ikë ax ka mix kuëenxun  
 usakin nu 'imikë 'ikën.
- 18 ¡Dios ax ka aminu katamëkë  
 manë pará okin 'akë  
 usaribi 'ikën!  
 ¡Usa 'aish ka nukaman 'apu  
 'ianan Israel unikaman  
 'apu 'aish upíira 'ikën!
- 19 Bërámabi kamina  
 namámikësokin minmi  
 kaískë  
 unikama abë banakin kakën:  
 'Ianan kamina ësairibi  
 kiakën 'ën unikamanua  
 kana achúshi uni rakuëma  
 kaísun,  
 axa raíri unisama 'aish  
 sinánñuira 'ikë 'akinti 'ai  
 kiox kamina kiakën.
- 20 ¡'Ën kana 'ën uni 'iti David a  
 kaisakën!  
 Usa 'ikë kana axa 'apu  
 'inun aín maxkánu  
 xëni tutukakin anënun  
 'amiakën,
- 21 usa 'aish ka uínsaranbi 'ën  
 'akinkin ënkëma 'iti 'ikën.  
 Usa 'ikë kana 'ën kushínbi  
 'akinkë a ëntima 'ain,
- 22 usakin 'akinia ka axa  
 ami nishkë unikaman  
 'akatsikixun sinánxun  
 'akinbi uisabi otima 'ikën,  
 'ianan ka 'atima ñu 'akë  
 unikamanbi uisabi otima  
 'ikën.
- 23 'Ën kana amia nishkë  
 unikama 'atima okin  
 'anun 'amiti 'ain;  
 'amikin kana ¡istëkëñuxuma  
 këñukin 'anun 'amiti 'ain!  
 ¡Usakin 'akin kana amia  
 nishkë unikama këñunun  
 'amiti 'ain!
- 24 Usa 'aish ka 'ën nuibakin  
 'akinkë ax uisaibi 'ikëma  
 usabi 'iti 'ikën,  
 usai 'ia kana 'ën kushiira  
 'inun 'imiti 'ain.

- 25 Usakin 'èn 'akinkëxun ka parúmpapa Mediterráneo kakë anuxunbi Éufrates kakë baka anubi sënëonkin ax 'apu 'ixun ñu 'anun 'amiti 'ikën.
- 26 An ka 'ë kati 'ikën: Mix kamina 'èn papa 'ain; 'ianan kamina 'èn Dios an iémianan 'è 'akinkë a 'ain.
- 27 'Èn kana unían aín bëchikë apan aín biti ñu a 'inánkësaribi okin 'inánkin, axa kamabi menu 'ikë unikaman 'apu kamasamaira 'aish chaira 'inun 'imiti 'ain.
- 28 'Èn a nuibakë ax ka usabi okin ënkinma 'èn nuibakë 'iti 'ikën, 'ianan ka 'èn abëtan achúshi ñu 'a axribi uínbi uisabi okëma anubi 'iti 'ikën.
- 29 Usa 'ain ka aín rëbúnkikama ax 'íasaribiti, me 'imainun naí kamë 'ëo këñutisama pan 'ain 'apu 'iti 'ikën.
- 30 "Aínbi kana atun bëchikëkama, 'èn 'unánmikë banakama kikësokín 'aíma 'ianan,
- 31 a 'aisama tani akamami 'ianan, 'èx kia bana ax kikësaibi oi 'iti banakama kuaisama tania,
- 32 kana 'èn atux usai ñunshinakëkin, ñu 'aisama 'akë a kupín atu i pëñan bixun unin aín
- bakë bëchikë 'akësaribi okin atu 'atima okin tëmëramiti 'ain;
- 33 'aínbi kana 'èn uni David nuibakin ëntima 'ain, 'ianan kana 'èx kikësabiokin upíokin ñu 'axunkin a ëntima 'ain.
- 34 'Imainun kana uínsaranbi abëtan achúshi ñu 'akë, kana 'aima kikínma 'èx kikësabiokin aséربي 'akinti 'ain.
- 35 Achúshi okin kana 'èn aséربي 'èx kikësabiokin 'axunuxun kakën, usa 'ain kana paránkima David 'akinti 'ain:
- 36 usa 'ain ka aín rëbúnkikama ax 'íasaribiti atúxribi 'apu 'iti 'ikën, usai 'ika bari 'ianan 'uxë këñutisama aín 'apu 'iti 'ikën.
- 37 ¡Usai 'ika 'uxë 'ikësaribiti anubi 'ianan! ¡Xëñibua 'aínbi naíkamë 'ëo këñutisama 'ain 'iti 'ikën!"
- 38 Usa 'aínbi kamina, min kaískë 'apubi 'akinsama tankin; ¡usokin 'anan kamina ami nishkin 'aisama on!
- 39 Min kamina min kaísa unin rëbúnkikama 'apu 'ixunbi, min kásabiokin 'aíma; unin ain mañuti nipakëkësa 'itanun 'imian.
- 40 Kamabi anun aín ëmakama këñëara a kamaxa tukibuti kini kiniabu 'inun kamina;



- ¡usakin 'amia 'aish ka atun  
 ëma kënëara ax 'aisama  
 okan 'ikën, usa 'aish ka  
 bërîbi usabi 'ikën!  
 41 Usokin 'akë 'ain ka au  
 inúkin kamabi unin añu  
 kara bisatania a iskin  
 mëkamatia;  
 usokëbë ka a rapasu 'ikë  
 unikamax atumi kuaia.  
 42 Min kamina ami nishkë  
 unikama,  
 atun kuënkësokin  
 'atankëxa bërî kananuna  
 atu 'a kiox kuënkëkin atun  
 mëkën manámi oi 'inun  
 'imian.  
 43 Minbi kamina an tuinkë  
 manë xëtokë axa xëru  
 kuënuñuma 'inun  
 'imiakën,  
 axa ami nishkë unikaman  
 abë 'akanankin  
 'akasmanun 'akinkinma  
 ëankën.  
 44 Min kamina ax 'apu 'aishbia  
 kushiñumasa 'inun  
 'imikin;  
 axa 'apumasa 'aish menu  
 pakëkësa 'itánun 'imian;  
 45 usakin 'imikin kamina  
 'itsama baritia 'imia  
 tsónun aín baritia tëakën,  
 usakinmi 'akëx ka 'itsaira  
 katëaxa.  
 46 'Ën 'Ibu Dios,  
 ¿uínsaran ira kaina mixmi  
 unékësa 'ikë a nëtëti 'ain?  
 ¿Ianan kara mix nishkë ax  
 nëtëtima, tsi rëkirukësa  
 'aish usabi 'iti 'ik?

- 47 'Ën 'Ibu Dios min kamina  
 'unánti 'ain anun tsótimi  
 'ë 'inánkë  
 ax ka anun basi tsótima  
 'itsama nëtëishi tsótimi 'ë  
 'inánkë 'ikën;  
 usa 'ain ka minmi unio  
 unikama atúxribi 'itsama  
 baritia sënëmeshi tsotia.  
 48 ¿Uixi ka tsóti uínsaranbi  
 bamaima 'ima!  
 ¿Uixi ka bamatinuax iétima  
 'ikën!  
 49 'Ën 'Ibu Dios,  
 ¿uinu kara minmi 'ën kana  
 mi nuibati 'ai kixun a  
 irapain,  
 ñuikin min David ká bana  
 ax 'ik?  
 50 'Ën 'Ibu Dios min  
 unikamami ka kamabi  
 unix 'itsaira kuaia;  
 kuaikin ñuikankë a kana 'ën  
 sinanin.  
 51 'Ën 'Ibu Dios, ¿ësokin ka axa  
 mimi nishkë unikaman nu  
 'atima oia!  
 ¿Usakin ka min kaískë uni  
 'ikëbi uisai kara 'ia abi  
 ñuïbiankin 'atima oia!  
 52 Dios ax ka chuámarua  
 xëñibua 'aínbi 'iti 'ikën.  
 ¿Usai ka 'iti 'ikën!

### Salmo 90

**Dios këñútimoï 'imainun  
 ka unix 'itsama baritiashi  
 tsóti 'ikë kikë bana**

- 1 Nukën 'Ibu Dios mix  
 kamina, bërámaira nun

- chaitiokékama 'akian  
'ixunbi  
an bëríbi nu 'akinkë a 'ain.  
2 Anun bashikama 'imainun  
me 'ianan ënë,  
nëtékama unitisama 'aínbi  
'íá 'aish,  
kamina ënë nëtékamanbi  
bëríbi mix Dios aira 'ain.  
3 Usa 'ain ka mixmi unix ka  
me putu 'akë 'aish  
me 'itëkënnun 'imin; usai ka  
unix ñui me 'itëkënia:  
4 Aséjabi ka mil baritia inúkë  
ax min tankëx  
bënëtishi inuti 'inuónkë nëtë  
usaíshi 'ia.  
¡Usai 'ikë ax ka uiti hora  
kara imé inutia usashi  
'ikën!  
5 Usa 'ixun ka baka kushin  
'akësokin 'akëx,  
unin tsóti ax 'uxnékënuax  
bënëtishi,  
bësukë usashi 'ikën;  
6 'ianan ka xubi pékarakëma  
'aínshi upíira 'inun  
uatankëxia bari kuabúkëbë  
chushikë usaribi 'ikën.  
7 Aséjabi kamina mix nishkin  
nu rakuénnun 'imianan,  
¡bëtsi bëtsi okin sinani  
sinánkasmanun 'imin!  
8 Min kamina nuxnu  
'uchakékama 'imainun  
'atimakin ñu 'akë akamabi  
'unanin,  
usa 'ain kamina unin  
isiamabi nun ñu 'ati  
sinánkë abi 'unanin.  
9 Aséjabi ka nuxnu tsókë,

- ax mixmi numi nishkëbëshi  
këñutia;  
'ianan ka anun nux tsókë  
baritia ax munuma uin bitsi  
nun uinkë usaribi 'ikën.  
10 Anun tsótimi nu 'inánkë ax  
ka setenta baritiashi 'ikën;  
usa 'aínbi ka uix kara  
kushipain 'ikë ax kuni  
ochenta; baritia 'imi tsóti  
'ikën,  
'aínbi kananuna 'itsabaritia  
tëmëra kin ñu mëi atsanin.  
¡Usai ka nux 'ikësaribiti  
baritia kamax, bënëtishi  
inutia!  
11 ¿Uin kara min kuënkëma  
ñu 'aia isími mix nishkë a  
'unánti 'ik?  
¿Ui unin kara mix nishkë a  
'unánti 'ik?  
12 Mìn kamina nukama  
'unánmiti 'ain uiti nëtë  
karanuna tsóti 'ai a  
upíokin tupunun,  
usakin mi 'akëx kananuna  
nun sinan 'atima 'ima min  
sinánmikëxun upiokinshi  
ñu 'ati 'ain.  
13 ¡Nun 'Ibu, nukamanu  
kamina utëkënti 'ain!  
¿Uínsaran ira kaina nu  
'akintëkënti 'ain?  
¡Mínmi kaisa min unikama  
ënë kamina nuibakin  
'akinti 'ain!  
14 Nu kamina min nuibakin  
nëtékamabi 'imiti 'ain,  
usai 'i kananuna mi rabi  
kuëni kantai nux anun  
tsókë nëtékaman 'iti 'ain.

- 15 Nukama kamina 'itsa baritia  
kuëni tsónun 'imiti 'ain;  
nuxnu 'itsabaritia 'imi  
tëmërakësa usaribi okin.
- 16 ¡Min kamina min unikama  
'imainun aín rëbúnki  
kaman  
min 'akë ñukama isanan min  
kushikama isnun ismiti 'ain!
- 17 Nukën 'Ibu Dios min nu  
nuibakin 'akinkë ax ka  
nubëbi 'iti 'ikën.  
¡Usa 'ain kamina nun ñu  
mëëkëkama upí iskin!  
¡Abi nun ñu mëëtikama nu  
'akinti 'ain!

### Salmo 91

#### Diosan ka bërúankin nu 'akinia kikë bana

- 1 Uix kara Dios kamabi  
kushiñuira 'ianan,  
manámi 'ikë an bërúankë  
an ka
- 2 ësokín a rabikin Dios kati  
'ikën: “Mix kamina an 'ë  
bërúankin kushiokë a 'ain,  
'ianan kamina nux ami  
katamëkë a 'ain, ¡usa 'ain  
kana 'ëx mimi katamëti  
'ain!”
- 3 Usa 'ixun ka an ishi nun  
'unánkëma 'atima ñu,  
'imainun anun uni bamakë  
'insín anuabi nu iémiti  
'ikën,
- 4 usakin 'anan ka anbi mi  
ñuina pëchiñusa 'ixun aín  
pëchin bërúankëx kamina  
uisaibi 'ima upí 'iti 'ain.

- ¡Usa 'ain ka an mi bërúankë  
ax manë parámi mix  
katamëkësa 'inun mi  
'imiti 'ikën!
- 5 Usa 'ain kamina imé ñu  
'aisama inutimi, rakuétima,  
'ianan kamina nëtënbi pia  
nikian anun mi 'atimi  
rakuétima 'ain,
- 6 usai 'ianan kamina  
bëankibukëmi katamëaxa  
ukë ñu 'atimakama 'ianan,  
nëtënribi an ñu 'atimoi nikë  
ñu kamamibi rakuétima  
'ain;
- 7 usai 'ikëbëbi ka mil uni min  
mëmiu bamai këñuti 'ikën  
'imainun ka  
diez milribi min mëkeu  
ñui këñuti 'ikën, usai  
'imainun kamina mix uisa  
ñubi 'inútima 'ain.
- 8 Usa 'ain kananuna nun  
bërúnbi:  
uisai kara an ñu 'atima 'akë  
unikamax Diosan 'imikëx  
'ia isti 'ain.
- 9 Mix kamina Dios an nu  
bërúankë a 'ain,  
usa 'aish kamina Dios  
manámi 'ikë 'ain,
- 10 usa 'ain ka uisa ñu 'aisamabi  
minu utima 'ikën,  
'ianan ka 'aisama 'insínbi  
min xubunu utima 'ikën;
- 11 an ka aín ángelkama  
uinu karamina kuani anuabi  
mi bërúanun xuti 'ikën.
- 12 An ka mi aín mëkënan  
maxáxmi tachakaxma 'inun  
mi bikin bërúanti 'ikën.

- 13 'Ianan kamina paru 'inúan  
'imainun,  
ñuinakan 'ëobu runu akama  
nëbëtsi nikëbi ka mi  
uisabi otima 'ikën.
- 14 "Ën kana kamabi ñu  
'aisamakama iémiti 'ain,  
an ka nuibanan 'ë 'inánxa  
usa 'ain.
- 15 Uínsaran kara 'akinun kixun  
'ë kaia anun kana 'akinti  
'ain;  
¡'ëxbi kana abë 'iti 'ain!  
Usakin 'ai kana 'ëx abëbi 'iti  
'ain,  
'ënbi kana 'upiokin kamina  
ñu 'a kixun mi kati 'ain;
- 16 'imikin kana 'itsa baritia  
tsotia kuëënun 'ënbi  
iémitankëxun 'imiti 'ain:  
¡usakin 'akin kana 'ën  
iémi këxa kuëëni tsónun  
'imiti 'ain!"

### Salmo 93

**Nukën 'Ibu ax ka 'apuíra  
'ikë kikë bana**

- 1 ¡Nukën 'Ibu Dios ax ka  
'apuíra 'ikën!  
¡Usa 'ixun ka afn kushínbi  
chairabu ñukama 'á 'ixun  
a 'unánun nu ismiäxa!  
Usa 'ain ka me uniotankëxun  
anuäxa shaákitëkëntima  
okin nankëxa.
- 2 Usa 'ain kamina bërámabi  
'apu 'ia 'aish bëríbi mix  
usabi 'ain,  
¡Mix kamina bërámabi usabi  
'iakën!

- 3 Nukën 'Ibu Dios,  
bakakamax ka chairabu  
'inun bëchuni tuki banaia;
- 4 'aínbi kamina mix náinu  
Dios baka bëchunan  
kushisamaira 'ianan,  
parúmpapakama bëchuni  
tuki banarukë usamaira  
'ain.
- 5 Nukën 'Ibu Dios,  
a tanti min banakama ax ka  
uisaibi 'itima okinmi nan  
'ikën.  
¡Anuxun mi rabiti xubunu  
'ikë ax ka upíira 'ikën!

### Salmo 95

**Nukën 'Ibu rabi  
kananuna kuëëni ami  
kantati 'ai kikë bana**

- 1 Dios rabi ami kantai  
kuëënun ka ukan;  
an ka nu bërúanan ëñëmia  
ami kananuna kantati  
'ain.
- 2 Usai 'i kuëëni kananuna a  
'uramanuax 'ikë sai kantai,  
anun kantati ain bana 'akë  
anun kantai 'asabi ka kai  
kuëënti 'ain.
- 3 Ax ka Dios chaira 'ikën,  
usa 'aish ka bëtsi bëtsi  
díoskama atun 'apuíra  
'ikën.
- 4 Nukën 'Ibu Dios afn mëkënu  
ka kamabi me kuainakëa  
ax 'ikën;  
ainan ka kamabi bashi  
ënënmenma kuainakëa  
axbi 'ikën.

- <sup>5</sup> 'Ianan ka parúmpapa anbi 'á  
'aish ainan 'ikën, 'imainun  
meribi ka ainan 'ikën;  
janbi ka 'ain mëkënan  
'akësokin ñukama  
uniokëxa!
- <sup>6</sup> Usa 'ain kananuna  
rantinpuruni 'ikin a rabiti  
ukanti 'ain;  
a rabi kananuna Diosan  
ismainunbi rantinpuruni  
'iti 'ain,  
an ka nuribi uniokëxa.
- <sup>7</sup> Ax ka nun Dios 'ikën,  
usa 'ain kananuna nukamax  
an kaískë unikama 'ain;  
usa 'aish kananuna an  
'arakakë ovejakamasa  
'ain.  
Usa 'ain kananuna bërí ax  
ësaí kia kuati 'ain:
- <sup>8</sup> mitsun nuitu kamina  
Meribá kakë menuxun  
'asaribiokin iruatima 'ain;  
a nëtëkaman mi anu uni  
'ikëma me Masá kakë  
anuxun 'akansaribi okin,
- <sup>9</sup> uínsaran kara mín  
chaitiokëkama 'ën ñu 'aia  
iskinbi,  
'ë tankatsi kixun 'akankëxa.
- <sup>10</sup> 'Ëx kana cuarenta baritia  
'imi 'itsaira atumi  
nishakën,  
usai 'ikin kana a unikama  
'atimati kananuna  
tsóti kixuan unánun  
'unánmiakën;  
jusai 'ikin ka ax kikësabi oi  
'iti 'ën bana a tankama  
'ikën!

- <sup>11</sup> Usai 'ia atu isi nishi kana  
kiakën,  
'ën kana a 'inánuxun atu ka  
me anu tsónuxa atsínun  
'imitima 'ain.

### Salmo 96

**Nukën 'Ibu ax ka 'apuíra  
'ikë ki ami kantati bana**  
(1 Cr 16.23-33)

- <sup>1</sup> Nukën 'Ibumi kantai  
kananuna achúshi kanta  
ió ami kantati 'ain;  
kamabi menu 'ikë unikama;
- <sup>2</sup> Diosmi kantakin kananuna  
ain anë upíokin  
sinánxunkin a rabiti 'ain;  
usai 'ikin kananuna nëtë  
kamabi an iémikin nu  
'akinkë a kamabi ñuikin  
rabiti 'ain.
- <sup>3</sup> Anan kananuna aín kushian  
unin iskëma ñu upíirabu  
'a akamaribi kamina  
kamabi ëmanu 'ikë,  
unikaman kuanun ñuixunti  
'ain,
- <sup>4</sup> Nukën ibu ax ka chaiira  
'ianan aséرابi upíokin  
rabikë 'iti 'ikën:  
jax ka bëtsi dios  
kamasamaira, ami rakuéti  
a 'ikën!
- <sup>5</sup> Bëtsi ëmanu 'ikë unikaman  
rabikë dioskama ax ka  
kushiñuma 'aish ñuumara  
'ikën,  
'aínbi ka anu rabikë Nukën  
ibu an kuni naíkamë  
'ëokama uniokëxa.

- 6 ¡Anua ax 'ikë anu ka chaira  
'itánun upíokin pékakë  
'ikën!  
¡Anua 'ikë anu ka aín kushin  
'ikë usa 'aish ka upíira  
kakë ax upíokin pékakë  
'ikën!
- 7 Kamabi ëmanu 'ikë unikama  
Nukën 'Ibu Diosan aín  
kushin ñu 'akë,  
akamina 'unánkanti 'ain,  
'ianan kamina usakin  
aín kushin ñu 'akë aribi  
ñuikanti 'ain;
- 8 usa 'ain kamina anuxun a  
rabiti xubu 'ikënu me  
ëman mënókö anu,  
ami 'inainshiti ñukama  
buanxuni kuanxun rabiti  
'ain,
- 9 anuxun kamina anua kata  
upíira 'ikë, anuxun Dios  
rabikanti 'ain.  
¡Usakin 'akëbë ka kamabi  
menu 'ikë unikama ami  
rakuéti bërëti 'ikën!
- 10 Bëtsi bëtsi ëmanu 'ikë  
unikama kamina kati 'ain:  
“¡Dios ax ka 'apúira 'ikën!”  
Usa 'ixun ka ënë me  
shafkisama okín uniokëxa;  
an ka kamabi ëmanu 'ikë  
unikama bëtsi 'akësaribi  
okin sënénbi 'itánun  
'akinia.
- 11 ¡Me 'imainun naíkamë 'ëo  
ax ka kuëenti 'ikën!  
¡'Imainun ka parúmpapa  
bëchuni anua 'ikë  
ñukamabëbi banati 'ikën!
- 12 ¡Usai ka mekararibi

- anua 'ikë ñukamabëbi  
kuëëni kantati 'ikën!  
¡'Ianan ka kuëëni ninu 'ikë  
ikama axribi sharati 'ikën,  
13 usai 'ika Diosan 'ismainun  
kantati 'ikën!  
¡Ax ukin ka ënë menu 'ikë  
'apu 'ixun 'akinti 'ikën,  
'akianan ka kamabi  
menu 'ikë ëmakamanu  
'ikë unikamaribi 'akinkin  
asérabi an ñu upíokin 'ati  
'ikën!

### Salmo 100

#### Nukën 'Ibu Diosan ka ainan 'inun nu uniokëxa ki kantati bana

- 1 ¡Nukën 'Ibumi ka kuëëni  
kantakan,  
kamabi menu 'ikë unikama!
- 2 Kuëënkín ka Nukën 'Ibu  
rabikan;  
¡usai 'ika munuma  
banai kuëëni kamina  
anuxun a rabiti xubunu  
rikuatsinkanti 'ain!
- 3 Usai 'ikin kamina upíokin  
Nukën 'Ibu ax ka Dios  
'ikë kixun 'unánkanti  
'ain;  
an ka nu uniokëxa usa 'aish  
kananuna ainan 'ain;  
nux kananuna ain unikama  
'ain, ¡usa 'ikë ka unían ain  
ñuina 'arakakësa usaribi  
'ikë nu bërúai!
- 4 Anuxun a rabiti xubu ain  
xépútikama anu kamina  
rikuatsinti 'ain,

rikuatsini kamina anun rabi  
kantati aín bana anun  
kantakin rabikin asábi ka  
¡kakin upíokin sinánkin aín  
anë rabiti 'ain!

- <sup>5</sup> Nukën 'Ibu Dios ax ka upíira  
'ikën; an uni nuibakë ax  
ka bërí 'a 'ixunma nu  
nuibakë 'ikën,  
'ianan ka an upí ñubu 'a ax  
uínsaranbi këñutima oi 'ia  
'ikën.

### Salmo 103

**Nukën 'Ibu ka nun  
kushibëtanbi rabiti  
'ikë kikë bana**

- <sup>1</sup> 'Ën kana Nukën 'Ibu Dios  
'ën kushibëtanbi rabiti  
'ain;  
'anan kana 'ën kushibëtanbi  
aín anë upíira a rabiti  
'ain.
- <sup>2</sup> 'Ën kana Nukën 'Ibu Dios 'ën  
kushibëtanbi rabiti 'ain;  
usakin 'akin kana kamabi ñu  
'ë 'akinkë a manukinma  
sinánti 'ain.
- <sup>3</sup> An ka 'ën 'atima ñu  
'akëkama tërënxunkin 'ë  
mëníoxuanan,  
kamabi 'ën 'insínkëkama 'ë  
pëxkuxunia,
- <sup>4</sup> an ka ñutisa 'ikëbi 'ë  
nuibairakin iémia,  
ax nuibanairakë 'ixun  
kamabi ñu upíokin 'anun  
'ë nuibatia,
- <sup>5</sup> 'anan ka kamabi ñu upíbu 'ë  
'inania

'ianan ka 'ë bënëtékëni  
tëtëkamë 'ëo ain rani  
rëukubutankëx amiribishi  
'irutëkënkësa usairibi 'i  
'ëx kushi 'inun 'ë 'imia.

- <sup>6</sup> Diosan ka asérabi upí ñu  
'axunkin,  
axa bëtsin 'atimokëx  
tëmërakë unikama 'akinia.
- <sup>7</sup> Usa 'ixun ka Moisés  
'imainun Israel unikama  
uisa ñu atu 'axunti  
kara kuëënia kixun  
'unánmiakëxa.
- <sup>8</sup> Dios an ka nuibanairakë 'ixun;  
bënëtishi nishkima munu ñu  
'aia.
- <sup>9</sup> Usa 'ixun ka nukama  
kamabi nëtëinra usakin  
kamina ñu 'atima 'ai,  
kixun nu kai numi xëñibuti  
nishima, bënëtishi aín  
nishkë nëtétia;
- <sup>10</sup> usa 'ixun ka nukama 'atima  
ñu 'ai ami 'uchaiabi a  
sinánkin nu 'atimaira okin,  
tëmëramiti 'ixunbi nu 'amá  
'ikën;
- <sup>11</sup> 'imainun ka uikaman kara  
ax kikësabiokin 'aia a  
unikama nuibakë ax  
chaira 'ikën,  
usa 'aish ka naí 'imainun  
mebëtan sënënsaira ax  
nuibanankë ax 'ikën.
- <sup>12</sup> 'Ianan ka nux  
'uchakëkamaribi; nunua  
'uramikin,  
bëtsibëa me kuainakëti  
'urakë usairibi 'inun  
'imiaxa.

- 13 Uikaman kara a nuibakin ax  
kikësabiokin 'aia,  
a unikama ka Diosan unán  
aín bakë bëchikëkama  
'akësaribi okin nuibatia;  
14 usa 'ixun ka Diosan 'unánxa,  
añu 'á karanuna 'ai kixun:  
an ka upíokin 'unania nux  
kananuna me putu 'akë 'ai  
kixun.  
15 Unin tsóti ax ka xubi koibia  
chushikë usashi 'ikën;  
'ianan ka ninu ro uá urukë  
iskë usaribi 'ikën:  
16 usa 'ikëa suñun kushi  
bëkikin masókëx ka  
nëtétia usai 'iaka,  
unin uisai kara 'iaxa kixun  
'unanima.  
17 'Aínbi ka Diosan unikama  
nuibakë ax usabi nëtétima  
oi 'ia,  
uikaman kara ax kikësabiokin  
'aia a unikama;  
'ianan ka uin kara an  
kakësabiokin 'aia a  
nuibanan  
aín rëbúnkikamaribi aín  
chaitikama 'asaribiokin  
bëríbi nuibatia,  
18 'anan ka uikaman kara an  
achúshi ñu mënio ax  
kikësabiokin a bana  
tankin 'anan ax kikësabi oi  
'iti aín bana a manukima  
'aia a unikama nuibatia.  
19 Nukën 'Ibu Dios ax ka  
naíkamë 'ëo anu 'apuira  
'ikën,  
usa 'aish ka ax kamabi  
ñukaman 'ibuira 'ikën.

- 20 ¡Anu uxun ka aín ángel  
kushiirabu an Nukën 'Ibu  
Dios rabiti 'ikën!  
Mitsun kamina an kakësabiokin  
'anan,  
uisakin ñu 'anun kara mitsu  
kaia usakin 'axunti 'ain.  
21 ¡Anu uxun ka aín  
suntárukaman 'upiokin  
sinánkin Nukën 'Ibu Dios  
rabiti 'ikën,  
ñu mëëxuanan an kuëenkësa  
okinshi 'axunti 'ikën!  
22 ¡Anu uxun ka Nukën 'Ibu  
Dios kamabi ñu an unio  
'ianan,  
kamabi bëtsi menu 'ikë  
unikaman a rabiti 'ikën!  
'Ën kana Nukën 'Ibu Dios  
'upiokin sinánxunkin 'ën  
kushibëtanbi rabiti 'ain.

### Salmo 104

#### Nukën 'Ibu Dios an kamabi ñu unio a rabiti bana

- 1 ¡'Ën 'Ibu Dios kana 'ën  
kushibëtanbi rabiti 'ain!  
¡Mix kamina chaira 'ianan  
'ën Dios 'ain!  
Usa 'aish kamina min kushi  
chaba chaba kikë anun  
rabumëkësa 'ain;  
2 'ianan kamina tirítan pëkakë  
chupan rabumëkësaira 'ain.  
¡Min kamina chupa  
pënkësa usa okinshi naí  
kamë 'ëo uniokën!  
3 ¡Min kamina naínu 'ikë baka  
nëbëtsi anu min xubu 'ati  
ain itá nitsiankën!



- Usakin 'anan kamina nëtë  
 kuin aribi min caballonën  
 nikinkë usaribi 'inun  
 'imia;  
 janun kuani kamina  
 suñun pëchinu 'irukiani  
 kuankësa kiani kuanin!
- <sup>4</sup> Usa 'ain ka suñukama axbi  
 an min bana ñuikë 'ikën,  
 'imianan kamina kanákamë  
 'ëo mërurukë abi an mi ñu  
 mëëxunti 'imiakën.
- <sup>5</sup> Min kamina me aín  
 tapunmibi bikin uniokën,  
 anuaxa uínsaranbi  
 shafkitima okin.
- <sup>6</sup> Parúmpapa baka nëmin an  
 ka me mapuakëxa,  
 achúshi chupan mapukësa  
 'inun.  
 'Imainun ka 'umpaxan  
 kamabi ain bashikama  
 mapukë 'iakëxa.
- <sup>7</sup> Usa 'ikëbi min munuma  
 banakin kakëx ka,  
 parúmpapa 'umpax  
 êskíkiani amo  
 rarakakëaxa;  
 usai ka bënëtishi mix kaná  
 kamë 'ëo banakësai  
 'ikin kakëxun min bana  
 kuatishi 'iakëxa.
- <sup>8</sup> Usai 'ika aín bashikama  
 mapukë 'imainun me  
 şapankama axribi  
 êskíbutanun,  
 anu sënën rakatimi  
 sinánxunkë anubi  
 rarakakëaxa,
- <sup>9</sup> usa 'ain kamina min  
 uínsaranbi anuax,  
 me mapurutëkëni 'ëtëkënim  
 anubi 'itiokin 'imiakën.
- <sup>10</sup> Min kamina xëxá  
 'umpaxkama aín  
 bashinuax kuania,  
 baka chami xobuti saënun  
 'imin.
- <sup>11</sup> A 'umpax ka ñuina  
 raëkëmakama an xëaia;  
 'amainun ka ninu 'ikë  
 ñuinakama atúnribi  
 shimaxun xëaia.
- <sup>12</sup> 'Imainun ka a bakakama  
 kuëbi axa nuánkë ñuina  
 pëchiukaman atun na 'aia;  
 şusakin 'atankëx ka i  
 pëñankama aín xama  
 manánuax tsótax banaia!
- <sup>13</sup> Min kamina mekama,  
 chabotanun mananuaxa, ui  
 'ibútanun 'imin;  
 usokëbë ka menu 'ikë  
 ñukama chabáti upiti koia.
- <sup>14</sup> Usakin 'anan kamina ñuina  
 kaman piti basi koonun  
 'imianan,  
 unin 'apáxun mëníokë  
 ñukama aribi,  
 aín bimi piñua menuax  
 tuatanun 'imin,
- <sup>15</sup> usakin 'aia ain bimi pi  
 kushiirabu 'ianan ka  
 uvas baka xëai kuëëni,  
 ain bëmánan upí 'inun 'ikë  
 ax xënin 'ikësamaira 'inun  
 chábachábaki 'ia.
- <sup>16</sup> Nikama 'imainun ka Líbano  
 menu 'ikë kunxankama,  
 Diosanbia unimia akamax  
 'umpaxan chabókë menu  
 'ikën.

- 17 A ikamanu ka ñuina pëchiñu  
chukúma an aín na 'aia,  
'imainun ka pino kakë  
ikama ain pëñanu cigüeña  
kakë ñuina pëchiñu chabu  
akamaxribi 'ia.
- 18 Usai 'imainun ka aín bashi  
manankama anu cabra  
raëkëmakama ax bukuia,  
'imainun ka mapara  
kininu marisa ñuina  
raëkëmakama ax unëtia.
- 19 Min kamina 'uxë an imé  
pëkakë a únsaran kara  
'uxëkama isitia akama  
'unánti 'akën;  
barin ka únsaran kara  
xupibuti béankiti 'ikë a  
'unánxa.
- 20 Bari kuabuti xupibuti  
béankibukë ka  
ninuax ñuinakama ax  
tsuákibutia.
- 21 'Imainun ka paru 'inúan aín  
piti ñuina bitankëx kuëëtia;  
usai 'ikin ñukákëxun ka  
Diosan aín piti 'inania.
- 22 'Aínbi ka barin urukin  
pëkabëtsinkëbë,  
anua 'ikë aín kinikamanu  
rikiantankëx anu 'uxi  
rakabutia.
- 23 Usa 'ain ka unin xabakua-  
tsinkëbë nirutankëxun,  
aín ñu mëëti 'akín bari  
xupibuti kuabutamainun  
'aia.
- 24 ¡Uiti ñukamaira kaina mix  
Dios 'ixun 'akën!  
A ñukama kamina mix  
sinánñuira 'ixun 'akën;
- ¡usa 'ain ka kamabi menu  
min 'a ñukama 'ikën!
- 25 Anu ka parúmpapa naxbaira  
'ianan ënën menma kuani  
bëchunkë ax 'ikën,  
usa 'ain ka nun  
tupuntisamaira ñuina  
chabu 'imainun  
chukúmaratsubu axbi anu  
'ia;
- 26 anun ka manë nunti  
chairabu ax kuania,  
'imainun ka bëtsi ñuinakan  
'ëo min unio akamaxribi  
anu 'ia,  
abë ka anu 'ikë ñuinakama  
atux kuaia.
- 27 A ñuinakamax ka min  
kakësoishi 'ia,  
usa 'ain ka a ñuinakaman  
anunmi aín piti nëtë  
'ikëbëtan piti 'inánti ashi  
kainia.
- 28 Usai 'ikin ka min 'inánkëxun  
atun piti;  
mëkënan 'akësokin bixun piti  
upírabu a puchákin pia;
- 29 'ianan ka mixmi ami  
kasuakëkëbë rakuëtan  
bamai,  
'ianan minmi anun uinti  
'inankëmax bamai  
amiribishi me putu  
'itëkënia.
- 30 'Aínbi ka minmi anun uinti  
suñu 'inan,  
'aínbi kamina minmi  
unio ñukama raíri  
këñukiantamainun, axa  
bërí unikëkama aribi  
anúan uinti suñu 'inanin.

- 31 ¡Usa 'ain ka Nukën 'Ibun  
kushi ax únsaranbi  
këñutima 'ikën!  
¡Nukën 'Ibu ax ka an unio  
ñukama a isi 'itsaira  
kuëenia!
- 32 An iskëx ka mekama bërëi  
shaikia;  
'imainun ka aín  
bashikamanuax an mëëkëx  
'ikësa 'inun kuin niruia.
- 33 'Ëx tsókëpan 'aish kana;  
anun kantati akë anun 'ën  
'Ibu Diosmi kantati 'ain.
- 34 'Ën kana Nukën 'Ibu 'ën  
sinanën asabika kain;  
usa 'ain ka Dios an ishi 'ë  
kuëënun 'imia.
- 35 ¡'Uchañu unikama ax ka  
ënë menuax nëtëti këñuti  
'ikën!  
¡Usaia atux 'imainun ka an  
'atima ñu 'akë unikama  
atúxribi 'aíma 'inun  
këñuti 'ikën!  
¡Usa 'ain kana Nukën  
'Ibumi upíokín sinani 'ën  
kushibëbi kantati 'ain!  
¡Ësokín kananuna Dios rabiti  
'ain! ¡Usa ka 'iti 'ikën!

### Salmo 105

**Diosan Israel unikama  
'akian 'ikë ñuikë bana**  
(1 Cr 16.8-22)

- 1 Nukën 'Ibu Dios kananuna  
aín anë ñuikin rabiti 'ain;  
usa 'ain kamina kamabi  
ëmanu 'ikë unikama an  
'akë ñukama ñuixunti 'ain.

- 2 Anun kantakin kamina rabiti  
'ain.  
¡'Imainun kamina an ñu  
chabu 'a akama ñuikanti  
'ain!
- 3 Aín anë upíira a sinani  
kananuna rabikanti  
'ain.  
¡Bëtsi Dios nun rabikë  
usaribi ka 'aíma 'ikën,  
usa 'ain ka aín nuitu upitani  
an Dios rabikë unikama  
kuëënti 'ikën!
- 4 Nukën 'Ibu Dios kamina ax  
kushiira 'ikë barikanti  
'ain;  
usakin 'akin kamina kamabi  
nëtën Dios barikanti 'ain.
- 5 'Imainun kamina an ñu  
chabu 'a a  
'ianan aín bana sinánti 'ain;  
6 mitsux kamina aín uni  
Abraham aín rëbúnkikama  
'ianan,  
Jacob an kaisa aín bakë  
bëchikëkama 'ain, usa  
'ixun kamina 'ëx kia kuati  
'ain.
- 7 Ax ka nun 'Ibu 'ianan nun  
Dios a 'ikën;  
¡Usa 'ikë ka kamabi  
menuxun aín bana  
'unánxa!
- 8 Usa 'ixun ka uiti baribi kara  
inúa 'aínbi,  
axa usakin ñu 'akatsikikin  
achúshi ñu mënio 'a  
banakama a manutima  
'ikën,
- 9 'ianan ka usakin ñu  
'axunuxun achúshi ñu

- mëníokinun Abraham  
kakin abëtan 'a 'ixun,  
Isaac aséjabi katëkënxuma  
ashikin kakëxa,  
10 'imainun ka a tanti bana a  
Jacob 'axuankëxa,  
'axuanan ka uínsaranbi a  
manutima okin achúshi  
ñu mëníokin Israelkama  
'axuankëxa,  
11 usa 'ain ka ësai kiakëxa:  
'Ën kana Canaán kakë me  
bëtsinanpan 'iá 'aísha  
ainan 'itánun 'inánti 'ai  
kiakëxa.  
12 Atux ka 'itsama unishi  
'iakëxa  
usa 'aish ka bëtsi menu 'ikë  
'aish kuainbëkinishi nikë  
'iakëxa,  
13 usa 'aish ka bëtsi menu  
'itankëx bëtsi menuribi  
'ianan,  
bëtsi ëmanu 'itankëx bëtsi  
ëmanuribi kuani niakëxa,  
14 Usai 'ikëbëtan ka uñbi atu  
ubionun Diosan 'amiama  
'ikën  
'ianan ka 'apukamanribia  
uisabi atu oxuma 'anun  
'amiama 'ikën:  
15 'Ën kaískë unikama 'atima  
oxuma 'anan kamina  
an bana ñuikë 'ën  
unikamaribi uisabi otima  
'ai kixun ka 'apukama  
kakëxa.  
16 'Ianan ka, a menua numi  
chaira 'inun,  
'imikin atun piti ñu 'aíma  
'inun 'imiakëxa.
- 17 'Aínbi ka Diosanbi an atu  
'akinun José,  
aín xukénkama ami nishkin  
marua 'ixunbia atu  
'akinun 'imiakëxa.  
18 Egiptonu 'ikë unikaman ka  
tëmëramikin manë risin  
tëkërëkaxun;  
sipunu 'inun 'imiakëxa.  
19 Axa kia nëtëa  
sënëntamainun ka  
Diosan José usakin pain  
tëmëramiakëxa,  
usakin 'axun ka a nëtë  
sënënkëbëtan asérabika  
'ëx usai kia bana  
sënëánxa kixuan 'unánun  
'unánmiakëxa.  
20 Usai 'ikëbëtan ka kamabi  
ëmakamanu 'ikë  
unikaman 'apu,  
an José sipunua chikínun  
aín unikama 'amiakëxa;  
21 usakin 'axun ka, kamabi  
unikaman 'apu 'inun  
'imianan,  
an kamabi aín xubunu 'ikë  
ñukamaribi isti anëakëxa,  
22 usakin 'akëxun ka an 'apu  
'akinkë 'imainun aín  
unikama aturibi usafa  
sinánñuira 'iti banakama  
aribi 'unánmiakëxa.  
23 Usai anu 'ia ka Diosan Jacob,  
'ikëbi Israel kakë ax,  
bëtsi menuax Egipto menua  
'ikë Cam kakë me anu  
tsóti kuakëxa.  
24 Usai 'ia ka Diosan 'aisamaira  
'ia 'uakamë 'ëonun an  
kaískë unikama 'imiakëxa,

- usakin 'imikin ka egipcio  
unikamasamaira  
'ia kushiirabu 'inun  
'imiakëxa.
- 25 Usa 'aínbi ka egipcio  
unikaman  
Diosanbi atumi nishkian  
ain unikama 'atima onun  
kixun sinánmiakëxa,  
usokëxun ka Diosan kaískë  
unikama a atumi nishkin  
bëtsi bëtsi okëxa.
- 26 Usa 'ain ka Diosan aín uni  
Moisés,  
'imainun Aarón an 'akintia  
kaískë uni a xuakëxa,
- 27 atun ka Diosan 'amikëxun  
anu uni 'ikëma me  
anuxun:  
;unin isáma ñu chairabu  
Egipto me Cam kakë  
anuxun 'akëxa!
- 28 'Akin ka Diosan bëánkibukë  
chaira an anu 'ibúkin a  
me mapunun 'amiakëxa  
usakin 'akëbëtanbi ka  
egipcio unikaman  
atun kakëxun aín bana  
kuaisama tankëxa.
- 29 Usakin 'anan ka anua  
'ikë baka kamanua 'ikë  
'umpaxkamaribi imi  
'ikëbëa,  
bakanu 'ikë ñukama  
këñunun 'imiakëxa;
- 30 'imianan ka 'aisamaira 'ashá  
kamabi Egipto menu  
uninun 'imiakëxa, usakin  
'imikëx ka 'apun xubu  
'ukëmëu anua 'uxkë anubi  
'ashá atsíankëxa.
- 31 Usakin 'imiaux ka Dios  
kiakëxa chipë 'imainun  
sëbë ka uniti 'ikën  
kikëbëa,  
nëtë kuin tunankuatsini  
ukësa usaribi kuatsini  
ukin egipcio unikaman me  
tsitsirunun 'imiakëxa.
- 32 'Imainun ka Diosan 'uñe  
'ibúnun 'imikinma, matsin  
tita bëruñu 'ibúnun  
'imianan ka,  
mërirú mëriruia tsi ëxku  
iskësaí kaná a menu  
'ibúnun 'imiakëxa.
- 33 Usai 'ikin ka uvas  
'apákëkama 'imainun  
higuera 'apakëkamaribi  
këñuakëxa;  
;anan ka Egipto menu 'ikë i  
kamaribi masókëxa!
- 34 Usakin 'anun 'amitankëxa  
Dios kikëbë ka 'aisamaira  
champu uakëxa;  
;usa 'aish ka nun tupun  
tupun kaisamaira 'iakëxa!
- 35 ;Usa 'ixun ka a champukama  
kamabi ninu 'ikë i  
pëchikama këñukin  
pianan,  
kamabi menu atun ñu  
'apákë akamaribi këñukin  
aín pëi piakëxa!
- 36 ;Usakin pain 'amitankëxun  
ka Egipto menubi 'ikë,  
unikaman rëkuén bakë  
bëchikëkamaribi këñunun  
'imiakëxa!
- 37 Usakin pain 'atankëxun  
ka Diosan ain unikama  
kuri 'imainun manë

- uxua buania chikinun  
'imiakëxa,  
usakin 'imikëx kuani ka  
uinu 'ikë ñaká achúshinu  
'ikë unixi tsiankianima  
kuankëxa.
- <sup>38</sup> Kuania atu isi ka egipcio  
unikama kuëenkankëxa,  
amira atux rakuëkankëxia  
Israel unikamax kuania isi  
ka kuëenkankëxa.
- <sup>39</sup> Diosan ka a isbiania kuanti  
nëtë kuin atu manámi  
'imianan,  
tsi rëkirukësa 'ixuan  
pékakëbë imé kuankanti  
aribi 'imiakëxa.
- <sup>40</sup> 'Ianan ka atun  
pitia ñukákëxun  
'umpanxonëmë 'ëo këñun,  
naínu 'ikë piti aribi  
'inánkëxa 'inánkëxun pi  
ka pananima puchacëshi  
'ikankëxa.
- <sup>41</sup> 'Imainun ka mapara  
panarabëkëbë anuax  
'umpax chikíakëxa chikiti  
ka anu uni 'ikëma  
memi ki baka rarasa 'inun  
'umpax rakakëxa.
- <sup>42</sup> Usakin 'akin ka Diosan  
uínsaranbi manukinma  
usakin ñu upí 'axunuxua,  
aín uni Abraham ka a  
sinánkëxa.
- <sup>43</sup> Usakin 'akian Diosan  
chikinkëx ka aín unikama,  
munuma kuëëni sharákin  
rabibiani chikikankëxa,
- <sup>44</sup> 'imainun ka bëtsi menu 'ikë  
unikaman me atu 'inánan,

- atun ñu 'apákë akamaribia  
binun 'inánkëxa,  
<sup>45</sup> usakin 'akëxuan a tanti  
banakama 'imainun,  
an 'unánmikë banakama  
kikësabiokin 'anun ka  
usakin 'akëxa.  
¡Usa 'ain kananuna ashi  
rabiti 'ain!

### Salmo 107

#### Nukën 'Ibun aín unikama tëmëraia ënkínma 'akinkë bana

- <sup>1</sup> Nun 'Ibu kananuna axa upí  
'ikë asábi ka kakín rabiti  
'ain,  
usa 'ain ka ax këñutima oi  
nuibanania.
- <sup>2</sup> 'Ianan ka an iémikë  
unikaman Dios kati 'ikën,  
an ka ami nishkë unikaman  
'ati 'ikëbi iémiakëxa,
- <sup>3</sup> usa 'ain ka atu bëtsi  
mekamanu 'iabia timëkin,  
aín tsipumia 'anan aín  
rëbumi 'ikë akama 'ianan,  
ami axa bari urukë 'imainun,  
amia bari kuabúkë amiaxa  
timénun 'imiakëxa.
- <sup>4</sup> Nun xutakamax ka me  
'unánxma bënuax 'ikësai  
anu uni 'ikëma masiñu me  
anun nikinbi,  
anun ëma achúshi anu  
tsónux kuanti bai  
mëraimabi niakëxa;
- <sup>5</sup> usai nitsi ka pananx nianan  
'umpax a xëati 'aíma 'ain  
shimax,

- nitsi bamatisa tankankëxa
- 6 Usa 'i bënëkin ka Dios  
ñukákankëxa,  
ñukákëxun ka usai 'ia  
bënëké a upí tani  
kuëëtanun atu  
'akiankëxa.
- 7 Usokin pain 'atankëxun ka  
bai  
puntë ëma achúshi anu tsóti  
kuanti a mëramiakëxa.
- 8 Usa aín kananuna Nukën  
'Ibu Dios nu 'akinkëxun  
asabika kakín rabiti 'ain,  
jan ka kamabi unikama  
upíokin ñu 'anun 'akinia!
- 9 An ka axa shiman bamatisa  
tankë unikama 'umpax  
xëanun 'inania 'inánan ka  
ax numín bamatisa unikama  
aribi aín piti 'itsaira  
'inania.
- 10 Nun chaitiokëkamax ka  
bëánkibukënu sipuakë  
'ianan manë risin  
tëkërekakë 'aish,  
masá nuitukínbi añu kara  
'ati 'ikë 'unánan uínu  
kara kuanti 'ikë kixunbi  
'unánma 'ikën,
- 11 usai ka Diosan kakëxun  
kuaisama tankë kupín  
'iakëxa,  
usai ka Dios manámi 'ikë  
an kakësokin 'aisama tani  
atux 'iakëxa.
- 12 Usai 'ia ka Diosan tëmëra kin  
ñu mëënun 'imikëxun ñu  
chaiirabu 'ai;  
tatíki chakátiabi ka uínbi  
'akianma 'ikën.
- 13 Usai 'i bënëkin ka Dios an  
'akinun ñukákankëxa,  
ñukákëxun ka usai 'ia  
bënëké a upí tani  
kuëëtanun atu 'akiankëxa;
- 14 'akinkin ka béanbéan  
kikësanu 'ikëbi chikífanan  
manë risin tëkërekakësa  
'inua atux tëmërakë anua  
chikíankëxa.
- 15 Usa 'ain kananuna Nukën  
'Ibu Dios nu 'akinkëxun  
asabika kakín rabiti 'ain,  
jan ka kamabi unikama  
'upíokin ñu 'anun 'akinia!
- 16 ¡An ka anu uni xëpúkë a  
xëkuëkama tukíunun  
'imianan!  
¡Anun xëputi bëarati  
nankë manëkama aribi  
tëkëbunun 'imiakëxa!
- 17 Usa 'ain ka nun xutakama  
'itsaira 'insíni tëmërai,  
atun bana kuakinma 'atima  
ñu 'ai 'uchakë kupínbi  
usai 'ikankëxa,
- 18 uisa pitibi pisama tani ka  
ami kuínsakëxa;  
¡usai 'ikë anunbi ñuti  
'uramashi 'iakëxa!
- 19 Usai 'i bënëkin ka Dios an  
'akinun ñukákankëxa,  
ñukákëxun ka usai 'ia bënëké  
a; upí tania kuëëtanun  
atu 'akiankëxa.
- 20 Usakin 'akin ka aín  
banáinshi ñutisa 'ikëbi  
pëxkútanun atu 'imiakëxa;
- 21 usa 'ain kananuna Nukën  
'Ibu Dios nu 'akinkëxun  
asábi ka kakín rabiti 'ain,

- jan ka kamabi unikama  
upíokin ñu 'anun 'akinia!
- 22 Usa 'ain ka ñuina 'axun  
xaroxuni an 'a ñukama,  
a sinani kuëenkin rabikanti  
'ikën.
- 23 Nun chaitiokëkamax ka  
nunti chaiira marutankëx  
anun ain ñu marui  
parúmpapa bakan kuani  
niakëxa.
- Nitsi ka bëtsi ëmakamanu  
kuani niakëxa,
- 24 usai nikin ka  
parúmpapanuxunbi,  
Diosan unio ñu 'upírabu a  
iskankëxa.
- 25 Usa 'ain ka Dios kiakëxa  
suñúan kushiira bëkikin  
ka  
chaiirabu 'inun ain bëchun  
tukinun parúmpapa  
'umpax 'imiakëxa;
- 26 usakin 'amikëxa nafbëtan  
sënën nirukin anu 'ikë  
unikama këñunbi;  
nunti chaiira parúmpapa  
bëchunan biruia tani ka  
atun upíokin sinánkë 'a  
nëtéti ratúkankëxa.
- 27 Usai 'ika ñu paë xëax  
paëanxa uni 'ikëσαι anu  
'ikë unikama;  
jmanë nuntinu 'ikë uni  
'ikëmasa 'inun rakuétan  
bamai 'ikankëxa!
- 28 Usai bënëkin ka Dios an  
'akinun ñukákankëxa,  
ñukákëxun ka usai bënëké  
'a upí tani kuëentanun atu  
'akiankëxa;
- 29 usakin 'anan ka suñu  
kushiira 'ikuatsinkëbëa  
parúmpapa bëchun  
aribi bukubunun 'imiakëxa.
- 30 Usakin 'akëbëa bëchun  
bukubutia isi kuëenkania  
ka  
Diosan uinu 'ikë butunnu  
kuanti kara sinania anubi  
buánkëxa.
- 31 Usa 'ain kananuna Nun 'Ibu  
Dios nu 'akinun asábi ka  
kakin rabiti 'ain,  
an ka kamabi uni ñu  
'upiokin 'anun 'akinia.
- 32 jKamabi unin ka timéxun  
rabiti 'ikën!  
j'Amainun ka kamabi  
'apukamanribi timéxun  
rabikanti 'ikën!
- 33 Nukën 'Ibun ka bakakama  
'imainun xëxákama anu  
uni 'ikëma  
mesa 'ia ñankáishi 'eski me  
rakátanun 'imia;
- 34 'imianan ka mekama aribi  
anu ñu 'apátisama 'itánun;  
anu 'ikë unikamaxa ñu 'atima  
'ai 'uchakë kupín 'imia;
- 35 usokin 'anan ka anu uni  
'ikëma me akamaribi  
'umpax anu  
'inun 'imianan me anu  
'umpax 'ikëmakama anua  
xëxá 'umpax upíbu 'inun  
'imia;
- 36 anu ka axa panani tsóa  
unikama ëankëxa,  
ënkëxun ka atun ëma  
chaiirabu 'inun anu  
'akankëxa.



- 37 'Anan ka atun naënu uvas  
'apáxun,  
'aisamaira 'itánun tuaia  
bikankëxa.
- 38 Usakin 'aia ka Diosanbi bakë  
bëchipatia kaínu 'imianan  
atun 'arakakë  
ñuinakamaribi 'aisamaira  
kaínun 'imiakëxa.
- 39 Usakin 'akinkëxa upiti  
tsótiabi ka amiribishi axa  
atumi nishkë unikaman  
'itsaira,  
tëmëramikin usakin  
'akëxa 'akëx ka 'itsama  
uniratsushi bërúakëxa.
- 40 'Aínbi ka Diosan an bëtsi  
tëmëramikë unikama a  
timakin anu uni 'ikëma  
menuaxa,  
ain bai nëtémiax  
sinánkamanun 'imiakëxa.
- 41 Diosan ka uni ñuñukama  
a 'atimakin sinani masá  
nuitutiabi kuëënun 'imia;  
¡'imikin ka atun 'arakakë  
ñuinakama 'ikësaribitia  
bëchipati ñuina 'arakakë  
'ikëσαι aín aintsikamabë  
'inun 'imia!
- 42 Usakin 'aia isi ka uni upí  
sinánñukama ax kuëënia,  
usaí 'ia isi ka 'atima sinánñu  
unikama ax uisa bananbi  
kima tsotia.
- 43 Uix kara sinánñu 'ikë  
an kuni ka ënë bana  
kikësokin 'ati 'ikën,  
'akin ka Diosan ka kamabi  
uni nuibatia kixun unánti  
'ikën.

## Salmo 110

**Nukën 'Ibun ka an  
kaískë 'apu kushiokin  
'akinia kikë bana**

- 1 Nukën 'Ibu Diosan ka 'ën  
'Ibu kaxa:  
'Ën axa mimi nishkë  
unikama minan  
'imimainun kamina 'ë  
mëkeu tsóti 'ain.
- 2 Nukën 'Ibun ka  
Jerusalénnuxunbi, axa  
mimi nishkë unikama.  
¡Mix 'apu 'ixun min ira  
'anun mi 'amiaxa!
- 3 Mìn unikamax ka a nëtënmi  
'akanankin kupitanuma  
'akë a nëtën minu  
rikuatsinti 'ikën.  
Diosan bashi upí kakë anu  
ka atuxi kuantí 'ikën,  
usa 'ain kamina nëtë upíira  
urukian barin nibí ëskakë,  
usaribi mix kamabi nëtën  
'iti 'ain.
- 4 Nukën 'Ibux ka  
sinanatëkëntima oi kiaxa,  
usa 'ain ka kana 'aima  
kikínma aséرابi kana 'ati  
'ai kiaxa,  
Mix kamina sacerdote  
xëñibua 'aínbi 'iti 'ain,  
Melquisedec 'iásaribiti 'iti  
'ain.
- 5 Nukën 'Ibu an ka min mëkeu  
'ixun mi 'akinti 'ikën;  
usa 'ixun ka anúan atu  
'atima oti nëtë 'ikëbëtan  
atumi nishkin 'apukama  
'atima oti 'ikën;

- 6 usokin 'akin ka bëtsi bëtsi  
ëmakama uisakin kara  
'aisa tania usokin 'ati 'ikën;  
usakin 'akëx ka kamabi  
menu uni bamakë aín  
maxkákama;  
jÿbënsinkë 'iti 'ikën!  
7 Usa 'ain ka bainu 'ikë xëxá  
'umpax 'apu an xëati 'ikën,  
xëakëxun ka 'umpax an  
kushinun 'imitëkënti 'ikën.

### Salmo 115

**Nukën 'Ibu Dios naínu 'ikë  
an ka 'ashi rabikin bëtsi ñu  
rabiti kuëënima kikë bana**

- 1 Nukën 'Ibu Dios nukamax  
kananuna rabikë 'itima  
'ain min anëx kuni ka  
rabikë 'iti 'ikën,  
usa 'ain kananuna nux  
rabikë 'itima 'ain;  
jMix kamina nuibanankëira  
'ianan asérami min ñu 'akë  
a kupín rabikë 'iti 'ain!  
2 ¿Uisa kupín kara numi kuaikin  
ñu 'atima 'akë unikaman  
uínu kara nun Dios 'ikë  
kixun nu ñukáti ik?  
3 Nun 'Ibu Dios ax ka naínu  
'ikën;  
usa 'ixun ka aínu kara 'aisa  
tania akamabi 'akëxa.  
4 An Diosan bana kuakëma  
unikaman rabikë ñukama  
ax ka  
kuri 'imainun manë uxua  
usakin 'ati sinánxua,  
unínbi aín mëkënan uniokë  
'ikën:

- 5 Usa 'aish ka kuëbíñu, 'aishi  
banaima 'ianan;  
bëruñu 'ixunbi isima;  
6 'ianan ka pabiñu 'ixunbi,  
bana kuatima;  
'ianan ka rëkinñu 'ixunbi  
anun ñu xëtima;  
7 'ianan ka mëkëñu 'ixunbi  
anun aínu ñubi mëima;  
'ianan ka taëñu 'aíshbi anun  
nitsima;  
jusa 'aish ka achúshi banarabi  
aín tërunuax chikítima!  
8 Usaribi ka an a ñukama  
uniokëma a 'imainun  
an a ñukama rabikë  
unikama ax 'ikën.  
9 Israel unikama, jmitsux kamina  
Diosmi katamëti 'ain!  
An ka 'akianan nu bëruáia.  
10 Sacerdotekama, jmitsúxribi  
kamina Diosmi katamëti  
'ain!  
An ka nu 'akianan bëruáia.  
11 Mitsux Dios rabikë 'ixun  
kamina,  
jami katamëkin ashi rabiti 'ain!  
An ka nu 'akianan kamabi  
uniribi bëruáia.  
12 jDiosan ka numi sinánkin  
nukama  
upíokin sinánxunti 'ikën!  
'Ianan ka Israel unikamaribi  
upíokin sinánxuanan,  
sacerdotekamaribi upíokin  
sinánxukin ka  
13 an a rabikë unikamaribi uisa  
uni kara 'ikëbi,  
kushi uni 'imainun kushima  
uni akama upíokin  
sinánxunti 'ikën.

- 14 ¡Usa 'ain ka kuëenun Diosan  
mitsu 'imainun mitsun  
bakë bëchikënen,  
rëbúnkikama 'aisamaira  
'inun kaínun 'imiti 'ikën!  
15 ¡'Ën kana kuëenin Dios an  
me, 'imainun naí kamë 'ëo  
unio an ka  
upíokin sinánxunkin mitsu  
'akinti 'ikën!  
16 Naí kamë 'ëo ax ka Nukën  
'Ibunan 'ikën, 'imainun ka  
uni ainan 'inun me 'inánkëxa.  
17 Axa ñukë unikaman ka Dios  
rabikasmati 'ikën,  
anua atux 'ikë anuax ka  
uíxbi banaima;  
18 usa 'aínbi kananuna ñukëma  
pain 'ixun nukaman kuni,  
xëñibua 'aínbi bërfíbi Dios  
rabiti 'ain  
¡Usa 'ain ka axëshi rabikë  
'iti 'ikën!

### Salmo 116

**Mín kamina ñutisa 'ikëbi 'ë  
'akian kixun Dios kakë bana**

- 1 'Ën kana Nukën 'Ibu nuibatín,  
an ka 'ën ñukákëxun kúatia,  
2 an ka kamabi 'ën ñukákë  
banakama kuakin 'ë  
'akianxa.  
¡Usa 'ikë kana tsókëpan  
'ixun kamabi nëtën 'ën a  
ñukáti 'ain!  
3 'Ëx kana 'atima ñu inuti  
bamati 'uramashira 'iakën,  
usai 'ikin 'atimakin sinánkë  
anunbi kana, paëtani  
rakuëakën.

- 4 Usa 'ain kana Nukën 'Ibu  
ami sinánkin,  
'ëa 'akinun kakin ñukákën.  
5 Usa 'aish ka Dios ax upí  
'ianan nuibanairakë 'ikën;  
nun Dios an ka kamabi uni  
nuibairaira.  
6 Diosan ka sinan mëninñushi  
unikama bërún aia.  
Usa 'ixun ka an 'akinti 'aíma  
'ain kushiñumasa tani  
'iabi 'ë 'akiankëxa.  
7 Usa 'ain kana bërí, kuni  
chuámarua tanín,  
mín kamina 'ëbë upí 'ixun 'ë,  
8 ñutisa 'ikëbi 'akianan,  
bëunan mëskuti inkin  
'atimakin sinaniabi 'ë  
'akiankën.  
9 Usa 'ain kana 'ën Diosan  
kakëxun aín bana tankín  
an kakëسابiokin,  
axa ënë menu tsókë unikamabë  
tsókë 'ixunbi 'ati 'ain.  
10 'Ëx kana 'aisamairai tëmërai  
kixun 'unani kana,  
Diosmi katamëakën.  
11 Tëmërai bënëti kana 'ëx ësai  
kiakën,  
kamabi unix ka ami  
katamëisama këmë 'ikën.  
12 ¡'Ën 'Ibu Dios uisoxun  
karana kamabi ñumi  
upíokin 'ë 'axunkë usaribi  
okin mi 'axunti 'ain?  
13 ¡'Ëa 'itsaira ñu 'axunkë  
akama kupín kana,  
asabi ka kixun aín anë  
ñuikin rabiti 'ain!  
14 'Anan kana 'ën 'Ibu usakin  
'axunkatsi kíkë usakinbi,

- kamabi uni istánun 'axunti  
'ain.
- <sup>15</sup> Nukën 'Ibun ka an nuibakë  
unikama,  
bamaia isti kuëënima.
- <sup>16</sup> ¡Ën 'Ibu Dios, 'ëx kana an  
mi ñu 'axunkë uni a 'ain!  
¡Ëx kana an mi ñu 'axunkë  
xanu aín tuá 'ain!  
Min kamina an 'ë nëakësa  
oxun 'atimamikë ñukama  
a 'ë mënioxuankën.
- <sup>17</sup> Usa 'ain kana, 'ëmi ñukama  
'axunkë a kupín ñuina  
rëxun xaroxunkin,  
asabika kakin min anë  
rabikin mi ñukátí 'ain.
- <sup>18</sup> 'Anan kana 'ën Dios usakin  
'axunkatsi kikë usakinbi,  
kamabi unin istánun  
'axunkin,
- <sup>19</sup> kana anuxun Dios rabiti  
xubu me mëníokë,  
¡Jerusalén ëma nëbétsi 'ikë,  
aín xubu anuxun 'axunti  
'ain!  
¡Usa 'ain ka axëshi rabikë  
'iti 'ikën!

### Salmo 118

#### Diosan ka kushiira 'ixun nu nuibatia kikë bana

- <sup>1</sup> Nukën 'Ibu kananuna axa  
upí 'ikë asabika kakin  
rabiti 'ain,  
usa 'ain ka axa nuibanankë  
ax këñutima 'ikën.
- <sup>2</sup> Israel unikamax ka kiti 'ikën:  
Diosax ka xëñibua 'aínbi  
nuibanania.

- <sup>3</sup> Sacerdotekamax ka kiti 'ikën:  
Dios an ka xëñibua 'aínbi nu  
nuibatia.
- <sup>4</sup> An Dios rabikë unikamax ka  
kiti 'ikën:  
Diosan ka xëñibua 'aínbi  
ënkinma nu nuibatia.
- <sup>5</sup> Usa 'ain kana masá sinani  
tëmërai bënëkin Dios  
ñukákën;  
ñukákëxun kuakin ka 'ë  
'akiankëxa.
- <sup>6</sup> Dios ax ka 'ëbë 'ikën; usa  
'ain kana 'ëx rakuëtima.  
¿Usa 'ikë kara unikaman  
uisa 'ë oti 'ik?
- <sup>7</sup> Dios an ka 'ëbë 'ixun 'ë  
'akinia.  
¡Usa 'ain kana an 'ë  
'atimokë unikamax  
'atimokë isti 'ain!
- <sup>8</sup> Dios mimi nux katamëkë ax  
ka aséjabi upí 'ikën  
usa 'ain ka ax unimi  
katamëkësamaira 'ikën.
- <sup>9</sup> Diosmi nux katamëkë ax ka  
uni ñu 'unánkëira,  
ami katamëkësamaira 'ikën.
- <sup>10</sup> Bétsi bétsi menu 'ikë  
unikaman 'ë bëarabuinkë  
'ikëbi ka,  
Diosan aín anën 'ën ira atu  
'anun 'ë 'akiankëxa.
- <sup>11</sup> Amami amamixuan  
bëarabuinkëxunbi kana,  
'ën ira Diosan anën atu 'akën.
- <sup>12</sup> Binan bëarabuinkësa okín ka  
'ë 'akankëxa,  
'aínbi ka axira nishkin tsin  
muxa rëkirukín këñúké  
usai 'ikin;

- ¡ëinra atu aín anën 'anun  
Diosan 'ë 'akiankëxa!
- 13 Bënëkinshi ñu 'atima 'akë  
anunbi pakënun kixun ka  
'ë titikakankëxa,  
'aínbi ka Diosan ax kushiira  
'ixun 'ë 'akiankëxa.
- 14 'Ëx kana Dios rabi kantain,  
usa 'ikë ka an 'ë kushiñu  
'imia.  
¡Ax ka an 'ë iémikë a 'ikën!
- 15 Uni aín sinan upíbu ax ka  
atun xubunuax Dios rabi  
kuëëni kantaia:  
¡Ësai ki Diosan ka aín kushi  
'inánkin nu 'akinia!
- 16 ¡Diosan ka aín kushin ñu  
chabuirä ënkinma 'aia!  
¡Uni aín sinan upíbu ax ka  
an 'imikëx aín xubunuax  
Dios rabi kuëëni kantaia!
- 17 ¡'Ëx ñukëmapain 'ixun kana,  
Diosan 'a ñukama ñuixunkin  
uni kati 'ain!
- 18 Diosan ka 'aisamaira  
tëmëratun 'ë 'imiäxa,  
usokin 'akinbi ka ñutanun 'ë  
ënkëma 'ikën.
- 19 ¡Anuxun a rabiti xubu aín  
xëputi kamina xëókati  
'ain,  
anu atsínxun kana Dios asábi  
ka kakin rabbitisa tanin!
- 20 Ënëx ka anun Dios rabi  
atsínti xëkuë 'ikën,  
usa 'ain ka axa ami sinánkë  
unikamax anun atsinia.
- 21 'Ën kana mi 'asábi ka kain,  
Dios min kamina 'ën  
kakëxun,  
kuakin an 'ë iémikë a 'ain.
- 22 An xubu 'akë unikaman  
timakin rakan maxá ax ka  
bërí maxá upí ami xubu  
'akin uarukin nankë a  
'ikën.
- 23 Ësakin ka Nukën 'Ibun 'axa,  
usa 'ain kananuna nun  
iskëma ñu 'aia isan.
- 24 Ënë nëtën 'akësaribi okin  
ka Nukën 'Ibun nu  
'akiankëxa:  
¡usa 'ain kananuna bërí  
chuámarua tani kuëënti  
'ain!
- 25 Nukën 'Ibu Dios nukama  
kamina, ¡iémiti 'ain!  
Nukën 'Ibu Dios nun 'akë  
ñukamäxa upí 'inun  
kamina nu bërí 'akinti 'ain.
- 26 ¡Axa Nukën 'Ibun anën ukë  
ax ka chuámarua 'iti 'ikën!  
Usa 'ain kananuna nun  
anuxun Dios rabiti xubu  
anuxunribi mitsu upíokin  
sinánxunti 'ain.
- 27 Nukën 'Ibu an ka ax Dios  
'ixun; ¡nu pékaia!  
Usa 'ain kamina fiesta  
'akin taëokin i pëñan  
chukúmabu buánti 'ain  
anuxun ñuina xaroti,  
ain mancha 'ikë anubi  
kuanti 'ain.
- 28 Asabi ka kakin rabikin kana  
mix 'ën Dios chaiira 'ikë,  
mi rabiti 'ain.
- 29 Nukën 'Ibu Dios kananuna  
asabika kakin axa upí 'ikë  
rabiti 'ain;  
an ka nu nuibakin  
uñsaranbi ënima.

**Salmo 119**

**Nukën 'Ibu Dios aín bana  
kikësokinshi rabiti bana**

- 97 ¡A mi 'è 'unánmikë min  
bana kana 'itsaira  
kuëënin!  
¡Usa 'ixun kana kamabi  
nëtën iskin anua 'unanin!
- 98 Min bana ax kikësaibi 'iti  
ax ka 'ënan asábi 'ikën,  
usa 'ikë kana únsaranbi  
ëntima 'ain;  
an ka axa 'ëmi nishkë  
unikaman 'unánkësamaira  
'inun 'è ñu 'unánmiaxa.
- 99 Usa 'ixun kana anua kuakin  
an 'è 'unánmikë unikaman  
'unánkësamaira okin,  
'unánkin min banakama  
upíokin 'itsaira sinanin.
- 100 Usa 'ain kana uni kaniakëkë  
kaman kuakësamaira okin  
'ën kuankin 'unánin,  
'ën kana a tanti banakama  
ax kikësabiokin 'ain.
- 101 'Ën kana kamabi ñu 'atima  
'ën 'akëkama ëan,  
usa 'ixun kana min  
banakama kikësokinshi  
'ain.
- 102 Usa 'ixun kana mix  
kikësokinshi 'ati bana a  
ënkëma 'ain,  
mix kamina an 'è 'unánmikë  
a 'ain.
- 103 Mix usai ñu 'akatsi kikë  
bana ax ka bata ñubëtan  
sënénmaira 'ikën,  
usa 'aish ka buna rëpa ain  
banua tankësamaira 'ikën.
- 104 Min banakama anuabi kana  
'upiokin kuakin 'unan;  
usa 'ixun kana unin  
këmëkinshi ñu 'akëkama a  
timain.
- 105 Min banax ka achúshi tirítan  
anun 'ëx niti a pëkakë usa  
'ikën,  
'ianan ka tirítan anu nankëxun  
'ën bai pëkakë usa 'ikën.
- 106 'Ën kana asérami min bana  
kikësa okinbi 'axunuxun  
mi kakën, usa 'ain kana  
usakinbi mi 'axunti 'ain:  
¡'axunkin kana mix kikësabi  
okinshi a tankin 'ain!
- 107 'Ën 'Ibu Dios, kana 'itsaira  
tëmërai atsan;  
usa 'ain kamina min bana  
kikësabiokin upí tani  
tsónun 'è 'imiti 'ain.
- 108 'Ën kuëbitanbi rabikëxun  
kuakin,  
kamina min banakama  
'unánun 'ën 'unánmiti 'ain.
- 109 'Ën tsótinëx ka 'atima ñu  
inuti bamatinuishi 'ikën,  
usa 'aínbi kana min  
'unánmikë min banakama  
a 'ën manukëma 'ain.
- 110 'Aisama unikaman ka 'è  
bamamikatsi kixun ami  
'ëx 'iti ñu 'è nanxunia,  
'aínbi kana min 'unánmikë  
min banakama a manuiman.
- 111 Min banakama 'ën 'unánkë  
ax ka këñutima 'ikën,  
a bana kaman ka chuáma  
tani kuëënun 'è 'imia.
- 112 Usa 'ain kana min banakama  
kikësokin 'anuxun sinanin,

- usa 'ain kana xëñibua 'aínbi  
bamakin ënuxun 'ati 'ain.
- 129 Min 'unánmikë banakama  
ax ka upíira 'ikën;  
usa 'ikë kana ax kikësa-  
biokin a bana tanin.
- 130 Usa 'ain ka an 'unánkë uni  
an ñuixunkëxun kuakin,  
min bana sinan mëninñushi  
unikama atúnribi kuankin  
'uania.
- 131 'Ën kuëbitanbi banakin min  
bana kuaisa tankë an ka  
'ë 'itsaira kuëënun 'imia.
- 132 Mix 'ën Dios 'ixun, nuibakin  
'ë iskin,  
kamina an mi nuibakë  
unikamami 'akësaribi okin  
'ë nuibati 'ain.
- 133 Min bana kikësabi oi ninun  
'imikin kamina;  
'aisama ñukama  
'aisatankinbi tënënun 'ë  
ënkinma 'akinti 'ain.
- 134 Unin bënëkinshi 'ati sinánxun  
'akë ñukama 'axuma 'anun  
'amixunma 'anan,  
kamina min bana kikësokinshi  
'anun 'ë 'imiti 'ain.
- 135 Min uni 'ikë 'ë upíokin  
isanan kamina,  
a tanti min bana akamaribi  
'ë 'unánmiti 'ain.
- 136 Unin min banakama  
kikësokin 'aiama isi,  
'itsaira anun masá nuitukëbë  
ka 'ën bëunkë ax 'umpax  
'ikësaira 'inun 'ibuaxa.
- 137 Dios mix kamina upíira 'ain;  
usa 'ain ka min banakama  
ax kikësokinshi 'ati 'ikën.

- 138 Kamabi ax kikësabiokin 'ati  
min bana kamami nu  
'inan, ax ka upíira 'ianan  
asérami 'ikën.
- 139 'Ëx kana 'itsaira nishin min  
bana kikësokin 'aíma,  
axa 'ëmi nishkë unikamax  
ka ami manuaxa.
- 140 Min bana ax ka 'itsaira ñu  
inúaxa,  
usa 'ain kana min uni 'ixun a  
bana kuakin mi nuibatin.
- 141 Mënin sinan ñushi 'ikëa unin  
'ë istisama tankëxunbi  
kana,  
'ën min bana ax kikësoi 'ikin  
ënkëma 'ain.
- 142 Min 'akë ñukama axa xëñibua  
'aínbi upí 'imainun ka  
min 'unánmikë ñukama  
ax asérami këmëkin  
'unánmikëma 'ikën.
- 143 An 'ë tëmëramikë ñukaman  
atsamikë 'ikëbi ka  
a tanti min banakaman 'ë  
kuëënun 'imiaxa.
- 144 Min banakama ax ka upí 'ikën;  
jusa 'ain kamina ax kikësa  
okinshi upíokin 'ai tsónun  
'ë 'unánmiti 'ain!

### Salmo 121

#### Diosan ka bërúankin mi 'akinti 'ikën kikë bana

- 1 'Ëx kana aín bashikama  
iskin sinani 'esai kin;  
¿Uinuax kara an 'ë 'akinti  
uti 'ik?
- 2 An 'ë 'akinti ax ka Nukën  
'Ibunuax uti 'ikën,

- an ka naíkamë 'ëo 'imainun  
me uniokëxa.
- 3 ¡Dios an ka únsaranbi  
'atima ñu inuti têmëranun  
mi 'imitima 'ikën!  
¡Imainun ka únsaranbi mi  
bëruankin 'akini 'uxtima  
'ikën!
- 4 Ax ka únsaranbi 'uxkëma a  
'ikën;  
usa 'aish ka únsaranbi Israel  
unikama bëruaibi 'uxima.
- 5 Nukën 'Ibu ax ka an mi  
bëruánkë a 'ikën;  
usa 'ixun ka Nukën 'Ibu an  
uisaibi 'isama okin mi  
bëruankin 'akinia,  
uin kara an 'akësaribi okin  
mi rapasu 'ixun ka mi  
ënkinma 'akinti 'ikën.
- 6 Nëtén ka barin mi xarotima  
'ikën,  
'imainun ka imébi 'uxén mi  
'atima otima 'ikën.
- 7 Nukën 'Ibu Diosan ka  
kamabi ñu 'aisama inuti  
'ikëbi mi bëruaia  
usa 'ixun ka an upitimi  
tsónun mi 'imiti 'ikën.
- 8 Diosan ka mi bëruankin bërí  
'ananbi xëníbua 'aínbí,  
uinu karamina kuani anuabi  
mi 'akinti 'ikën.

### Salmo 122

#### Jerusalén ëma ñui kantati bana

- 1 ¡Ëx kana ësakian 'ë  
kakankëx kuëëankën:  
Anuxun Dios rabiti xubunu  
kananuna kuanti 'ain!

- 2 Bërí kananuna Jerusalén,  
¡xëkuë 'ukëmëu 'ain!
- 3 Jerusalén ëma birukin 'a ax  
ka  
kamabi unikama anu timéti  
'a 'ikën.
- 4 Usa 'ain ka anu timéxun  
Diosan anë rabi ñaká itsi  
ñaká itsinuax  
Israel unikama Diosan  
kásabi oi 'ia.
- 5 Anu ka anuxua 'apukaman  
ñu 'atima 'akë unikama  
uisoti kara iskë a  
'imainun.  
David anu 'ikë 'apun xubu  
a 'ikën.
- 6 Mitsux kamina mitsun  
nuitunënbí upíokin sinani  
kiti 'ain:  
Jerusalén anu ka an  
mi nuibakë unikama  
chuámarua bukukanti  
'ikën.
- 7 'Ianan ka min ëma kënëara  
mëu 'ikë unikama atúxribi  
uisabi okëma 'iti 'ikën;  
'imainun ka anu 'apu timékë  
xubukama axribi upíokin  
unin bëruánkë 'iti 'ikën.
- 8 Usa 'ain kana bërí 'ën  
xukénkama 'imainun 'ën  
'unánkë unikama kati 'ain;  
Axa Jerusalénnu 'ikë  
unikamax chuámarua 'iti  
kana kuëënin.
- 9 Usa 'ain kana Jerusalén  
anuxun Dios rabiti xubu  
anua 'ain,  
upíokin bëruánkë 'iti  
kuëënin.



**Salmo 124**

**Diosan ka nu ënkinma  
'akinia ki kantakë bana**

- <sup>1</sup> Nukën 'Ibu nubëma 'ixun  
nukama 'akianma 'aish  
karanuna uisa 'itsían  
—kix ka Israel unikama  
bërí kiti 'ikën—,
- <sup>2</sup> Dios nubëma 'ixun nukama  
'akiniama ka axa numi  
nishkë unikaman nu 'anux  
mëníoka kuatsini ukin,  
<sup>3</sup> nukama añu ñubi sinánkë  
'ikëmabi këñukin ñu 'akë  
'itsíanxa.  
Atux ka 'itsaira numi  
nishakëxa.
- <sup>4</sup> Usokin 'akin ka 'umpaxan  
'ëkin mapurukin 'akësa  
okë 'itsíanxa;  
¡kushínbi bakan ñu  
rinbiankin uankë usaribi  
okin nukama 'akë 'itsíanxa!  
Diosan nu 'akianma 'ain.
- <sup>5</sup> ¡Usokin 'an ka baka  
chubéira ax  
nunun 'inúkë 'itsíanxa!
- <sup>6</sup> ¡Usa 'ain kananuna Nukën  
'Ibu ami sinánkin rabiti  
'ain, an ka axa numi nishkë  
unikaman uisakin kara  
'aisatania usakin 'akian  
xëtan tëapakësa usokinshi  
'atanun nu ëanma 'ikën!
- <sup>7</sup> Usa 'ain kananuna an ñuina  
biti 'unánkë unían anun  
ñuina pëchiu biti nankë;  
a chankabuini nukama  
chikiakën.
- <sup>8</sup> Nukën 'Ibun ka nu 'akinia,

an ka naíkamë 'ëo 'imainun  
me uniokëxa usa 'ixun.

**Salmo 126**

**Diosan ka masánuituti  
nitéxëtia aín unikama  
kuëënun 'imiti 'ikë kikë bana**

- <sup>1</sup> Nukën 'Ibun nu amiribishi  
Jerusalénnu bëtëkënkë ax  
ka  
namati 'ikësa nun sinánkëx  
'iakëxa.
- <sup>2</sup> Usa 'ain kananuna 'itsaira  
kuëëni munuma kuai  
kuëëankën;  
usai 'ia isi ka bëtsi menu  
'ikë unikama kánani  
kikankëxa:  
¡Nukën 'Ibun ka ñu  
chairabu atu 'axuanxa!
- <sup>3</sup> Nuribia Nukën 'Ibun ñu  
chairabu 'axunkëx  
kananuna nuxribi 'itsaira  
kuëëankën.
- <sup>4</sup> ¡Nukën 'Ibu nukamina nun  
'akë ñukamaxa amiribishi  
upí 'inun 'imitëkënti 'ain,  
anu uni 'ikëma me anua  
'uí 'ibúkë usaribi 'inun  
kamina nu 'imiti 'ain!
- <sup>5</sup> Uikaman kara tëmërai  
nitéxëkin aín bëunan  
mëskúkinbi ñu 'apatia ax  
ka  
aín ñu 'apákë tuaia aín bimi  
bitsi munuma kuëëni  
kikanti 'ikën.
- <sup>6</sup> 'Ianan ka ñu bëru ñusutimi  
papiax tëmërai insa  
tankinbi 'apátankëxun,

tuaia aín bimi pēñanu  
 puruanan 'ikúxun bëanan  
 papixun bëi kuënkanti  
 'ikën.

### Salmo 127

**Nukën 'Ibun ka kamabi  
 ñu 'imia kikä bana**

- <sup>1</sup> Nukën 'Ibun xubu 'akëbëma ka  
 an 'akë unikama an tēkëbi  
 ñankanbi tēkë 'iti 'ikën;  
 Diosan ëma bërúankëbëma ka  
 ñankáishibia an bërúankë  
 unikaman bërúankë 'iti  
 'ikën.
- <sup>2</sup> Pëkarakëma 'ainshi 'apunkin  
 bari kuantamainun ñu  
 mëékë ax ka ñankabi 'akë  
 'ikën  
 'imainun tēmëra kin ñu bixun  
 pikë ax ka 'aisama 'ikën,  
 usaia 'imainun ka Diosan an  
 'unánkë unikama upiokin  
 sinánxunia.
- <sup>3</sup> Unin bakë bëchikë  
 bakënkëkama ax ka  
 upíokin sinánxunkian  
 Diosanbi nu 'inánkë 'ikën.
- <sup>4</sup> Unin bënëá pain 'ixun bakë  
 bëchikëkama ax ka  
 achúshi uni 'akánanti 'unan  
 'ixúan ain piakama tuíanx  
 upí tani kuënkë usaribi  
 'inun uni 'imia.
- <sup>5</sup> ¡Chuámarua ka pia 'itsa ñu  
 uní ax 'ikën!  
 Usaribi ka bakë bëchikë  
 'itsañu unin tania,  
 Usa 'ain ka axa ami nishkë  
 unikaman ismainun

an bana mëníokë unikaman  
 kuënkëx anu kuania atun  
 bakë bëchikënen 'akinkëx  
 rabinkë 'itima 'ikën.

### Salmo 130

**Nukën 'Ibun ka ami  
 katamëkëxun nu 'akian  
 'ikë kikä bana**

- <sup>1</sup> 'Ën 'Ibu Dios 'ën 'akë  
 ñukaman 'imikëx kini  
 'ukëmëu nipakëkësa,  
 'ixunbi kana mi ñukákin  
 ënkëma 'ain:
- <sup>2</sup> ¡'Ën 'Ibu Dios 'ëx mi ñukáti  
 munuma kia kamina kuati  
 'ain!  
 ¡Min kamina 'ën ñukákëxun  
 min pabitan kuati 'ain!
- <sup>3</sup> 'Ën 'Ibu Dios, minmi unin  
 'ucha 'unánkëbë kara,  
 ¿ixi mi rapasu kuanti 'ik?
- <sup>4</sup> 'Aínbi kamina min  
 nux 'uchakëkama nu  
 mëníoxunin,  
 usa 'ixun kananuna nun mi  
 rabiti kuëënin.
- <sup>5</sup> 'Ën bëru ñunshin bëtanbi  
 kana Dios kainin,  
 usakin 'ai kana ain bana  
 kuati ami katamëtin.
- <sup>6</sup> 'Ën kana Nukën 'Ibu Dios  
 kainin,  
 an ñantan bërúankë  
 unían pëkaratamainun  
 'akësamaira okin.  
 An bërúankë unikaman  
 pëkaratia kainkë usaribiokin,
- <sup>7</sup> usaribi okin kamina Israel  
 unikama mitsun kaínti 'ain,

an ka asérabi nuibanankë  
'ixun nux uisaibi 'iti  
kuëenima.

- <sup>8</sup> ¡An ka Israel unikama  
nuibakin, atun  
'uchakëkama tërënxunti  
'ikën!

### Salmo 137

**Babilonia baka 'urama  
tsótax masá nuituti  
'ia ñuikë bana**

- <sup>1</sup> Anu nu 'ikë Babilonia  
anuax kananuna anu 'ikë  
bakakama 'urama tsótax,  
masá nuitukin Jerusalén  
sinani iankën.
- <sup>2</sup> Álamos kakë ëma rapasu 'ikë  
i aín pëñanu kananuna  
nun arpakama bëntankën.
- <sup>3</sup> Anuxun ka an nu bibiankin  
uankë suntárukama,  
'imainun kamabi an nu  
bibiankin uankë unikama  
atúnribi,  
kuëeni kantanun kixun nu  
kakëxa;  
¡Kakin ka nun me Jerusalén  
sinani kantanun kixun  
nukama kakëxa!
- <sup>4</sup> ¿Usa 'aish karanuna Nukën  
'Ibu Dios,  
rabi bëtsi menuax kantati  
'ain? ¡Karanuna kantatima  
'ain!
- <sup>5</sup> ¡Jerusalén, 'ëx mimi manukë  
'ain, ka  
'ën mëkën anun ñu  
mëëtisama 'aisama 'inun  
'ë 'imikëma 'ain!

- <sup>6</sup> ¡Ianan ka 'ën anaribi 'ën  
manxántami,  
takáshki mi sinánkëbëma 'iti  
'ikën,  
usa 'ain kananuna 'itsaira  
kuëeni Jerusalén ami  
sinani manuti 'ain!

- <sup>7</sup> Nukën 'Ibu Dios edomita  
unikamax,  
Jerusalén ami nishkë  
unikaman 'akëbë ësai kia,  
a kamina sinánti 'ain:  
¡A ëma ka ami birukian 'a  
akama rurupakin 'akin  
këñuti 'ikën!

- <sup>8</sup> ¡Babilonianu 'ikë unikama  
mitsúxribi kamina këñúké  
'inuxun 'ain!  
¡Chuámarua ka an nu  
'asaribiokin nunun  
rabanan kupikin uisakara  
oisatania usokin mi 'akë  
ax 'iti 'ikën!
- <sup>9</sup> ¡Chuámarua ka an mitsun  
bakë bëchikëkama,  
anun ëma këñëara ami  
bixun rëké unikama atux  
'iti 'ikën!

### Salmo 139

**Diosan ka kamabi ñu  
'uania kikë bana**

- <sup>1</sup> Nukën 'Ibu min kamina uisa  
karana,  
'ëx 'ai kixun upíokin 'unanin;
- <sup>2</sup> usa 'ixun kamina kamabi 'ën  
'akë ñukama 'unanin;  
'ianan kamina 'uranxubi  
uisakin karana 'ën sinanin  
abi 'unanin.

- 3 Min kamina kamabi 'ën 'akë ñukama 'unanínkin añu 'anan karana añu 'aima kixun, ¡kamabi 'ën 'akë ñukama 'unanin!
- 4 'Ën usai kiti bana 'unaníkkë 'aímabi kamina, mix Dios 'ixun uisa banan karana kiti 'ai abi 'unanin.
- 5 Min kamina nëbétsiorakin 'ë bëararan; usa 'ixun kamina min 'ë isin.
- 6 Usa 'ain ka min 'akë ñukama ax 'ën 'unántibëtan sënénmaira 'ikën; ¡usa 'ikë kana ax 'ëbëtan sënémaira 'ikë 'unánkasmáin!
- 7 ¿Uinu karana 'ëx min bëru ñunshin ëbiani kuantí 'ain? ¡Kana uinubi kuantíma 'ain!  
¿Uinu karana mi ëbiani 'ëx abati kuantí 'ain? ¡Uinubi kana kuantíma 'ain!
- 8 'Ëx naíkamë 'ëo, manámi kuaruxunbi kana anuabi mí 'ën mërati 'ain; 'ímainun kana me 'ukëmëuira kuabuxunbi, anuaribi mí mërati 'ain;
- 9 'ëx pëchiu 'aish nuankiani kuani ami bari urukë ami kuananbi, ami bari kuabúkë parúmpapa 'ikë au tsóti kuankëbi kamina,
- 10 'ë ënkinma isti 'ain; ¡usa 'ixun kamina 'ë 'akínkin bërúanti 'ain!
- 11 'Ën kana bëánkibukë ami unéti sinánti 'ain, 'ianan kana nëtë xabá axa 'ëx ami unénun bëánkibunun kixun sinánti 'ain,
- 12 usa 'aínbi ka bëánkibukë anbi min istisama okin 'ë unëtíma 'ikën, 'ianan ka bëánkibukë ax nëtësaira 'inun pékikë 'iti 'ikën.  
¡Min iskëx ka nëtë xabá usaribi bëánkikë ax 'ikën!
- 13 Míin kamina kamabi 'ën namíkama 'akën; míin kamina 'ën títan puku 'ukë mëu uninun 'ë 'imiakën.
- 14 Usa 'ixun kana unin iskëma ñu 'akinmi 'ë unio 'ixun mí rabin, 'ianan kana míin 'akë ñukamáxa upí 'ain mí asábi ka káin.  
¡Usa 'ain kana usakin mí 'a 'ikë asérabi ka ax 'ikë kixun 'unanin!
- 15 Míin kamina 'unaníma 'íkíma 'ëx karana uisai kani a isakën, unëax 'ikësa 'inun 'ën, títan puku 'ukëmëúkúax 'ëx kanikë ax ka me 'ukëmëúkúax 'ëx kanikësa 'iakëxa.
- 16 Míin kamina míin bërúnbi uisai karana 'ëx uní 'inux 'írui abi isakën; usa 'ain ka kamabi ax míin kirikanu kuënëokë 'iakëxa.

- Min kamina achúshi  
 nètèrabi 'èx uni tankèx  
 tsókè 'aímabi, uisai  
 karana 'èx tsóti 'ai kixun  
 abi mënóokè 'iakèn.
- 17 'Èn 'Ibu Dios,  
 min sinánkè ax ka 'èn  
 sinánkébëtan sënémaira  
 'ikèn;  
 ;usa 'aish ka 'èn ñuitisama  
 tëiratè 'iti 'ikèn!
- 18 'Èn ñuitisatankëxbi ka  
 parúmpapa masi bëru iskè  
 usamaira a ñukama 'iti  
 'ikèn;  
 usa 'ikè tupunkin ñuikin  
 këñuamaxi 'uxax  
 bësukinbi kana mibëbia  
 'ikè oti 'ain.
- 19 'Èn 'Ibu Dios,  
 an 'atima ñu 'akè unikama  
 a këñunun 'imianan  
 kamina,  
 an uni 'akè unikama aribi 'è  
 'ura 'inun 'imiti 'ain,
- 20 'imianan kamina axa mi ñui  
 'atimati banakékama a  
 'anan.  
 Axa min anè ñui 'atimati  
 banakè unikamaribi 'ati  
 'ain.
- 21 'Èn 'Ibu,  
 ¿'èx kara ax mimi nishkè  
 unikama ami nishin,  
 'ianan karana axa mi ñui  
 'atimati banakè amiribi  
 nishima 'iti 'ain?
- 22 ;'Èn kana atu asérabi  
 istisama tanin!  
 ;Usa 'ain kana 'èx a  
 unikamami nishkësa 'ain!

- 23 Mix Dios  
 'ixun kamina, 'èn nuitu  
 'unánkin 'è tanti 'ain;  
 'ianan kamina uisakara 'èn  
 sinánkama 'ikè kixun  
 'unánti 'ain;
- 24 'unánan kamina 'èn karana  
 'atima ñu 'ai akamabi,  
 'unánkin uisai karana 'èx ñu  
 upí 'ai xëñibuti tsóti 'ai  
 kixun 'è 'unánmiti 'ain.

### Salmo 145

#### Kamabi unin ka Nukèn 'Ibu rabiti 'ikè kikè bana

- 1 Mixmi chaira Dios 'aish  
 'apuirá 'ikè;  
 kana min anè sinánkin  
 xëñibua 'aínbi mi rabiti  
 'ain.
- 2 Kamabi nètèn kana upiókin  
 sinánxunkin;  
 xëñibua 'aínbi min anè  
 rabiti 'ain.
- 3 Nun 'Ibu Dios an ka chaira  
 'ixun nukaman rabiti  
 kuëënia;  
 usa 'ain ka an 'akè ñukamax  
 uisaira kara kixun nun  
 'unántisamaira 'ikèn.
- 4 Usa 'ikè kananuna aín  
 papa 'ixun nun bakè  
 bëchikékama min 'a  
 ñukama ñuixunkin,  
 min kamina kushiira 'ixun  
 kamabi ñu 'akè kixun  
 atúnribi 'unánun ñuixunti  
 'ain.
- 5 Usakín ñuixunkëxa ax ka  
 'apu kushiira 'ikè,

- kimainun kana 'èx min  
kamina ñu chaiirabu unin  
iskëma ñukama 'akën kïax  
kiti 'ain.
- 6 Kikëbëa unikamax min  
kushínbi kamina anun  
rakuéti ñukama 'akën a  
ñui kimainun kana,  
'èx min kamina ñu chaiirabu  
'akën kïax kiti 'ain.
- 7 Usakin ñuixunkëxun ka  
mixmi nuibanankë ax ka  
chaiira 'ikë ki,  
munuma banakin ax ka upí  
'ikë kikin mi rabikanti  
'ikën.
- 8 Nukën 'Ibu Dios an ka  
nuibanairakë 'ixun,  
bënëtishi ami nishkin 'atima  
okinma uni nuibatia.
- 9 Nukën 'Ibu Dios ax ka  
kamabi unibë upí 'ikën,  
usa 'ixun ka an unio  
ñukama upíokin nuibakin  
bëruaia.
- 10 ¡Mín unio ñukama an ka aín  
Dios 'ikë mi rabiti 'ikën!  
¡'Amainun ka min unikaman  
asérabi min bana kikësa-  
biokin 'akin upíokin  
sinánkin mi rabiti 'ikën!
- 11 ¡'Ianan ka min nëtë upíra a  
ñuiribi kiti 'ikën!  
¡'Imainun ka min  
kushinbimi 'a akama  
ñuiribi kiti 'ikën!
- 12 ¡'Ianan ka unikamanribi min  
kushinmi ñu 'a a kamaribi  
'unánmiti 'ikën.  
Usakin 'anan ka mix anu  
'ikë ax ka upíra nëtë
- 'ianan chaiira 'ikë kixun  
unikama ñuixunti 'ikën!
- 13 Mix 'apu 'ia ax ka xëñibua  
'ainbi mix 'apu 'iti 'ikën,  
usa 'ain ka kamabi  
unin rëbúnki ax mix  
kuëenkësabi oi 'iti 'ikën.
- 14 'Ën 'Ibu Dios min kamina  
axa tëmërakë unikama,  
'imainun axa atsankëkama  
aribi kushinun 'imin.
- 15 Kamabi unin ka  
anun 'inánti nëtë 'ikëbëtan  
min 'inánkëxun piti  
binuxun kainia.
- 16 Usa 'ain kamina 'inántisabi  
tankin  
a bitsi kuëënun axa ënë  
menu tsókë unikama  
'inánan nuribi 'inánkin  
kamabi ñuina aín piti  
'inánin.
- 17 Nukën 'Ibu ax ka uisakin ñu  
'akatsi kara kia,  
usakinbi kamabi ñu upíokin  
'aia.
- 18 Nukën 'Ibu ax ka an rabikë  
unikama 'urama 'ianan,  
an asérabi këmëkinma  
rabikë akamanu 'ia.
- 19 An ka an rabikë unikaman  
kuëenkësokin 'axuanan;  
uínsaran kara 'akinun  
ñukatia anun ka  
ñukákëxun kuankin,  
'akianan iémia.
- 20 Nukën 'Ibun ka an nuibakë  
unikama nuibakin bëruaia,  
'aínbi ka an ñu 'atima 'akë  
unikama 'atima okin  
këñuia.

21 ¡'Ën kana 'ën kuëbitanbi  
 Nukën 'Ibu rabiti 'ain!  
 ¡'Amainun ka kamabi unínribi  
 upíokin sinánxunkin aín  
 anë upíira a rabiti 'ikën,  
 bërí 'ananbi ka xëníbua  
 'aínbi rabiti 'ikën!

### Salmo 148

#### Nukën 'Ibu an unio 'ixun rabiti bana

1 ¡Usa 'ain ka ësokín Dios  
 rabikanti 'ikën!  
 ¡Naínu 'ikë Nukën 'Ibu Dios  
 rabinun ka 'akan!  
 ¡Manámi 'ikë Nukën 'Ibu  
 Dios rabinun ka 'akan!  
 2 ¡Aín ángelkama atúnribi ka  
 kamaxunbi Dios rabiti  
 'ikën!  
 ¡Aín suntárukama naínu 'ikë  
 atúnribi, ka Dios rabiti  
 'ikën!  
 3 ¡Bari 'imainun, 'uxënribi ka  
 rabiti 'ikën!  
 ¡An mananmixubi pëkakë,  
 akamanribi ka rabiti 'ikën!  
 4 ¡Naíkamë 'ëo manami 'ikë  
 anribi 'amainun ka a  
 manami 'ikë  
 'umpax a kamanribi,  
 naínuxunbi rabiti 'ikën!  
 5 Nukën 'Ibu ax ka rabikë 'iti  
 'ikën,  
 axa usai ka 'iti 'ikë  
 kikëbëshi ka kamabi ñu ax  
 kikësabi oi uniakëxa;  
 6 an ka kamabi ñu nëtë  
 xëníbua 'aínbia usabi  
 'inun,

'imianan ax kikësabi oí 'iti  
 banakama aribi uínbia  
 bëtsiokin 'atëkëntima okin  
 'akëxa.

7 ¡Nukën 'Ibu Dios ka  
 menuxun 'amainun,  
 parúmpapanu 'ikë ñuinakan  
 'ëo, 'imainun parúmpapa  
 nëminu 'ikë akamanribi  
 rabiti 'ikën!  
 8 ¡'Amainun ka kaná mëríké,  
 matsi bëruñu,  
 'imainun matsi uxu  
 kuainkë 'ianan kuénkuru  
 akamanribi 'ati 'ikën!  
 ¡'Amainun ka suñúan  
 bënámë kuatsinkë anribi,  
 ax kikësabiokin a rabiti  
 'ikën!  
 9 'Amainun ka bashikama  
 'ianan me matákama  
 'imainun.  
 Kamabi kunxankama 'ianan  
 axa tuákë ikama anribi  
 rabiti 'ikën  
 10 ¡'Imainun ñuina 'arakakë,  
 ñuina 'arakakëma a  
 kamanribi 'ati 'ikën!  
 ¡'Ianan ka pëchiu ñuinakama  
 'imainun pukun níríké a  
 kamanbi rabiti 'ikën!  
 11 ¡'Amainun ka kamabi menu  
 'ikë 'apukama 'imainun  
 bëtsi bëtsi ëmanu 'ikë  
 uníkama!  
 ¡'Amainunbi ka 'apukama  
 'imainun aín kushibu  
 akamanribi rabiti 'ikën!  
 12 ¡'Imainun ka xanukaman,  
 'amainun uni bënábu xanu  
 chipashbu 'imainun uni

- kaniakëkë akamanribi  
rabiti 'ikën!
- <sup>13</sup> ¡Kamaxunbi ka Nukën 'Ibu  
Diosan anë rabiti 'ikën,  
an ka aín anë ñuikin usakin  
rabiti kuëënia!  
¡Ax ka chaiira 'aish naíkamë  
'ëo 'imainun mekama  
manámi 'ikën!
- <sup>14</sup> ¡Diosan ka aín unikama  
kushioia!  
¡Usa 'ain ka nux aín uni  
'ixun rabimainun aín uni  
a 'urama 'ikë akamanribi  
rabiti 'ikën!  
¡Usa 'ain kananuna ashi  
ësokin rabiti 'ain!

### Salmo 150

#### A mëëkin anun Dios rabiti ñukama ñuikë bana

- <sup>1</sup> ¡Usa 'ain kananuna ashi  
ësokin rabiti 'ain!  
¡Rabikin aín xubunuxunbi  
rabikë ka Dios 'iti 'ikën!  
¡Rabikin naíkamë 'ëo kuman  
batsisa 'itanua unio  
anuxunbi rabikë ka 'iti  
'ikën!
- <sup>2</sup> ¡Rabikë ka Dios 'iti 'ikën,  
ax kushiira 'ixun ka aín

- kushínbi ñu chaiirabu  
'akëxa usa kupín!  
¡Rabikë ka bëtsi ñu  
kushibëtan sënënmaira ax  
'iti 'ikën!
- <sup>3</sup> ¡Rabikin ka manë banañu  
banokin anun rabikë 'iti  
'ikën!  
¡Rabikin ka arpa 'imainun  
bëtsiokin 'akë a mëëkin  
ati anúnribi rabikë 'iti  
'ikën!
- <sup>4</sup> ¡Rabi ka manë sharíkati 'akë  
a sharíkai abi tani ransati  
'ikën!  
¡Rabikin ka a xunkati 'akë  
a xunkai 'ianan anun  
mëëti risi satëonkin 'akë  
akama mëëkin rabiti  
'ikën!
- <sup>5</sup> ¡Rabikin ka manë parókin  
ratusa okin 'akë a  
tsarankakin rabiti 'ikën!  
¡Rabikin ka bënëkinshi  
manë tsarankakin rabiti  
'ikën!
- <sup>6</sup> ¡Kamabi ñuina axa suñun  
uinkë 'imainun unikama  
anbi ka rabiti 'ikën!  
¡Usa 'ain kananuna ashi  
ësokin ax kuëënkësabi  
okin rabiti 'ain!